



# পরণারে


( নাটক )

দ্বিজেন্দ্রলাল রায়

গুরুদাস চট্টোপাধ্যায় এণ্ড সন্স ,  
২০৩/১১, কর্ণওয়ালিস্ স্ট্রীট, কলিকাতা

প্রারম্ভ—১৩৩১

মূল্য ১১০ টাকা মাত্র



অষ্টম সংস্করণ

প্রিণ্টার—শ্রী নরেন্দ্রনাথ কোণ্ডার  
 কারতবর্ষ প্রিণ্টিং ওয়ার্কস্  
 ২০৬/২১০, কর্ণওয়ালিস স্ট্রীট, কলিকাতা









# উৎসর্গ

পূজ্যপাদ

প্রসাদদাস গোস্বামী

দাদামহাশয়

শ্রীচরণকমলেশু—





## কুশীলবগণ

( পুরুষ )

বিশ্বেশ্বর	...	জন্মদার ।
মহিমারঞ্জন	...	সরযুর স্বামী ।
দয়াল	...	করুণাময়ীর বৃদ্ধ প্রতিবেশী ও বিশ্বেশ্বরের বালাবন্ধু ।
পরেশ	...	সরযুর মাতুল ।
কালীচরণ	...	জটনৈক নিকর্ষা ব্যক্তি ।
পার্বতী	...	মহাজন ।
ঢাক ও বিনোদ	...	পার্বতীর বন্ধু ।

( স্ত্রী )

করুণাময়ী	...	মহিমারঞ্জনের মাতা
সরযু	...	বিশ্বেশ্বরের পৌত্রী ।
হিরণ্ময়ী	...	জটনৈক ভ্রষ্টা নারী ।
শাস্তা	...	বৈশা ।

---



# পরগারে

## প্রথম অঙ্ক

### প্রথম দৃশ্য

স্থান—করুণাময়ীর কুটীৰ। কাল—প্রভাত।

বাড়ীর আঙ্গিনায় করুণাময়ী, তাঁহার বৃদ্ধ প্রতিবেশী দয়াল,

ও প্রতিবেশিনীগণ আসীন।

করুণা। আজ আমার বড় আনন্দ। এসো। এ আনন্দে যোগ

দাও। আজ আমার বড় আনন্দ।

১ প্রতিবেশিনী। তা ত হবেই। ছোট ছেলের বিয়ে। হবে না ?

২ প্রতিবেশিনী। খাসা দৌ হয়েছে। টুকটুকে বৌ !

৩ প্রতিবেশিনী। ঘর আলো করা বৌ !

১ প্রতিবেশিনী। হাঁগা ! মেয়েটির বাপ কি করে ?

দয়াল। মেয়েটির বাপ'মা কেউ নেই।

২ প্রতিবেশিনী। তবে কে আছে ?

দয়াল। তার দাদামহাশয়।

৩ প্রতিবেশিনী। দাদিমা'?

দয়াল। দিদিমাও নেই!

১ প্রতিবেশিনী। আহা! তা'লে তাকে দেখবার কেউ নেই!

দয়াল। দাদামহাশয় আছেন। নেয়েটির বাপ মাও সে রকম তাকে দেখতে পার্ত্ত না—তার দাদামহাশয় বেমন এত দিন দেখে এসেছে।

২ প্রতিবেশিনী। বটে!

দয়াল। বুড়ো দিবারাত্র তাকে বুকের উপর করে' রাখতো; নিজের হাতে করে' থাওয়াত;—আর বলতে বলতে আমার চোখে জল আসে--

৩ প্রতিবেশিনী। কেন গা!

দয়াল। আমিও বুড়ো হয়েছি; কিন্তু দাদামহাশয়ের মত বুড়ো কখন দেখিনি। এদিকে ত দান করে' ফতুর। ওদিকে আবার বেন একখানি মূর্ত্তিমান্ স্নেহ; আর সেই স্নেহের প্রাণ এই নাতিনী। এক দিন—তখন তার নাতিনীর বয়স বছর চারেক হবে—এক দিন সকালে বুড়োর ওখানে গিয়েছি। দেখি যে বুড়োর মুখে দড়ি বেঁধে, তার নাতিনী, তার পীঠে দস্তুরমত ঘোড়সোয়ার হ'য়ে বসে', একগাছ কঞ্চি হাতে করে' বলছে “হট হট”—আর বুড়ো হামাগুড়ি দিয়ে বারান্দাময় গুরে বেড়াচ্ছে।

করুণা। আহা!

১ প্রতিবেশিনী। বল কি গো। বুড়ো তা'লে দস্তুরমত পাগল।

২ প্রতিবেশিনী। বুড়ো ম'র্কে।

৩ প্রতিবেশিনী। সে যা হোক কিন্তু খাসা বৌ পেয়েছো দিদি!

দয়াল। বৌ পেয়েছো, কিন্তু হয় ত ছেলে হারালে।

করুণা। সে কি বল ভাই—এমন ছেলে—আমি বৈ জানে না।

১ প্রতিবেশিনী । মা ব'লে অজ্ঞান ।

২ প্রতিবেশিনী । সুবোধ ।

৩ প্রতিবেশিনী । বিদ্বান্ ।

দয়াল । যতই সুবোধ হোক, মায়ের প্রতি যতই টান থাকুক—বিয়ে হ'লে ছেলে আর তেমনটি থাকে না ।

করুণা । না না, সে কথা বোলো না ভাই । আমার অমন ছেলে—

১ প্রতিবেশিনী । নিজের হাতে করে' মানুষ করেছে ।

২ প্রতিবেশিনী । তার অসুখে বিস্মুখে রাত্রি জেগে নিজের দেহপাত করেছে ।

৩ প্রতিবেশিনী । গর্ভে ধরেছে ।

করুণা । বল কি ভাই ! চিরদিন সে মা বৈ আর জানে না । আর আজ ম'র্ত্তে বসেছি—আজ সে পর হ'য়ে যাবে !

দয়াল । এদিকেও ম'র্ত্তে ব'সছো, ওদিকেও ম'র্ত্তে বসেছো ! [প্রস্থান ।

১ প্রতিবেশিনী । কি অলক্ষণে কথা সব ।

করুণা । এমন ছেলে পর হ'য়ে যাবে !—হাঁ গা !

৩ প্রতিবেশিনী । শোন কেন ভাই !

করুণা । তাই যদি হয়, হোক । সে ত সুখী হবে ।

২ প্রতিবেশিনী । তা আর হবে না ! এমন টুকটুকে বো ।

১ প্রতিবেশিনী । যেন মা জগদ্ধাত্রী ।

২ প্রতিবেশিনী । হরগোরীর মিলন !

মহিমের প্রবেশ ।

করুণা । এই যে বাছা !—মুখখানি যে শুকিয়ে গিয়েছে ।



প্রতিবেশিনীগণ । আমরা তবে আজ আসি ভাই ।

করুণা । এসো !

[ প্রতিবেশিনীগণের প্রস্থান ।

করুণা । মুখখানি শুকনো শুকনো দেখছি যে ! কোনও অসুখ করেনি ত ?

মহিম । না মা—তুমি এখনও খাওনি ?

করুণা । না বাবা ।

মহিম । খাও গে যাও । তোমার অসুখ ক'র্কে !

করুণা । এত স্নেহের মধ্যে অসুখ আসবে কোথা দিয়ে !—মহিম ! বৌ পছন্দ হয়েছে ?

মহিম । তুমি খাও আগে । নৈলে আমি তোমার কোন কথা শুন্বো না ।

করুণা । এই যাচ্ছি ।—ও কি, চোখে জল !—কি হয়েছে বাবা !

মহিম । মা !

করুণা । কি বাবা !

মহিম । মা ! [ বক্ষে মুখ লুকাইলেন ]

করুণা । [ কম্পিত স্বরে ] কি বাবা ! কাঁদছি কেন ।

মহিম । না মা ! কিন্তু এ কি হ'ল মা ! আজ প্রাণ এত আকুল হয় কেন ? কে যেন আমাকে তোমার কাছ থেকে ছিনিয়ে নিতে এসেছে ! ঘরে চোর সঁধিয়েছে ।—আমায় ছেড়ো না মা ।

করুণা । সে কি বাছা ! এ কি ! কাঁপুচ্ছি যে—

মহিম । জানি না—কেন !—না মা, থাকে এসো । আমি তোমার খাওয়া আজ নিজে দেখুবো ।

করুণা। কেন!

মহিম। আমার ইচ্ছা হয়েছে।—এসো মা।

[ নিষ্ক্রান্ত।

## দ্বিতীয় দৃশ্য

স্থান—বিশ্বেশ্বরের প্রাসাদমঞ্চ। কাল—সন্ধ্যা।

বিশ্বেশ্বর ও সরযু।

বিশ্বেশ্বর। বলি কেমন! বর পছন্দ হয়েছে ত!

সরযু। যান!

বিশ্বেশ্বর। যাবোই ত! যেতে ত বসেছি। তবে দুদিন আর তর  
সেছে না।—তোর বর পছন্দ হয়েছে?

সরযু। যান!

বিশ্বেশ্বর। তা—এখন আর আমাকে পছন্দ হবে কেন। বুড়ে  
হয়েছি। এখন নতুন চাই।

সরযু। আপনি ভারি ছুট।

বিশ্বেশ্বর। মাথায় টেরি, হাতে ছড়ি, চোকে চশমা, আর নবীন  
গোঁদ—এ নইলে কি আর এখন মন ওঠে! তবে বর পছন্দ হয়েছে?

সরযু। আমি আর আপনার সঙ্গে কথা কৈব না।

বিশ্বেশ্বর। তা আর কৈবি কেন! বুড়ে হয়েছি। এতে কি আর  
মন ওঠে!—সরযু!

সরযু। দাদামহাশয়!

বিশ্বেশ্বর। আমাকে ঠিক আগেকার মত ভালবাসবি?

সরযু। বাস্বো ! চিরদিন বাস্বো, যতদিন বেঁচে থাকি ।

বিশ্বেশ্বর। তেমনি করে' গলাটি জড়িয়ে ধরে' দাদামহাশয় বলে' ডাকবি ? তেমনি করে' খাবার সময় কাছে এসে বস্বি ? তেমনি আদর করে'—

সরযু। দাদামহাশয় !—আমি চলে' গেলে আপনার দুঃখ হবে ?

বিশ্বেশ্বর। তোর কি বোধ হয় ?

সরযু। তবু জিজ্ঞাসা করি, উত্তর দেন । বড় কষ্ট হবে ?

বিশ্বেশ্বর। কষ্ট !—চক্ষু ছাট অন্ধ হলে' মানুষের কি হয় সরযু ? পিতৃ-মাতৃহীনা তোকে আমি যে হাতে করে' মানুষ করেছি, খাইয়ে দিয়েছি । তোর মুখ পানে চেয়ে চেয়ে দেখেছি—চোখ ঠিকরে গিয়েছে তবু যেন দেখা শেষ হয়নি । বুকে চেপে ধরেছি—এমন জোরে চেপে ধরেছি যে, তুই ঘুমের ঘোরে কেঁদে উঠেছিস । তার পর বিছানা থেকে উঠে বারান্দায় বেড়িয়ে বেড়াইছি ; মনে মনে ভেবেছি—‘কাকে এত ভালো বাসছি ? কেন ভালো বাসছি ?—ও আমার কে ? বুকের রক্ত খাইয়ে কালসাপিনী পুষেছি । যখন সে চলে যাবে, তখন যে বুকে ভালো বাসি সেই বুকে ছোবল মেরে চলে' যাবে, আমি বস্ত্রণায় ছটফট করব, আর সে একবার ফিরেও চাইবে না ।’

সরযু। দাদামহাশয় ! আমি স্বপ্নরবাড়ী যাবো না ।

বিশ্বেশ্বর। তুই তো বলি যাবো না । সে ছাড়ে কৈ !—সে যে কড়ি দিয়ে কিনেছে ; এখন দড়ি দিয়ে বেঁধে টেনে হেঁছড়ে নিয়ে যাবে ।

সরযু। কেন আমার বিয়ে দিলেন দাদামহাশয় ?

বিশ্বেশ্বর। পরে বুঝবি কেন দিলাম ; কেন আমার হৃৎপিণ্ড টেনে

ছুঁড়ে ফেলে দিলাম; কেন নিজের চক্ষু ছাটি নিজে উপড়ে ফেলে দিলাম;—এক দিন বুল্‌বি।

সরযু। কেন দিলেন?

বিশ্বেশ্বর। তোমারই স্নেহের জন্ত দিদি!

সরযু। আমার স্নেহ? এ বিবাহে আমি স্নেহী হব না।

বিশ্বেশ্বর। সে কি দিদি!

সরযু। কেন জানি না। আমার মন বলছে।—দাদামহাশয়! আমি আপনাকে ছেড়ে যাবো না।

বিশ্বেশ্বর। যাবি বৈ কি! শুদ্ধ যাবি!—এক বৎসর পরে উণ্টো গাইবি; বুল্‌বি—আমি আর দাদামহাশয়ের কাছে ফিরে যাবো না।

সরযু। ঈস্—

বিশ্বেশ্বর। তখন দেখে নিস্!—তখন আর তোর দাদামহাশয়কে দিনাস্তে একবার মননও পড়বে না।

সরযু। আমি যাবো না। দাদামহাশয়! আমি আপনাকে ছেড়ে যাবো না। [ গলদেশ জড়াইয়া ধরিলেন ]—আমি যাবো না।

বিশ্বেশ্বর। যাবি না কি! আমার কষ্ট হবে না দিদি। সয়ে' যাবে।—সয়ে' যাবে। তুই চলে' গেলে আমি কি করব জানিস্?

সরযু। কি করবেন? আত্মহত্যা করবেন না?

বিশ্বেশ্বর। ঈস্! তোর জন্ত আমি আত্মহত্যা করব! ভারি গুণের!—ওরে তোর বিরহে আমি 'কোথায় সরযু, কোথায় সরযু', বলে' কঁদে কঁদে রাস্তায় ছুটে বেরোবো না—

সরযু। তবে কি করবেন?

বিশ্বেশ্বর । এই সঙ্গিহীন বিচ্ছালের ছানার মত আমি নিজের লেজের সঙ্গে খেলা কর্‌ব । [ চক্ষু মুছিলেন ]

সরযু । না দাদামহাশয়, আমি আপনাকে ছেড়ে যাবো না । [ কণ্ঠ জড়াইয়া ] দাদামহাশয় !

বিশ্বেশ্বর । এ কি তোমার নিয়ম দয়াময় ! একজনের দুঃখ নৈলে কি আর একজনকে সুখ দিতে পারো না ! এই ভুজবন্ধন নিজের হাতে ছিঁড়ে দিতে হচ্ছে । তার চিরদিনের আশ্রয় এই বুক থেকে তাকে নিজে তাড়িয়ে দিয়ে পরের ঘারে ভিক্ষুক করে' পরের ঘরের দাসী ক'রে দিতে হচ্ছে ।—না তুই থাক । কোথায় বাবি ! আমার ঘর আঁধার করে' বুক খালি করে' প্রাণ শূণ্য করে' কোথায় চলে' বাবি দিদি ! না, আমি তোকে ছেড়ে থাকতে পার্‌ব না !

[ সরযুর গলদেশ জড়াইয়া ধরিলেন ]

দরোয়ানের প্রবেশ ।

দরোয়ান । হুজুর জনকতক বাবু এসেছেন

বিশ্বেশ্বর । কেন ?

দরোয়ান । তা জানি না হুজুর !

বিশ্বেশ্বর । এখন যেতে বল ।

দরোয়ান । যে আজ্ঞে !

[ দরোয়ানের প্রস্থান ।

বিশ্বেশ্বর । সরযু !

সরযু । দাদামহাশয় !

বিশ্বেশ্বর । মেঘ করেছে না ?—দেখত ।

সরযু । [ দেখিয়া ] কৈ না ।

বিশ্বেশ্বর । ও !—আমারই ভুল !—নিতাই !

নিতাইয়ের প্রবেশ ।

বিশ্বেশ্বর । না কিছু না—যাও ।—

[ নিতাইয়ের প্রস্থান ।

সরযু । দাদামহাশয় ! ও রকম কর্ছেন কেন ?

বিশ্বেশ্বর । [ সহাস্তে ] কৈ না !—আচ্ছা সরযু ! তবে কাল যাবি !—

সরযু । বলেছি ত দাদামহাশয় !—আমি যাবো না ।

বিশ্বেশ্বর । তা কি হয় !—বিয়ের পর স্বামীর বাড়ী যেতে হয় । তার পর আবার আসবি । তোর দাদামহাশয় এমনি করে' তোর পথ চেয়ে থাকবে ।

দরোয়ানের প্রবেশ ।

দরোয়ান । গোমস্তা মহাশয় এসেছেন ।

বিশ্বেশ্বর । কেন ?

দরোয়ান । মোলাকাত চান ।—

বিশ্বেশ্বর । এখন হবে না !

দরোয়ান । বল্লেন বিশেষ দরকার ।

বিশ্বেশ্বর । এখন হবে না । বেতে বল !—

[ দরোয়ানের প্রস্থান ।

বিশ্বেশ্বর । এ সময় রুথা ক্ষেপণ কর্তে পারি না । এর প্রতি মুহূর্ত পবিত্র । বর্ষার আকাশে রৌদ্রের হাতের মত বেশীক্ষণের জন্ম নয় ! কাল দীপ নিভে যাবে । সব অন্ধকার হ'য়ে আসবে !

পরেশের প্রবেশ ।

বিশ্বেশ্বর । কে ! পরেশ !—কি সংবাদ ?

পরেশ। চাকুবাবু নীচে এসেছেন।

বিশ্বেশ্বর। ও!—তঁার কতাদায়। আজ তাঁকে আস্তে বলে-  
ছিলাম বটে।—পরেশ! তাঁকে ৫০০০ টাকা দিয়ে দাও গে যাও।

পরেশ। দলিল আনেন নাই।

বিশ্বেশ্বর। কিছু দরকার নাই।—ভদ্রলোক!

পরেশ। মানুষকে অত বিশ্বাস কর্কেন না তাওয়াই মহাশয়!

বিশ্বেশ্বর। সে কি! মানুষকে বিশ্বাস কর্কেন না! ঈশ্বরের শ্রেষ্ঠ  
সৃষ্টি, মর্ত্যে ভগবানের অবতার,—যে রূপে আমরা দেব দেবীর কল্পনা  
করি, তাকে বিশ্বাস কর্কেন না! জগতের প্রভু, সমাজের নিয়ন্তা, সভ্যতার  
সম্ভান, ধর্মের প্রতিষ্ঠাতা, জ্ঞানের গুরু, ত্যাগের শিষ্য, স্নেহের দাস—  
মানুষকে বিশ্বাস কর্কেন না! বল কি পরেশ! তবে কি পশুকে  
বিশ্বাস কর্কেন?

পরেশ। অনেক মানুষ আছে, বারা পশুর অধম।—যারা ভাইরের  
প্রতি অত্যাচার করে, বন্ধুর সর্বনাশ করে, জীকে প্রহার করে, বৃদ্ধ  
পিতাকে ধাক্কা দিয়ে সংসার থেকে সরাতে চায়—

বিশ্বেশ্বর। ছি ছি! মানুষের নিন্দা কোরো না। মানুষ আমার  
ভাই! তার নিন্দাবাদ শুনে চাই না—যাও গোমস্তাকে বলগে—

পরেশ। কিন্তু—

বিশ্বেশ্বর। যাও বাবাজি!

[ পরেশের প্রস্থান।

বিশ্বেশ্বর। সরযু!

সরযু। কি দাদামহাশয়?

বিশ্বেশ্বর। কথা কচ্ছিস্ না যে?

সরযু। কি কথা কৈব দাদামহাশয়?

বিশ্বেশ্বর। কি কথা কৈবি!—তাও ত বটে! এখন যত কথা সেই নবীন গৌফ, আর কৌকড়া চুল, আর বাঁকা টেড়ির সঙ্গে।—না?

সরযু। যান।

বিশ্বেশ্বর। আমার সঙ্গে ঐ এক কথা—‘যান’! আমি ত আর তোর ‘প্রাণেশ্বর’ নই!—আচ্ছা সরযু! আমায় একবার প্রাণেশ্বর বলে ডাক দেখি!—দেখি কেমন শোনায়। অনেক দিন কারো কাছে সে মধুর ডাক শুনিনি! একবার ডাক দেখি!

সরযু। কি বলেন বে দাদামহাশয়—

বিশ্বেশ্বর। আহা একবার ডাক না। তোর প্রাণেশ্বর ত আর এখানে নাই যে রাগ কর্বে। ডাক না—‘প্রাণেশ্বর’, ‘নাথ’, ‘বল্লভ’, ‘হৃদয়সর্বস্ব’—বা হোক একটা কিছু।—ডাক না। বড় মিষ্ট ডাক।

সরযু। কেন। দাদামহাশয় ডাক পছন্দ হয় না!

বিশ্বেশ্বর। ম—ন্দ নয়। তবে কি না ওর মধ্যে অতখানি রস নেই। ‘দাদামহাশয়’—বল্লি ‘অর টকাশ ক’রে ফুরিয়ে গেল। প্রা—ণে—শ্ব—র—কতখানি টান দেখ দেখি। বলতে বলতে সন্দেশের মত অর্ধেক জিভে জড়িয়ে গেল। সমস্তটা বলা হোল না।

সরযু। সে ত আমার!—তাতে আপনার কি!

বিশ্বেশ্বর। আমার কি!—আওয়াজটা বেহাগ রাগের মত বেন আমার চক্ষে এসে চুষন কর্লে, দেহটা বেন কি একটা নেশায় ঢুলে ণ্ডুল, অমনি ছইখানি কোমল স্নগোল বাহু ফুলের মালার মত ক যেন আমার গলায় জড়িয়ে দিল!—কেমন কবিত্ব কর্লাম দেখলি!

সরযু। খাসা!—আপনি কবিতা লেখেন না কেন দাদামহাশয়!



বিশ্বেশ্বর। মেলে না—বদি কেউ মিলিয়ে দিত, আর অক্ষরগুলোর একটা হিসাব রাখত, আমি খুব বড় একটা কবি হ'তাম।—তবে ঐ মেলে না।

সরযু। কেন—অগিত্রাক্ষর ?

বিশ্বেশ্বর। মাইকেল অনেক পরিশ্রম ক'রে লিখে গেছে। বেচারার নামটা লোপ করুঁ!—তাই লিখি না।

সরযু। দেশের সৌভাগ্য !

বিশ্বেশ্বর। ঐ সূর্য্য অস্তে গেল!—চেয়ে দেখ্ সরযু! আকাশে কে! যেন বর্ণের জাল বুনে দিয়েছে।—কি সুন্দর !

সরযু। কি সুন্দর !

বিশ্বেশ্বর। কাল সন্ধ্যায় এই ছাদের উপরে কেবল আকাশ আর আমি—আর মধ্যে রাশি রাশি অন্ধকার।—ঐ শোন সরযু।

সরযু। কি দাদামহাশয় ?

বিশ্বেশ্বর। গান শুভে পাচ্ছি! !

সরযু। [ কান পাতিয়া শুনিয়া ] হাঁ—[ সাগ্রহে ] কে গাইছে। দাদামহাশয় ?

বিশ্বেশ্বর। ভবানীপ্রসাদ।—একজন কালীভক্ত। আমি তাকে গাইনে দিয়ে রেখেছি,—আশ্চর্য্য নাহুয !

সরযু। কি রকম!—

বিশ্বেশ্বর। বেশী কথা কয় না। ঐ দেখ্, নিজের মনে গান গেয়ে চলেছে। যেন তার সমস্ত প্রাণ সমস্ত ইহকাল—ঐ গানের মধ্যে ঢেলে দিয়েছে ! ঐ যে গান গাইতে গাইতে এই দিকেই আসছে।—শোন।

গাইতে গাইতে ভবানীপ্রসাদের প্রবেশ ও প্রস্থান।

গীত।

এবার তোরে চিনেছি মা, আর কি স্থামা তোরে ছাড়ি !  
 ভবের দুঃখ ভবের জ্বালা ( এবার ) পাঠিয়ে দিইছি যমের বাড়ী।  
 ফেলেছিলি গোলক ধাঁধায়—মা হ'য়ে কি এমন কাঁদায় !—  
 (শেষে) ছেলের কান্না শুনে অমনি (ও তোর) কেঁদে উঠ'লো মায়ের নাড়ী।  
 হাত ধরে' নিলি মোরে ( আমি ) ভাবনা ভীতি গেলাম ভুলে,  
 চোখের বারি মুছিয়ে দিয়ে ( তখন ) নিলি আমার কোলে তুলে ;  
 ভবাৰ্ণবে দিশে-হারা—পাচ্ছিলাম না কুলকিনারা,  
 ( তখন ) দেখা দিলি প্রব-তারা ( অমনি ) তারা ব'লে বিলাম পাড়ি।

বিশ্বেশ্বর। পৃথিবী পবিত্র হ'ল—আমার প্রাণ মায়ের নামে ভরে'  
 গেল। সরযু! [ সরযুর গলদেশে জড়াইয়া ধরিলেন ]

সরযু। দাদামহাশয়! [ এক হস্তে বিশ্বেশ্বরের কটিদেশে জড়াইয়া  
 ধরিয়া অপর হস্তে বস্ত্র দিয়া চক্ষু মুছিতে লাগিলেন ]

## তৃতীয় দৃশ্য

স্থান—পার্কতীর গৃহের বহিঃকক্ষ।

কাল—রাত্রি।

পার্কতী, পরেশ ও কালীচরণ আসীন।

পার্কতী। বিশ্বশুদ্ধ যে বিশ্বেশ্বরের গুণকীর্তন করে!—তার  
 জমীদারীর এত আয়, অত আয়! কিন্তু নাতিনীর বিয়েতে টাকা ধার  
 ক'র্ত্তে যান কেন?

পরেশ। সময় অসময় টাকা ধার দিতে হয়, নিতেও হয়।

পার্কীতী। ধার দিতে ত কখন দেখলাম না, নিতেই ত দেখছি।

পরেশ। তিনি বড় ধার দেন না,—দেন ত, একেবারেই দেন।

পার্কীতী। একেবারে দাতাকর্ণ!

পরেশ। নয় ত কি!

পার্কীতী। ছুদিন পরে হাত ধুয়ে পথে বসতে হবে আর কি।

কালী। অনেকের হাত ধুলেই ফসাঁ।—ফসাঁ আমি এখানে বিকল্পে ব্যবহার করছি, মনে রেখো পরেশ!—আর অনেকের [ পার্কীতীকে দেখাইয়া ] হাত সমুদ্রের জলে ধুলে সমুদ্রের জল রাস্তা হয়, কিন্তু হাতের দাগ যায় না;—পরিষ্কার বাংলা বলছি, না? সেক্সপীয়র বলেছেন—  
The multitudinous seas incarnadine, বেশ বলেছেন—কিন্তু বড্ড সংস্কৃত। আমার এ খাঁটি বাংলা। আর—

পার্কীতী। কিন্তু পথে বসতে আর বেশী বিলম্বও নাই জেনো।  
আমি—

পরেশ। পথে অনেকেই বসে। তবে তফাৎ এই যে, দান করে' যে পথে বসে, সে পথে বসে বটে, কিন্তু সিংহাসনের উপর বসে—পথিক তাকে দেখে তার সম্মুখে ভক্তিভরে জান্নু পেতে অর্চনা করে। আর অনেকে দান না করে' পথে বসে, আর পথের শৃগাল কুকুরও তাদের পদাঘাত করে' চলে' যায়।

পার্কীতী। দান! দান! দান! বিশ্বেশ্বর দান করে' করেছে কি! আমি ধার দিয়ে জমীদারী কিনেছি। আর তিনি দান করে' জমীদারী ফোয়াছেন—এই ত!

পরেশ। তিনি জমীদারী কিনেন নি বটে, কিন্তু তিনিও কিনেছেন।

পার্কী। কি!

পরেণ। প্রশংসা।

পার্কী। ফুঃ! হাওয়া। হু করে' উড়ে যায়! কিছু হয় না।  
কিন্তু জমি কঠিন পদার্থ—আবাদ ক'র্লে ফসল হয়।

কালী। এটা ত পার্কী বেশ বলেছে হে! আবার উৎপ্রেক্ষা দিয়ে বলেছে। Pope বলেছেন বটে solid pudding against empty praise. কিন্তু প্রশংসা ফুঃ! হাওয়া, হু করে' উড়ে যায়—  
চমৎকার! পার্কী! shake hands [ করপীড়ন করিলেন ]

পরেণ। কিন্তু লোকে সকালে আপনাকে বাপাস্ত না করে' জল গ্রহণ করে না, তা জানেন!

পার্কী। হিংসা।

পরেণ। হিংসা আপনার। বিশ্বের বাবুর প্রশংসাটি শুনলেই আপনার মুখখানা চক্ৰাকার হয় কেন?

কালী। But, envy withers at another's joy and hates the excellence it cannot reach.

পরেণ। বিশ্বের বাবু ত আপনার হিংসা করেন না।

পার্কী। ওহে মনে মনে করে, কেবল মুখে দেখায় না।—

ভণ্ড।

পরেণ। খবদার, বিশ্বের বাবুকে ভণ্ড বলবেন না!—সেই না।

পার্কী। কি! মার্কে না কি!

পরেণ। দরকার হয় ত বিধা কর্ক না জেনো!

পার্কী। ঈস! ভারি সাধ্য!

পরেণ। তবে দেখবে! [ 'আস্তিন শুটাইলেন ]

কালী। আহা কর কি ! এ মোটেই দার্শনিক অবস্থা নয়। তর্ক করে' মীমাংসা কর। তার বেশী যেও না।

পরেশ। না, তোমার সঙ্গে হাতাহাতি করা আমার লজ্জার কথা।  
—তুমি কি একটা মানুষ।

কালী। আহা—God made him.

চারু ও বিনোদের প্রবেশ।

পরেশ। এবার এটা দস্তুরমত শয়তানের কারখানা হ'য়ে উঠলো।

[ সক্রোধে প্রস্থান।

চারু। ব্যাপারখানাটা কি ?

পার্কতী। এই হতভাগাটা আমার বাড়ী বেয়ে ঝগড়া ক'রতে এসেছে—বলে মার্কো।—এসো না [ আস্তিন গুটাইতে গুটাইতে ] আর না দেখি, পাজী।

কালী। Why পার্কতী, this is worse than quixotic. Don Quixote গিয়াছিলেন যুদ্ধ ক'র্তে wind mill এর সঙ্গে। কিন্তু তুমি যাচ্ছ যুদ্ধ ক'র্তে—wind এর সঙ্গে।

পার্কতী। আচ্ছা আর এক দিন দেখবো। [ বসিলেন ]

কালী। সেই ভালো—said like a wise man.

পার্কতী। তার পর। এদিকে খবর কি ?

চারু। নিলামে উঠেছে। ২৫ নম্বর লাট শ্রীপুর। ২৭এ জুলাই।

পার্কতী। তা জানি ! নীলামী ইস্তাহার !

চারু। জারি হবে না। ঠিক করেছি।

পার্কতী। কেয়াবাং ! তবে তুমি এখন এসো চারু। আঁি একবার এটর্গির ওখানে যাবো।

চারু । কেন আমিই যাচ্ছি।—বল না কি ক'র্ত্তে হবে !

পার্কস্‌তী । এখন তোমার আর কোন কাজ নাই ?

চারু । আমার আবার কাজ ! আমার এই ত কাজ ।

পার্কস্‌তী । আচ্ছা তবে এই কাগজখানা নিয়ে যাও । সেই করে' দিয়েছি । আর সব তিনি জানেন । [ নাও বাক্স খুলিয়া কাগজ চারুর হাতে দিলেন ]

[ চারুর প্রস্থান ।

কালী । For Satan finds some mischief still for idle hands to do.

পার্কস্‌তী । তার পর—এ দিকে ?

বিনোদ । সব ঠিক ।

পার্কস্‌তী । কত চায় ?

বিনোদ । বেশী নয় [ কর্ণে কর্ণে কহিয়া ]—নিখুঁৎ সুন্দরী ।

পার্কস্‌তী । গায় ভালো ?

বিনোদ । উঃ !—

পার্কস্‌তী । ঠিক করে' ফেল ।

বিনোদ । আচ্ছা তবে আমি আসি । বিশেষ দরকার আছে ।

[ প্রস্থান ।

কালী । ওদিকে যেঁসো না বল্ছি পার্কস্‌তী ।—বাড়ী বসে' ব্রাণ্ডি খাও—বাস্ ! কিন্তু মেয়েমানুষ—জানো না—

What dire offence from amorous causes springs,

What mighty contests rise from trivial things.

[ প্রস্থান ।

পার্কভী। আমি মাথার চুলের ডগা থেকে পায়ের ক'ড়ে আঙ্গুলের নোখ পর্য্যন্ত—পাষাণ ! কি কাজ না ক'র্ত্তে পারি !—চুরি ? যতদূর সম্ভব এ চুরি ! জমীদারী চুরি—ইস্তাহার রদ করে'।—তা সকলেই করে' থাকে। বিষয় ক'র্ত্তে গেলেই ও সব চাই। আসরে নেমে আর ঘোমটা কেন !—আর এদিক ? আমোদও চাই ত।—এর চেয়ে ঢের খারাপ কাজ করেছি। এক দিন—

হিরণ্ময়ীর প্রবেশ।

হিরণ্ময়ী। এই যে !

পার্কভী। [ চমকিয়া ] কে তুমি !

হিরণ্ময়ী। কেন আমি !—চেয়ে দেখ, চিন্তে পারো কি না।

[ প্রদীপ নিজের মুখের কাছে ধরিলেন ]

পার্কভী। [ সবিস্ময়ে ] হিরণ্ময়ী !

হিরণ্ময়ী। চিন্তে পেরেছ ?

পার্কভী। তুমি কোথা থেকে ?

হিরণ্ময়ী। পাগলা গারদ থেকে ?

পার্কভী। পাগলা গারদ থেকে ?

হিরণ্ময়ী। হাঁ পাগলা গারদ থেকে। সেখানে কেন গেলাম

শুনবে ?

পার্কভী। কেন ?

হিরণ্ময়ী। তোমার অসীম অনুকম্পায়। তবে শুনবে ?

পার্কভী। কি ?

হিরণ্ময়ী। তোমার দয়ার কাহিনী ! তার প্রত্যেক অক্ষর থেকে টন্স টন্স করে' রক্ত পড়ছে ; তার প্রত্যেক ছত্র এক একটা শয়তানী।

তবে শোন—তুমি যখন আমায় বিনা খাওয়া, বিনা বসন, সেই নিদারুণ শীতে বিনা একখানি ছেঁড়া কব্বল, সেই ভান্সা কুঁড়ে ঘরে ফেলে এলে, তখনই আমি পাগল হ'য়ে যেতাম; বাই নাই শুদ্ধ বাহার চাঁদমুখখানি পানে চেয়ে। কিন্তু সে গাঢ় অন্ধকারে আমার সে প্রদীপটিও নিভে গেল। বাছা আমার সেই মাঘের শীতে না খেতে পেয়ে মারা গেল। আমি আমার শরীরের উত্তাপ দিয়ে ঘিরে তাকে রক্ষা কর্তাম, বন্ধ নিংড়ে দুধ বা'র করে' তাকে খাওয়াতাম! কিন্তু যে নিজে তিন দিন অনাহারী, তার দেহে উত্তাপ কোথায়? তার স্তনে দুগ্ধ কোথায়? বাছা আমার শীতে না খেতে পেয়ে শুকিয়ে কুঁকড়ে আড়ষ্ট হ'য়ে মারা গেল। [ স্বর কাঁপিতে লাগিল ]

পার্কী। তাতে আমার কি!

হিরণ্ময়ী। তোমার কি!—হাঁ—তা বটে, তাতে তোমার কি!—সে ত আর তোমার সম্ভান নয়। সে যে আমার নয়নের তারা, আমার সাগর-ছেঁচা মাণিক, আমার বুকভরা ধন, আমার সর্বস্ব। [ ক্রন্দন ]

পার্কী। তা কেঁদে কি হবে!

হিরণ্ময়ী। কিছু হবে না। কেঁদে কিছু হবে বলে' লোকে কাঁদে না। কান্না আসে বলে' কাঁদে। আমি কেঁদে তোমার মন গলাতে আসিনি। তোমার আশ্রয় ভিক্ষা ক'র্তে আসিনি। এক দিন ছিল, যে দিন তুমি এক শিশি 'সেন্ট' কিনে এনে দিলে আমি মাথায় করে' নিতাম। কিন্তু আজ তুমি যদি কুবেরের ঐশ্বর্য্য এনে আমার পায়ে ঢেলে দাও, আমি তাতে পদাঘাত করে' চলে' যাই।

পার্কী। তবে এখানে এসেছ কেন?

হিরণ্ময়ী। তোমার কীৰ্ত্তি তোমায় শুনিয়ে পরে ম'র্তে।—



শোন ! যখন দেখলাম—যে আমার বাছা কাঁদে না, নড়ে না, চোখ মেলে না—তখন আমি চীৎকার করে' কেঁদে উঠলাম—এমন চীৎকার করে' কাঁদলাম, যেমন বোধ হয় পৃথিবীতে কেউ কখন কাঁদেনি। কিন্তু কেউ তা শুন্তে পেল না। শীতের কুছাটিকা বোধ হয় পথে সে ক্রন্দনের কণ্ঠরোধ করল। তার পর সেই মৃত শিশু কোলে করে' ছুটে বেরোলাম। ওছট খেয়ে পড়ে' গেলাম। পরে যখন জ্ঞান হ'ল, দেখলাম যে, আমি পুলিশের কবলে, আর আমার মৃত শিশু আমার বক্ষে নাই। তার পর তারা বিচারকর্তার কাছে আমায় নিয়ে গেল। ডাক্তার আমায় পরীক্ষা করল। আমায় কি সব কথা জিজ্ঞাসা করল—বুঝতে পারলাম না। আমি কি জবাব দিলাম—মনে নাই। পরে আমায় তারা একটা বাড়ীতে পাঠিয়ে দিল—শুনলাম সেটা পাগলা গারদ। দশ বৎসর সেখানে বাস করে' পরশু সেখান থেকে বেরিয়ে এসেছি।—এই তোমার কীর্তি।

পার্কতী। সে আমার দোষ নয়।

হিরণ্ময়ী। না তোমার দোষ নয়। সব দোষ এই হতভাগ্য নারীজাতির। সব দোষ আমার ! দোষ আমার যে, আমি তোমায় বিশ্বাস করেছিলাম ; দোষ আমার যে, আমি ধর্ম্য দিয়েছিলাম ; দোষ আমার যে, তোমায় নিদ্রিত পেয়েও হত্যা করিনি !

পার্কতী। কি বলছ উন্মাদিনী !

হিরণ্ময়ী। [ হাসিয়া ] ও ! এখন থেকেই সাফাই তৈরি করছ !— আমি পাগলা গারদের ফের্তা বটে, কিন্তু আমি আর পাগল নই। ডাক্তার পরীক্ষা করে' বলেছে আর আমি পাগল নই, তবে আমায় ছেড়ে দিয়েছে। উন্মাদের প্রলাপ বলে' এমন একটা ভীষণ সত্য, এমন

একটা নিষ্ঠুর পরিত্যাগ, এমন একটা মহা শয়তানী উড়িয়ে দিতে চাও ।  
আশুন কি নেকড়া চাপা থাকে !

পার্কী । [ সাহুনে ] হিরণ্ময়ী !—

হিরণ্ময়ী । ভয় নাই, সে কথা রাষ্ট্র কর্ক না । বিচার হ'য়ে তোমার  
জেল হবে ।—ফুরিয়ে গেল । নিজের কলঙ্কের কথা রাষ্ট্র করে' কি  
হবে ! আমি যদি রাস্তায় দাঁড়িয়ে টেচিয়ে বলি যে, তুমি একটা হৃদয়  
ভেঙ্গে দিয়েছ, একটা জীবন মরুভূমি করেছ, একটা কুলবালাকে মজিয়েছ,  
জগৎ হেসে সে কথা উড়িয়ে দেবে ; বলবে “তুমি নিজের সর্বনাশ  
করেছ,—ওর দোষ কি, ব্যাধের ব্যবসাই ত হত্যা করা ; পুরুষের  
স্বভাবই ত নারীর সর্বনাশ করা ;—তুমি কেন ধরা দিতে গিয়েছিলে !”—  
তোমার কেউ দোষ দিবে না ।—আমার যদি শত জিহ্বা থাকতো, আর  
প্রত্যেক রসনা জয়ভেরীর শব্দে সে কথা প্রকাশ ক'র্তে পার্ত, সংসার  
পাথরের মত স্থির হ'য়ে তা শুন্তো । বাড়ীগুলো ভেঙ্গে পড়ে যেত না,  
গাছগুলো জলে' উঠতো না । সব পূর্ববৎ খাড়া দাঁড়িয়ে থাকতো ।  
কিন্তু তুমি তোমার ভীষণ ভবিষ্যৎ ভেবে শিউরে ওঠো, শিউরে ওঠো,  
শিউরে ওঠো ।

পার্কী । চীৎকার কোরো না ।

হিরণ্ময়ী । চীৎকার কর্ক না !—যদি পার্তাম ত এমন একটা চীৎকার  
কর্তাম যাতে আকাশ চৌচীর হ'য়ে ফেটে যেত, যাতে জগতের সব  
আর্তনাদ একসঙ্গে নিনাদিত হোঁত, যাতে ঈশ্বর কেঁপে উঠতেন । কিন্তু—  
হায় ভগবান ! মানুষের ইচ্ছাকে এত প্রবল, আর শক্তিকে এত  
দুর্বল করেছিলে !

[ গলাটে করাঘাত করিয়া উদ্ভাস্তভাবে দ্রুত প্রস্থান ]

## চতুর্থ দৃশ্য

স্থান—শাস্তার বাসবাটা । কাল—অপরাহ্ন ।

### শাস্তার গীত

আমি,      চেয়ে থাকি দূর সাক্ষ্য গগনে  
                  —ধীরে দিবা হয় অসমান ।  
 আমি      নিভূতে নয়ননীরে করি অভিষিক্ত নৈশ-উপাধান ।  
                  টিষা অনাদরে এসে ফিরে যায়,  
                  লাগে এসে বায়ু বিকারের গায়,  
                  তন্ময়াজড়িত অলস শ্রবণে পশে প্রভাতের পিকগান ।  
 আমি      জানি না কাহারে বলিতে আপন,  
                  তারা, এসে হেসে চলে' যায় ;  
 আমি      অপর কাহার জীবন যাপন  
                  করি যেন এসে বহুধায়—  
 আমি      বেঁচে আছি—নাহি জানি কি' কারণ,  
                  —জীবন শুধুই জীবনধারণ ;  
 আমি      চাপিয়া চক্ষে রাখি আঁখিবারি,  
                  চাপিয়া বক্ষে অপমান ।

### ওস্তাদের প্রবেশ ।

শাস্তা ।      আইয়ে ওস্তাদজি !—মেরা মৈজাজ আজ ঠিক নেহি হায় ।

ওস্তাদ ।      ঠিক নেহি হায় !—কেয়া হুয়া বোটি ?

শাস্তা ।      তবিয়ে আছি নেহি, আওর কুছ নেই । আভি একঠো

ময় বাঙ্গলা গীত কসরৎ করুতি থি ।

ওস্তাদ । বহৎ খুব—লেকেন—

শাস্তা । [ হাসিয়া ] ওস্তাদজি, সব বাতমে একঠো ‘লেকেন’ হোনা চাহিয়েই ।

ওস্তাদ । ওহো ! সমজ গই । লেকেন উয়ো হামরা আদৎ হো গই ।—লেকেন—

[ শাস্তা উচ্চ হাসিল ]

ওস্তাদ । কেয়া মিঠা আওয়াজ ! তোমারা হাসই গীত হয়—আওর কেয়া গীত গায়খি বেটী ।

শাস্তা । উস্ হাস শুন্কে কই রূপেয়া দেগা ওস্তাদজি !

ওস্তাদ । নেই দেনেসে কেয়া হরজ্—

শাস্তা । খানা পিনা চলেগা কেইসে ।

ওস্তাদ । উহ মুস্তিল কি বাত হয় বেশ্খ । লেকেন গীত বেচনেকা চীজ নেহি হয় । গায়গী দিলসে, যো শুনেগা উহ মসগুন্ হোঁ যায়গা । শুল কেয়া গাহক কো ওয়াস্তে রং বেরং হাস্তা হয় বেটী ?

শাস্তা । বহৎ খুব ! আজ সেলাম ওস্তাদজি ।

ওস্তাদ । সেলাম ! কাল আওয়েঙ্গে ?

শাস্তা । বেশখ্ । আদাব !

ওস্তাদ । আদাব !

[ প্রস্থান ।

শাস্তা । সত্য কথা বলেছো ওস্তাদজি—এই গান বেচে খেতে হবে ! আর একটা কথা তুমি বলনি আমার ছুঃখ হবে বলে’—কিন্তু সে কথা ঐ কথার মধ্যেই আছে ।—ছুঃখের ‘সরা ছুঃখ এই যে এই রূপ বেচে খেতে হচ্ছে ! নারীর রূপ—যা ঈশ্বরের শ্রেষ্ঠ দান ; নারীর

রূপ—যা ইন্দ্রধনুর মত সেই অনাদি শুভ্র রূপকে রঞ্জিত করে ;  
নারীর রূপ—যার মহিমায় পৃথিবী মদভরে উঁচু করে' স্বর্গকে বন্দন্যুদ্ভে  
আহ্বান কর্ছে, যেন বল্ছে—দেখাও দেখি এর মত তোমার কি  
আছে ; নারীর রূপ—যার পদতলে সমস্ত বিশ্ব-সৌন্দর্য্য এসে লুটিয়ে  
পড়ে ; যার দিকে চেয়ে শব্দ সঙ্গীতে বেজে ওঠে, ভাষা ছন্দে গেয়ে ওঠে,  
জ্ঞান উন্মাদ হয়, ভক্তি নতজানু হ'য়ে ভুয়ে পড়ে, যে সৌন্দর্য্যের  
কোমল করস্পর্শে পশুও বশ হয় ;—সেই নারীর রূপ বেচে খেতে  
হচ্ছে ! 'ওঃ !—[ বেড়াইতে বেড়াইতে সহসা নিজের প্রতিচ্ছবি প্রকাণ্ড  
আয়নায় দেখিয়া ] ও কে !—না আমারই প্রতিচ্ছবি !—[ নিরীক্ষণ ]  
মহিমাময় ! এ রূপ পুরুষ কামুক ভাবে স্পর্শ ক'র্ত্তে পারে ! এ রূপ  
দেখে পুরুষ সবিস্ময়ে ভক্তিভরে এর পায়ের তলায় এসে লুটিয়ে পড়'বে  
না ? তবু এই রূপ লালসার গ্রাস থেকে রক্ষা করবার জন্য অস্ত্র নিয়ে  
বেরোতে হয় !—আশ্চর্য্য !

দাসীর প্রবেশ ।

শাস্তা । [ চমকিয়া ] কে !

দাসী । গোপাল বাবু এসেছেন ।

শাস্তা । তাড়িয়ে দে ! কুকুর লেলিয়ে দে ।

দাসী । তাড়িয়ে দেবো ?

শাস্তা । হাঁ—নিকালো ! নিকালো !

দাসী । সে কি !—ও কি ! ও রকম কর্ছ কেন !

শাস্তা । না না বা, চল' যেতে বল্ । আমি তার সঙ্গে সাক্ষাৎ  
কর' না ।

প্রথম অঙ্ক]

পরপারে

[ প্রথম দৃশ্য

দাসী। বদি তিনি জিজ্ঞাসা করেন “কেন?”

শাস্তা। উত্তর দিস্ না—আচ্ছা উত্তর দিস্! বলিস্ আমি তাকে  
স্বগা করি—

[ সবেগে প্রস্থান।

দাসী বিশ্বয়ে চলিয়া গেল।

### প্রথম দৃশ্য

স্থান—করুণাময়ীর কুটীর। কাল—রাত্রি

করুণাময়ী ও দয়াল দাঁড়াইয়া কথোপকথন করিতেছিলেন।

করুণা। আমার জীবনের সাধ মিটেছে—ছেলের বো পেয়েছি।  
এখন ম’র্ত্তে পালেই হয়। তারা ব্রহ্মময়ী! পার কর মা!

দয়াল। এত তাড়াতাড়ি কেন।—আরও একটু দেখে যাও।

করুণা। আর দেখতে চাই না তাই!—এর পরে কি হবে কে  
জানে।—দিন থাকতে সরা ভালো।

দয়াল। ঐ যে তোমার গোপাল আসছেন।

মহিমের প্রবেশ।

মহিম। মা!

করুণা। কি বাবা!

দয়াল। কি! আমার পানে চাইছ যে!—ও! বুঝেছি। আমি  
যাচ্ছি।—

[ প্রস্থান।

করুণা । [ মহিমের স্বন্ধে হাত দিয়া ] কি বাবা ! মুখখানা ভার ভার দেখছি যে ! [ সাগ্রহে ] কি হয়েছে বাপ ?

মহিম । মা তুমি বোকে বকেছ ?

করুণা । বোমা কিছু বলেছে না কি ?

মহিম । না—তবে—তুমি বকেছিলে আমি শুনছিলাম ।

করুণা । নিজেই যখন শুনেছ—তখন আর জিজ্ঞাসা করছ কেন বকেছি কি না ? হাঁ বাবা আমি বোমাকে বকেছি ।—সংসারের কাজকর্ম শেখাতে হলে' মাঝে মাঝে ধমক ধামক ছোটো একটা দিতে হয় ।

মহিম । তার কাজ শেখা দরকার কি ?

করুণা । ওমা ! তা নৈলে চলে !—আমি ত আর চিরকাল থাকবো না । একদিন ত এই সংসার তাকেই দেখতে হবে ।

মহিম । যখন হবে তখন দেখা যাবে ।—এখন কি !

করুণা । মেয়েমানুষের ঘরের কাজকর্ম শেখা দরকার—তা এখনই কি আর তখনই কি !—আর আমি বুড় হয়েছি—একাসব পেরে উঠি না ।

মহিম । এতদিন ত পার্ছিলাম !—মা আমি ঘরে বৌ এনেছি, দাসী আনিনি । আমার মরা বৌ কাজ ক'র্তে পারেন না ।

করুণা সবিস্ময়ে কিয়ৎকাল চাহিয়া রহিলেন ; পরে ধীরে ধীরে কহিলেন—“বেশ—তা—আচ্ছা যতদিন বেঁচে থাকি, আমিই করব ।—তোমার বোকে পুতুল সাজিয়ে তুই কোলঙ্গায় তুলে রেখে দিস ।”

মহিম । না, বৌ এখানে আর থাকতে পারেন না । ওর শরীর খারাপ হচ্ছে । তুমি ওকে কিছু দেখ না । তার উপর !—

করুণা । তার উপর—থামলে কেন !—বলে' বাও বাবা ।

মহিম। সত্য কথা বলবে তাতো দোষ কি!—ও বড়মানুষের নাতিনী—কারো চোখরাঙ্গানী কখন সহ করেনি। তুমি যা পারো, ও তা পারে না।

করুণা। ও!—বেশ!—আমি আর তোর বোকে একটা কথাও বলবো না।

মহিম। না—আর তা—ওর—না—ও তার দাদামহাশয়ের বাড়ী চলে' যাবে।

করুণা। ও! তোর দাদাশুকের বাড়ী কলিকাতায়, আর তোর কালেজ কলিকাতায়—তাই!—না?

মহিম। না মা, তার জন্ম নয়।—ও এ পাড়ারগায়ে থাকতে পারেন না।—এ ভান্সা কুঁড়ে ঘরে ও থাকতে পারে না। বিশেষতঃ তুমি ওকে কিছু দেখ না। ও নিজের বাড়ী চলে' যাবে।

করুণা। আর এ ওর পরের বাড়ী!—বেশ!—তা ও যাবে কেন! আমিই যাচ্ছি! আমি, কলীকাস কর্ণ। এত দিন আমার তাই করা উচিত ছিল। তা হ'লে তোর ভালবাসা বুকে করে' মর্ন্তে পার্জাম। মা আমি—আজ একজন পরের মেয়ে এসে আমার মৌরুখী আস্তানা থেকে আমায় তাড়িয়ে দেয়—তাও দেখতে হ'ল! মা দুর্গা! আমি বুড়োবয়সে সংসারে মজে' আছি, সব ভুলেছি, তবু ছেলের চিন্তা ভুলতে পারিনি,—যখন তোমার পায়ে সব ঢেলে দেওয়া উচিত ছিল—তার খুব শাস্তি দিলি মা!—ঘাড় পেতে নিচ্ছি!—আর না। মহিম, আমার কালী যাবার বন্দোবস্ত করে' দাও।

মহিম। বেশ। কালই দেবো।

করুণা। তোর বোকে নিয়ে তুই স্নেহ ঘরকরা কর! আমি শুনেও



সুখী হব। তুই সুখে থাক বাছা। আর কিছু চাই না। তবে মায়ের চেয়ে তোর বৌ বড় হ'ল—এই কথাটা চিরদিন আমার বুকে কাঁটার মত বিঁধে থাকবে।—কোথাকার এক বেহায়া হাঘরে মেয়ে—

মহিম। মা, মুখ সামলে কথা কও। ও হাঘরে মেয়ে না তুমি হাঘরে মেয়ে ?

দয়ালের প্রবেশ।

দয়াল। চোপ'রও বেয়াদব ! মায়ের কথার উপর কথা ! উচ্ছন্ন যেতে বসেছি' হতভাগা !—বেরো বাড়ী থেকে !

মহিম। কার বাড়ী ?

দয়াল। দিদির বাড়ী।—এখনও তোর মা মরেনি জানিস্। যা তুই তাঁর ত্যাজ্যপুত্র। মায়ের কথার উপর কথা !—দিদি ! তোমার ও ত্যাজ্যপুত্র। বা'র করে' দাও বাড়ী থেকে !—দিদি !

করুণা। না না—ও যে ছেলে—ও যে ছেলে ! ছেলেকে কি তা বলতে পারি ! ছেলেকে কি বলতে পারি “ঝেরিয়ে যা বাড়ী থেকে।”—তা কি পারি দয়াল ! আমি যে মা—মা !—বাছা তোর বোকে আমি আর একটা কথা বলবোঁ না। সে আমার বাড়ীর রাজরানী হ'য়ে থাকুক। আমি তাকে দেখ'ব, তার দাসীপনা কর'ব। কেবল তুই আমায় তেমনি ভালোবাস, যেমন এক দিন বাস'তিস্। আমার গলাটি জড়িয়ে তেমনি আদর করে' হেসে মা বলে' ডাক্—যেমন ডাক্'তিস্। বুড়ো হয়েছি। আর ক'দিন ! তার পর আমার একেবারে ভুলে যাস্।—আমি আর চাইতে আস'বো না। তবে যে ক'দিন বেঁচে আছি—তোর মা যেন সেই মা-ই থাকে—বাছা আমার ! [ কাঁপিতে কাঁপিতে মহিমের পায়ের তলায় পড়িয়া গেলেন ]

সরযুর প্রবেশ।

সরযু। ও কি কর্ছ মা ! ও কি কর্ছ !—ছেলের পায়ের তলায় মা।—ওঠো মা, নৈলে পৃথিবী উণ্টে যাবে, হুঁয়া খসে' পড়বে, আকাশ জমাট হ'য়ে যাবে, সমুদ্র শুকিয়ে যাবে, ব্রহ্মাও কেঁপে উঠবে। [মহিমকে]—কি ! অবাক হ'য়ে আমার মুখের পানে চাইছ কি !—ওদিকে চেয়ে দেখ। দেখ, তোমার পায়ের তলায় মা ! [করুণাময়ীকে]—ওঠো মা [উঠাইলেন] অবোধ ছেলের অপরাধ নিও না। [মহিমকে] তবু চুপ করে' দাঁড়িয়ে ! হাত বোড় কর। পা জড়িয়ে ধর—তোমার চোখের জলে মায়ের ঐ রাক্ষ। পা ছ'থানি ধুইয়ে দাও। করেছে কি !

মহিম। মা ক্ষমা কর। [পা জড়াইয়া ধরিলেন]

সরযু। মা তোমার ছেলেকে কোলে নাও। আর—আমি তোমার দাসী। ঘরের কাজকর্ম শিখিনি। শিখিয়ে নিও মা।—আমার অপরাধ ক্ষমা কর। [পদতলে পড়িলেন]

করুণাময়ী। “ওঠ্‌ মল্লী ! যদি রাগের মাথায় কিছু বলে থাকি কিছু মনে করিস্ না মা। বুড় হয়েছি—সব সময়ে সব কথা শুছিয়ে ঠিক করে' বলতে পারি না। বাছা আমার !”—এই বলিয়া করুণাময়ী মহিমকে ও সরযুকে স্বীয় বক্ষে ধারণ করিলেন।

দয়াল। [চক্ষু মুছিতে মুছিতে] হারে মা ! ঈশ্বর কি দিয়ে তোমায় গড়েছিলেন ! এই মানব জীবনের তপ্ত সৈকতে এই মাতৃ-স্নেহের অমৃতসমুদ্র উচ্ছলিত হ'য়ে বাচ্ছে।—মাতুষ্য জ্ঞান কর, পান কর, পবিত্র হও।

# দ্বিতীয় অঙ্ক

## প্রথম দৃশ্য

স্থান—করুণাময়ীর কুটীরকক্ষ । কাল—সন্ধ্যা ।

করুণাময়ী ও দয়াল ।

করুণা । মহিম আমার ঠিক আস্বে । বড়দিনের ছুটিতে বৎসরান্তে  
সে আমার কাছে আস্বে না ? চিরদিন এসেছে । আজ আমার জ্বর  
গুনেও সে আস্বে না ! তা কি হ'তে পারে দয়াল !

দয়াল । কখন কখন চিরদিনের অভ্যাস এক দিনে যায় দিদি !

করুণা । না না । তা কি যায় ! তা কি যায় !

দয়াল । বিশেষতঃ এমন খারাপ অভ্যাস !—মাতৃভক্তি ! মানুষ মদ  
ছাড়তে পারে না ; কুসঙ্গ ছাড়তে পারে না । কিন্তু মাকে এক দিনে  
ছাড়তে পারে ।

করুণা । পারে ? মানুষ তা পারে ! পশু পারে বটে ।

দয়াল । অনেক মানুষ আছে, বাদের আর পশুদের মধ্যে এই তফাৎ  
যে, পশুর চারটে পা আর লেজ আছে, আর মানুষের দুটো পা আর  
লেজ নাই ।

করুণা । তুমি যে বলে সে তোমায় চিঠি লিখেছে যে, সে ১৬ই পৌষ  
৩৬ ]

আসবে। সেই দিন থেকে আমি দিন গুনছি ! আজ ত ১৬ই পৌষ।  
সে নিশ্চয় আসবে।—চিঠি লিখেছে—

দয়াল। চিঠি ত লিখেছে ! কিন্তু সে চিঠির যদি ভঙ্গী দেখতে  
দিদি ! পেন্সিল দিয়ে—হিজিবিজি—পড়া ছকর। যে ঘোড়ায  
চড়ে' লিখেছে—আর সে ঘোড়া তখন যেন শির্পা তুলছে ! তবে  
সে আমার পত্রের উত্তর দিয়েছে বটে। তাই আমার—তোমার—  
পরম সৌভাগ্য।

করুণা। না। মহিম আমার সে রকম ছেলে নয়। মহিম  
আসবে, ঠিক আসবে। আমার প্রাণ বলছে আসবে।

দয়াল। মায়ের প্রাণ অনেক মিছা কথা বলে দিদি !—

করুণা। [ সহসা আগ্রহে ] ঐ বুঝি আসছে।

দয়াল। কৈ ?

করুণা। ঐ গাড়ীর শব্দ শুনছো না ?

দয়াল। শুনছি।—পৃথিবীতে বুঝি মহিমই একা গাড়ী চড়ে।

করুণা। ঐ দেখ দেখ—ঐ গাড়ী।

দয়াল। গাড়ী বটে, সে বিষয়ে সন্দেহ নাই।

করুণা। চূপ্—না—না গাড়ী চলে' গেল।

দয়াল। হা রে মা !

করুণা। বড়দিনের ছুটি হয়েছে ঠিক ?

দয়াল। হাঁ দিদি ! শুধু হয়েছে না, প্রায় ফুরিয়ে এল।

করুণা। তবে—বাছার কোন অশ্লুপ-বিশ্লুথ করেনি ত ?

দয়াল। হা রে মায়ের প্রাণ।

করুণা। আমায় নিয়ে চল দয়াল। আমি তার কাছে যাবো।

দয়াল। কোথায় যাবে ?—বেহাই বাড়ী ? যাও, দেখবে তোমার ছেলে চন্দ্রের সুখা পান করছে, ফুলের হাওয়ায় স্নান করছে। তুমি গিয়ে তার সুখের স্বপ্ন ভঙ্গ করবে। তুমিও মনে ব্যথা পাবে, সেও মনে ব্যথা পাবে।

করুণা। সে ছুটিতে তার মাকে ছেড়ে তার দাদাস্বশুরের বাড়ী গিয়েছে ! এ কি হ'তে পারে !

দয়াল। যাও গিয়ে দেখ !

করুণা। তুমি তাকে জানো না। আমি তাকে জানি। আমি তাকে গর্ভে ধরেছি। সে তেমন ছেলে নয়।

দয়াল। ঈশ্বর কি দিয়ে এই মা তৈরী করেছিলে ! দিদি ! দাওয়ায় বসে' পথপানে চেয়ে থাকলেই কি সে আসবে ? ঘরের ভিতরে যাও। হিম পড়ছে। তোমার অর হয়েছে। আজ একাদশী করেছে। হিম লাগিও না।

করুণা। [ উঠিয়া ] এই যাচ্ছি ভাই।

দয়াল। আমি তবে আসি দিদি ! কাল সকালে আবার আসবো !—  
অর ঠাণ্ডা লাগিও না, সন্ধ্যা হ'য়ে এল ! [ প্রস্থান।

করুণা। আমারও সন্ধ্যা হ'য়ে এলো !—তারা ব্রহ্মময়ী !—তবে সত্যই কি বাছা এলো না ! সত্যই কি—এ কি গলা ধরে' আসে কেন ! চোখে অন্ধকার দেখি কেন !—না সে আসবে !—সে আসবে ! এ কি হ'তে পারে ! ছেলে ত ! না আমি আজ সারারাত এই দাওয়ায় বসে' তার পথ চেয়ে থাকবো ! সে আসবে।—আর যদি না আসে—ঐ যে মা বলে' ডাকলো না ? এই যে আমি, বাছা আমার !  
[ দৌড়িয়া বাহিরে বাইতে উত্তত ]

বৃদ্ধ ভিখারীর প্রবেশ ।

ভিখারী । আজ রাতে একটু থাকবার ঠাই পাই মা !

করণা । ওঃ !—[ ছই হস্তে মুখ ঢাকিলেন ] । এসো বাছা !

## দ্বিতীয় দৃশ্য

স্থান—পার্কতীর বহিঃকক্ষ । কাল—প্রভাত ।

পার্কতী ও চারু ।

পার্কতী । নিলাম আজই ?

চারু । হাঁ আজই ।

পার্কতী । আঃ ! ৫০০০ টাকা কোথাও পেলেন না ? ঠিক এই সময়ে আমার টাকা হাতে নাই । তুমি আর একবার যাও । না পাও, ব্যাঙ্ক থেকে টাকা ধার কর্তে হবে ! যাও—

চারু । আচ্ছা যাচ্ছি । একটা কাজ করব ।

পার্কতী । কি ?

চারু । মন্দ কি !—ঐ বার শিল বার নোড়া তারই ভাস্কি দাঁতের গোড়া । [ হাস্য ও প্রস্থান ।

পার্কতী । কি মতলব এটেছে !—অত হাসে কেন !—এই যে পরেশ আর কালীচরণ ।

পরেশ ও কালীচরণের প্রবেশ ।

পার্কতী । কি পরেশ বাবু ! ইঠাৎ যে এ দীনের বাড়ীতে পদার্পণ ?

পবেশ। এই কালীবাবুর সঙ্গে বেড়াতে বেড়াতে ভুলে এসেছি।  
যাই। [ প্রস্থানোত্তত ]

পার্কর্তী। আরে যাবে কেন! বোস!—বলি এখন তোমাদের  
বিশ্বেশ্বরের সংবাদ কি! এখনও কি বিশ্বশুদ্ধ তাঁর গুণগান কর্ছে?

পরেশ। কর্ছে বৈ কি পার্কর্তীবাবু!

পার্কর্তী। এখনও তিনি ছহাতে গরীব ছহীকে বিলোচ্ছেন?

পরেশ। বিলোচ্ছেন বৈ কি।

পার্কর্তী। কি বিলোচ্ছেন?

পরেশ। খুদ কুঁড়ো।

পার্কর্তী হাসিলেন।

কালী। পার্কর্তী! তোমার খুব আনন্দ হচ্ছে?

পরেশ। না, আনন্দ নয়। তবে বিশ্বেশ্বরের ড্যামাক দেখে  
অবাক হচ্ছিলাম। আজ তাঁর বিষদাঁত ভেঙ্গেছে এই বল্ছিলাম—  
আর কিছু নয়।

পরেশ। পার্কর্তীবাবু! এই বিশ্বেশ্বরবাবুর অনেক দোষ থাকতে  
পারে, কিন্তু ড্যামাক ত দেখি নি।—মাটির মানুষ।

পার্কর্তী। মাটির মানুষ!—ড্যামকে মাটিতে তাঁর পা পড়ে না।

পরেশ। সে কি পার্কর্তীবাবু! তিনি রাস্তা দিয়ে ত হেঁটেই  
যান—অথচ তাঁর এমন টাকা এখনও আছে যে, তিনি চৌষুড়ি চালাতে  
পারেন।—কি! হাসছেন যে!

পার্কর্তী। তিনি হেঁটে যান বটে—কিন্তু মাথা উঁচু করে'।  
আশেপাশে আমাদের দিকে ফিরে দেখবারও তাঁর অবকাশ হয় না।  
তিনি আমাদের স্বপ্না করেন।

পরেশ । তিনি সংসারের কাউকে ঘৃণা করেন না—তোমাকেও না ।  
নইলে, যে পাপিষ্ঠ, যার হাতছাখানি দীনহুঃখীর রক্তে মাখা, যে ইস্তাহার  
গাপ করে' ছলে জমীদারী চুরি করে—

পার্কীতী । কে বলে ?

পরেশ । আমি বলি ।

পার্কীতী । তুমি আমার দুর্নাম করছ ।

পরেশ । করছি । তোমার যা সাধ্য হয়, কর ।

পার্কীতী । আমি তোমায় জেলে দেব !

পরেশ । ঈস্ !—জেলে দেওয়া তোমার মুঠোর মধ্যে কি না !—  
জেলে দেবে—দাও না ।

পার্কীতী । তুমি আমায় অপমান করেছে—এই কালীবাবুর  
কাছে ।

পরেশ । দরকার হয় ত হাটে এ কথা চাঁচিয়ে বলতে পারি !  
তাই চাও ?

কালী । Tell it not in Gath ; publish it not in the  
streets of Askelon.

পার্কীতী । এই কথা তুমি বলতে পারো যে আমি প্রতারক ?

পরেশ । প্রতারক ! তোমার যোগ্য বিশেষণ অভিধানে খুঁজে  
পাই না । চোর, লম্পট, ধাঙ্গাবাজ, অভিধানে অনেক কথা আছে । কিন্তু  
সব শব্দগুলি এক কর্লেও তোমার ঠিক বর্ণনা হয় না । যতই বলি না  
কেন, কিছু বাকি থেকে যায় । যতই নামি না কেন, তোমার নাগাল  
ধর্তে পারি না । যতই মাপি না, কেন, তোমার অন্ত পাই না ।  
ইতিহাসে তোমার মত চরিত্র পড়ি নি । সংসার খুঁজে তোমার জুড়ি



মেলে না। তুমি একটা অনিয়ম, তুমি একটা অপচার, তুমি একটা ব্যাধি, তুমি একটা আবর্জনা।

পার্কী। শুনছো কালী! তোমায় সাক্ষী দিতে হবে।  
[ পরেশকে ] তোমায় জেলে না দিই ত আমার নাম পার্কীচরণ ঘোষ নয়।

পরেশ। এর জন্ত জেলে যেতে হয়, আমি প্রস্তুত। তোমাকে পাজি না বলার চেয়ে জেলে যাওয়া অনেক সোজা [ প্রস্থান।

কালী। পার্কী হেরে গেলে।

পার্কী। হেরে যাবো কেন!

কালী। ‘বাবে কেন’ নয়। গিয়েছো। অতীত। এর চেয়ে সহজ, সরল, সংস্কৃত, পরিষ্কার গালাগালি—বান্দালা হিন্দিতে মিশিয়ে—এর আগে আমি শুনি নি। আর এমন নির্ভয়ে বলে’ গেল!—এই ত চাই—

who dares think one thing and another tell

My heart detests him as the gates of hell.

কিন্তু এ ব্যক্তি একেবারে অকুতোভয়ে বলে’ গেল।

পার্কী। কি রকম!

কালী। গালাগালির কোন জায়গাটা বুঝতে কষ্ট হ’ল না। বেশ দ্রুত বলে’ গেল। কোন জায়গায় বাধল না। বলতে বলতে একবার কাসলেও না। তা হ’লেও না হয় বুঝ্তাম ভয় খাচ্ছে। তার পরে মাঝে মাঝে উৎপ্রেক্ষা দিয়ে গেল—বোধ হ’ল, গালাগালি দিচ্ছে আর সঙ্গে সঙ্গে সেটা বেশ উপভোগ কচ্ছে! আর শেষে বা বল্ল, এত জোরালো গালাগালি পূর্বে কেউ কখন কাউকে দেয় নি।

পার্কী। কি গালাগালি?

কালী। যে তোমাকে পাজি না বলার চেয়ে জেলে যাওয়া অনেক সোজা। I would rather go to hell than not call you a villain—কে বলেছে?—রোস মনে করি। অত্যন্ত মৌলিক!—চমৎকার!

পার্কী। তুমি এটা বেশ উপভোগ করছ! কোথায় চটবে—

কালী। চটুতাম যদি পরেশ কোন অল্লীল বা সামান্য বা ছোট লোকের মত গালাগালি দিত। কিন্তু এমন সভ্য সরস প্রাজ্ঞল অথচ জোরালো—ওঃ! কেয়াবাং!—আমি এক দিন নিমন্ত্ৰণ করে' থাওয়ানো।

পার্কী। কাকে?

কালী। পরশকে। এই রবিবারে দুপুর বেলা। তোমারও নিমন্ত্ৰণ রৈল। ঐ গালাগালিটা আর একবার শুনো—যতদূর মনে থাকে।—কেয়াবাং। ঐ বিস্বেশ্বর বাবু আসছেন। পালাই। Ye cannot serve both God and Mammon.

[ প্রস্থান।

পার্কী। তবু বিস্বেশ্বর বাবুর প্রশংসা এদের মুখে ধরে না!—কিন্তু বিস্বেশ্বর আজ আমার বাড়ীতে! জাস্তে শেরেছে নাকি! নিশ্চয় আমার পায়ের ধর্তে এসেছে। এস ত চাঁদ!—আমি ছাড়'চিনে।

ভবানীপ্রসাদ ও বিস্বেশ্বরের প্রবেশ।

বিস্বেশ্বর। পার্কী! এই নাও টাকা।—দাও ত ভবানীপ্রসাদ।

পার্কী। টাকা কিসের? [ ভবানীপ্রসাদ টাকা দিলেন ] কত?

বিস্বেশ্বর। ৫০০০ টাকা।—যখন পারো শোধ দিও।

পার্কী। [ সবিস্ময়ে ] টাকা! কেন!

বিস্বেশ্বর। শুনলাম যে, তোমার দরকার হয়েছে।—নাও।

পার্কর্তী । এর সুদ ?

বিশ্বেশ্বর । সুদ আবার কি ! শুন্‌লাম তোমার দরকার হয়েছে । নাও । আবার আমার বখন দরকার হবে, দিও । এই ত চাই । সুদ আবার কি ! আমার উপর বিরক্ত হ'য়ে না । আমায় ঘৃণা কোরো না । আমায় ভালোবাসো, ভালোবাসো । পার্কর্তী ! ভাই !

[ আলিঙ্গন করিতে উদ্যত ]

পার্কর্তী । এর দলিল ?

বিশ্বেশ্বর । তার কিছু প্রয়োজন নাই । আমি তোমায় বিশ্বাস করি । বিশ্বাসেই মোক্ষ । বিশ্বাসেই মুক্তি । বিশ্বাসেই সংসার চলেছে । অবিশ্বাসেই ধ্বংস । অবিশ্বাসেই নরক । পাচক :ব্রাহ্মণ ত খাচ্ছে বিষ দিতে পারে । ভৃত্য পিছন :দিব্ থেকে পিঠে ছোরা বসাতে পারে । তাদের বিশ্বাস করে' চলেছি । আর তুমি ভদ্ৰব্যক্তি, তোমাকে বিশ্বাস কর্তে পারিনে ? টাকা ফেরত দিতে না চাও, দিও না । বিনিময়ে শুদ্ধ আমায় ভালোবাসো, ভালোবাসো ।—চল, ভবানীপ্রসাদ ! কি চোখ মুছ'ছ যে ।

ভবানী । আজ্ঞে না । তবে একটা গল্প মনে পড়'ল ।

বিশ্বেশ্বর । পড়'ল না কি ?—কি গল্প ?

ভবানী । একদিন একটা ভেড়া নারায়ণের কাছে গিয়েছিল জানেন !

বিশ্বেশ্বর । গিয়েছিল না কি ? কেন ?

ভবানী । নালিস কর্তে । গিয়ে বল্লে 'বিষ্ঠু মহাশয়, বাঘ আমাকে পেলেই খায় । আপনি তার একটা প্রতিকার করুন ।'

বিশ্বেশ্বর । নারায়ণ তাতে কি জবাব দিলেন ?

ভবানী। তিনি এই বলেন ‘বাগুহে! পালাও; তোমার সূচিকণ নধর শরীর দেখে আমারই খেতে ইচ্ছে হচ্ছে—তা বাঘ। তোমায় খাবার জন্তই ত ব্রহ্মা সৃষ্টি করেছিলেন। নৈলে অন্ততঃ সভ্যরকম ছোটো শিং দিতেন, কিম্বা ভদ্ররকম চারটে পা দিতেন।’

বিশ্বেশ্বর। হাঃ হাঃ হাঃ—

ভবানী। পার্কতীবাবু এ টাকা কেন চান, তা আপনি জানেন!

বিশ্বেশ্বর। দরকার কি! তাঁর টাকার দরকার হয়েছে—তাই যথেষ্ট।

ভবানী। তবু শুনে রাখুন। পার্কতীবাবু এই টাকা দিয়ে ইত্তাহার ‘রদ করে’ আপনারই একটা তালুক কিনবেন। তালুক নিলামে উঠেছে।

বিশ্বেশ্বর। উঠেছে না কি!

ভবানী। আপনি তাঁর হাতে একখানি ছুরি দিয়ে গলা বাড়িয়ে দিয়ে বলছেন—বড় সুড় সুড় কচ্ছে।

বিশ্বেশ্বর। তা কি হ’তে পারে ভবানী!—ছিঃ অমন কথা বোলো না।—মানুষ ত।

ভবানী। আজকাল মানুষে মানুষ খায়। রাক্ষসের আর দরকার নাই। তাই তারা প্রস্থান করেছে।—দাদামহাশয়! খোলা সিঁদুক পেলে সাধু চোর হয়। পার্কতীবাবুর কোন দোষ নাই।

বিশ্বেশ্বর। ছি ছি ছি বোলো না। তা কি হয় ভবানী। আর তাই যদি হয়—পার্কতী! আমার জমিদারী নাও, আমার সর্বস্ব নাও, শুধু আমার ভালোবাসো, ভালোবাসো।

ভবানী। দাদামহাশয় !—আমি না ব'লে থাকতে পারছি না।  
মা কালী ! এই পাপকলিযুগেও এ রকম মানুষ হয় !—পার্কতীবাবু  
কেনো, এর পরে এঁর টাকায়ই এঁর জমীদারী কিন্তে চাও, পারো,  
কেনো।—আসুন দাদামহাশয়।

বিশ্বেশ্বর। চল ভাই।—পার্কতী আমায় ভালোবাসে। আমায়  
স্বপ্না কোরো না ভাই [ আলিঙ্গনোত্তত ]

ভবানী। চলে' আসুন। কোলাকুলি হয় শেয়ানে শেয়ানে। অস্ত  
কোলাকুলি কুলিযুগে—ভণ্ডামি !—আসুন। [ উভয়ের প্রস্থান। ]

পার্কতী। এ কি !—চোখে জল আসে কেন। না আমি পাষাণ !  
কি কাজ না করেছি, কি কাজ না কর্তে পারি ! এ তুচ্ছ !—বিশ্বেশ্বর !  
তুমি আমার মন গলাবে ! এত অসার আমি নই। [ হস্ত ও প্রস্থান। ]

## তৃতীয় দৃশ্য

স্থান—করুণাময়ীর কুটীরকক্ষ। কাল—শেষরাত্রি।

করুণাময়ী মৃত্যুশয্যায়। পার্শ্বে দয়াল।

করুণা। হুর্গানাম কর, হুর্গানাম কর। শুস্তে শুস্তে মরি।

দয়াল। কেন দিদি ! কবিরাজ বলে' গিয়েছে, কোন ভয় নাই।

করুণা। কবিরাজ ঠিক বলে' গিয়েছে, আমার কোন ভয় নাই।  
আমি কারো অনিষ্ট করি নি। যা উচিত বুঝেছি, করে' গিয়েছি। মা  
হুর্গা চরণে স্থান দেবেনই। আমার আবার ভয় !

দয়াল। না আমি বলছি যে তুমি সেরে উঠবে দিদি।

করুণা। আমি সেরে উঠতে আর চাই না ভাই। কিসের জন্ত চাচ্চো চাইব! তিনকুড়ি বয়স হয়েছে। জীবনে দুঃখ বৈ আর কিছু পাই নি। পাঁচ ছেলের মা হয়েছিলাম! চারিটা গিয়েছে। একটি আছে; তা সে থেকেও নেই। আর কি স্নেহে বেঁচে থাকতে চাইব!

দয়াল। মহিম আসবে। ভেবো না। সে এতক্ষণ পথে।

করুণা। [সদীর্ঘনিশ্বাস] আমিও পথে।

দয়াল। আমি বলছি যে, সে আসবে। আমি কি মিছে বলছি। সে দিন বলেছিলাম, সে আসবে না, সে আসে নি। আজ বলছি, সে আসবে, 'সে আসবেই। মায়ের পীড়া শুনে কি সে বসে' থাকতে পারে!

করুণা। আসবে? আসবে? কখন?—আর কখন আসবে! মর্ক্যার আগে একবার সেই চাঁদমুখখানি দেখতাম। দেখতে পেলাম না।

দয়াল। ও সব ক্লি কথা বলছ! ছি দিদি!

করুণা। হায় রে মর্ক্যার সময়ও তারই কথা বারবার মনে হচ্ছে! কোথায় মায়ের নাম কর্ক—হুর্গানাম কর। 'হুর্গানাম কর। ছেলে কে! কেউ না। আমার ছেলে নাই, কখন ছিল না। দয়াময়ি! এ অস্তিমকালে চরণে স্থান দিও মা। এ অন্ধকারে ছেড়ো না!—ভাই! সত্যই কি মহিম আমার এলো না!

দয়াল। আসছে। ব্যস্ত হও কেন দিদি! ঘুমোও।

করুণা। এই যে একেবারেই ঘুমোচ্ছি! ভাই, আমি মরে' যাওয়ার পর মহিম যদি আসে, তা হ'লে তাকে বোলো যে, আমি স্নেহে মরেছি, কোন কষ্ট হয় নি। সে এসে যদি কাঁদে, ত তাকে বুঝিও—বুঝিও যে

আমার মর্য্যার সময় কোন কষ্ট হয় নি । শুধু একবার মরণকালে তাকে দেখতে চেয়েছিলাম ।—না সে কথা বলে' কাজ নেই । বাছা ছুঃখ কর্কে ! বোলো, আমি স্মৃতে মরেছি । আর কিছু না । আর যদি সে না আসে—[ কণ্ঠরুদ্ধ হইল ]

দয়াল । হারে মা !—দিদি মহিম আসছে । আজ রাত্রে মধ্যাহ্ন আসবে । বোধ হয় প্রথম ট্রেন ফেল হয়েছে ।

করুণা । আসবে ? আসবে ? সত্য বলছ ? সে আসবে ? ভাই বল সে আসবে ? সত্য হোক মিথ্যা হোক, বল সে আসবে । সেই বিশ্বাস নিয়ে আমি পরকালে যাই !—না সে আসবে না, আসবে না ।  
[ মুখ ফিরাইলেন ।

দয়াল । ঘুমাও দিদি !

করুণা । এই যে ঘুমোচ্ছি ।—তবে মহিম এলো না ! আমি তার বোকে বকেছিলাম, সেই অভিমানে বাছা চ'লে গিয়েছে ; আর আসবে না—ঐ পাখী ডাকলো না ?—ঐ বে !

দয়াল । হাঁ দিদি ।

করুণা । তবে ভোর হয়েছে ?

দয়াল । ভোর হ'ল বৈ কি ।

করুণা । তুমি সমস্ত রাত ঘুমোও নি ?

দয়াল । ঘুমিয়েছি বৈ কি ।

করুণা । না ঘুমোও নি । তুমি পারারাত আমার শিওরে বসে' আছো । আমি যখনই চোখ মেলেছি, দেখেছি যে, তোমার ঐ কালীবর্ণ মুখখানি—ঐ স্নেহময় চক্ষু দুটি আমার পানে চেয়ে আছে । দয়াল ঘুমোও গে যাও ।

দয়াল। আমি ঘুমিয়েছি দিদি।

করুণা। ঐ পাখী ডাকছে।—দয়াল! জানালাটা খুলে দাও ত ভাই। একবার আমার ধানভরা ক্ষেত, আমার গানভরা বাগান, একবার—শেষবার প্রাণ ভরে’ দেখে নিই। আর ত দেখতে পাবো না। খুলে দাও।

[ দয়াল জানালা খুলিয়া দিলেন ]

করুণা। ঐ সেই সব! এখনও জাগে নি! সব ঘুমিয়ে আছে। ওরে তোরা জাগ্। চেয়ে দেখ্ আমি যাচ্ছি, জন্মের মত তোদের ছেড়ে যাচ্ছি। দেখ্।—দয়াল!

দয়াল। দিদি!

করুণা। একবার বাইরে যাও ত ভাই, আমার গাইটাকে একবার দেখুবো। তার বাচ্চুর হয়েছে। আমি দেখুবো।

দয়াল। পরে দেখো।

করুণা। না দয়াল! পরে দেখবার আর অবকাশ হবে না। যাও ভাই!

[ দয়ালের প্রস্থান।

করুণা। ঐ হাস্যাবে আমায় ডাকছে। রোজ নিজের হাতে করে’ তার খাবার দিতাম। এক দিন যদি দৈবাৎ না দিতে পার্তাম, ত সে ভালো করে’ খেত না; সারাদিন মুখ ভার করে’ থাকতো। আমার মুখ স্নান দেখলে তার চোখে জল আসতো!—ঐ আবার ডাকছে।—এই যে আমি—ধবলী!—এই যে!—

দয়াল। [ নেপথ্যে ] এই যে দিদি এনেছি, দেখ।

করুণা। ঐ যে আমার গাই!—ধবলী! চল্লাম মা!—এখান থেকে



দয়াল তোমায় দেখবে। দয়াল—ভাই—আর—শেষ হ'য়ে এলো ! মা  
হুর্গা !—মহিম তবে সত্যই এলো না। হু—র্গা— [ মৃত্যু ]

দয়ালের প্রবেশ।

দয়াল। দিদি দিদি—দীপ নিভে গিয়েছে !—একটা বুদ্ধদ সমুদ্রে  
মিশে গেল। একটা শিশিরবিন্দু পদ্মপত্র থেকে ঝরে' পড়ে' গেল।  
একটা সামগান উঠে আকাশে মিলিয়ে গেল।—যাও দিদি, পরপারে ;  
যেখানে সব 'মা' জগন্মাতার কোলে শুয়ে আছে। পুত্রকন্যা নিষ্ঠুর।  
তাদের ভুলে যাও, মায়ের গলা জড়িয়ে ধর। শান্তি পাবে।—মা !—  
মেয়েকে কোলে তুলে নাও।

—

## চতুর্থ দৃশ্য

স্থান—বিশ্বেশ্বরের প্রাসাদকক্ষ। কাল-জ্যোৎস্না রাত্রি।

বিশ্বেশ্বর ও সরযুর প্রবেশ।

বিশ্বেশ্বর। কি রকম নাতিনী ! কেমন লাগছে ?

সরযু। কি ?

বিশ্বেশ্বর। জীবনটা ! বেশ মধুময় ঠেকে না !—যেন একটা  
অবাধ বসন্ত, অগাধ জ্যোৎস্না ! আমাদের আর গ্রাহের মধ্যেই বোধ  
হচ্ছে না—কেমন !

সরযু। কি রকম ?

বিশ্বেশ্বর। এই যখন কেউ ফেটিন হাঁকিয়ে যায় তার মত ! আশে-  
পাশে যারা হেঁটে যাচ্ছে তারা যেন অত্যন্ত ছোট লোক।

সরযু। কে বলেছে ?

বিশ্বেশ্বর। তুই।

সরযু। কখন বললাম !

বিশ্বেশ্বর। আরে সব কথাই কি মুখে বলতে হয় ! চোখে চোখেও অনেক কথা চলে।

সরযু। চলে না কি !

বিশ্বেশ্বর। চলে না !—ওমা !—নূতন বৌ গুরুজনের দৃষ্টিজালের মাঝখান দিয়ে ঘোমটার ভেতর থেকে নূতন স্বামীর পানে চেয়ে নেয়—অমনি চোখে চোখে কতখানি কথাবার্তা হ'য়ে গেল বল দেখি।

সরযু। কি কথা ?

বিশ্বেশ্বর। সে কথার অর্থ এই যে, এরা সব শুধু ভবঘোরে ঘুরে মর্ছে, তাদের মধ্যে মজা লুটছি যা, সে—তুমি আর আমি।

সরযু। কখন না।

বিশ্বেশ্বর। আরে চুটিস্ কেন দিদি ! আমি সব জানি। আমি চিরদিনই কিছু এমনই ছিলাম না। আমারও একদিন ছিল। তখন—‘মিলনে নিখিলহারা বিরহে নিখিলময়।’—যেদিন ফুলের মধু পান কর্তাম, সুবাসিত বসন্তপবনহিল্লোলে গা ঢেলে দিতাম। তুই এখন সেই রকম কিনা।—নে, মিথ্যার রাজস্ব ভালো করে' ভোগ করে' নে। শীঘ্রই এ স্বপ্ন ভেঙ্গে যাবে।

সরযু। যাবে নাকি ?—আমার যে ভয় কর্ছে দাদামহাশয়।

বিশ্বেশ্বর। তার দেরি আছে।—আমার প্রেমের ইতিহাস শুনিস্ নি ?

সরযু। না। শোনা যাক্ দেখি আপনার প্রেমের কাহিনীটা !

বিশ্বেশ্বর । আচ্ছা তবে শোন্ । আর তার সঙ্গে—তোরটা মিলিয়ে নিন্স । শোন্ !—প্রথম প্রণয়ে চন্দ্রালোকে—অর্থাৎ ছাদের উপর যখন আমরা দুজনে একা থাকতাম, তখন আমি একবার সেই শ্রীমুখের পানে আর একবার চাদের পানে চেয়ে দেখতাম—কোনটা বেশী সুন্দর ঠিক করে' উঠতে পার্ভাম না ।

সরষু । আর তিনি দেখতেন না ?

বিশ্বেশ্বর । কে ?

সরষু । দিদিমা ?

বিশ্বেশ্বর । তিনি !—ও বাবা !—আর কোন দিকে চাইবার তাঁর অবসর ছিল না । কিন্তু প্রেয়সী দেখতেন যে কি, সেইটে বুঝতে পার্ভাম না ।—আমার ঘোঁফের ঝোপ, না চোখের ডোবা, না নাকের বাঁধ, না দাড়ির চষা ধানক্ষেত্র ( কেননা একদিন না কামালেই সেটা নূতন চষা ধানক্ষেত্রের আকার ধারণ কর্ত ) । প্রেয়সী যখন আদর করে' আমার সেই শ্রীমুখে হাত বুলাতেন, তখন সেই চষা ক্ষেত্রের উপর দিয়ে যেন কেউ মই দিয়ে যেত ।—এই চেহারাখানা দেখ্ছিন্স ।

সরষু । দেখ্ছি ।

বিশ্বেশ্বর । কেমন চেহারা ?

সরষু । বেশ চেহারা ।

বিশ্বেশ্বর । এঃ ! তবে তুই নিশ্চয় আমার সঙ্গে প্রেমে পড়েছিন্স । প্রেমে না পড়লে এ চেহারাখানা যে চলনসই তা কেউ বলবে না । অনেকেই আমাকে বাড়ীর চাকর ভেবে তামাক সাজতে বলতো ; আমি তাই রেগে এম্নি বাগিয়ে টেড়ি কাট্‌তাম যে, চেহারাখানাকে প্রায় ভদ্রলোকের মত করে' তুলেছিলাম আর কি ! এই দেখেই প্রেয়সী মুগ্ধ !—মিল্ছে ?

সরযু। তার পরে ?

বিশ্বেশ্বর। বলি—মিলছে ?

সরযু। কতক। তার পরে !

বিশ্বেশ্বর। আমাদের মনে হোত যে, পৃথিবীতে আর কেউ নাই—  
যা নাই, ভাই নাই, বন্ধু নাই, আছে কেবল ‘প্রাণেশ্বর’ আর  
‘প্রাণেশ্বরী’।—মিলছে ?

সরযু। তার পর ?

বিশ্বেশ্বর। আমাদের গল্প আর ফুরোতো না। আমি যদি বলতাম  
যে, আমাদের ক্লাসে এক ছাত্র আছে তার নাম ‘মহেন্দ্র’, প্রেয়সী তার  
মধ্যে একটা রসিকতা অনুভব করে’ হেসে আকুল ! আর তিনি যদি  
বলতেন যে, তাঁর ‘আতরকে’ একদিন একটা ফড়িঙ্গে কামড়েছিল, আমি  
হেসে মাটিতে গড়িয়ে পড়তাম।

সরযু। কথাবার্তা কি রকম চলতো ?

বিশ্বেশ্বর। প্রথমে দুই অক্ষর। আমি বলতাম ‘প্রিয়ে’ তিনি  
বলতেন ‘নাথ’। তার পর তিন অক্ষরে উঠতাম। আমি বলতাম  
‘প্রেয়সী’ তিনি বলতেন ‘বল্লভ’। তার পরে চার অক্ষর। আমি  
বলতাম ‘প্রাণেশ্বরী’ আর তিনি বলতেন ‘প্রাণেশ্বর’। তার পরে—  
পুনিয়ে পড়তাম।

সরযু। আচ্ছা ! বিরহে কি রকম হোত ?

বিশ্বেশ্বর। রোজ একখানা ক’রে চিঠি।

সরযু। কি লিখতেন ?

বিশ্বেশ্বর। মাথামুণ্ড ! ‘তুমি ভালোবাস না আমি ভালোবাসি’  
পাকে চক্রে ঐ একই কথা।

সরযু। তার পরে ?

বিশ্বেশ্বর। তার পরে আবার কি ! তার পরে তুই বল্ ।

সরযু। আচ্ছা ! তার পর আমি বলছি ! শুনে যান ।

বিশ্বেশ্বর। আচ্ছা বল্ । তুই তবে এই জায়গায় দাঁড়া, আর আমি ঐ জায়গায় দাঁড়াই ।

সরযু। কেন ?

বিশ্বেশ্বর। এখন তুই বক্তা, আর আমি শ্রোতা ।

[ উভয়ে স্থান পরিবর্তন করিলেন ]

সরযু। আচ্ছা—এখন শুনুন ।

বিশ্বেশ্বর। শুনছি—

সরযু। তার পরে অবস্থাটা কি রকম দাঁড়ালো জানেন ?

বিশ্বেশ্বর। কি রকম ?

সরযু। আপনার বাড়ী ফিরতে দেবী হ'লে দিদিমার মেজাজটি ঠিক নবনীৰ মন মোলায়েম ঠেকত না । আর দিদিমার রান্না খাৰাপ হ'লে আপনার গলা ঠিক ইমনকল্যাণ ভাঁজত না ।

বিশ্বেশ্বর। তা ভাঁজত না ।—তার পরে ?

সরযু। বাহির বাড়ী আর ভিতর বাড়ী যে আলাদা জাবগা, সেটা বেশ বোঝা যেতে লাগল ।

বিশ্বেশ্বর। তা লাগল । তার পরে ?

সরযু। তাব পর যে অবস্থা দাঁড়ালো—সে ভয়ানক !

বিশ্বেশ্বর। [ সাগ্রহে ] কি রকম !

সরযু। আপনি—অর্থাৎ প্রাণনাথ বাড়ীর কাছে একটা আড্ডা খুঁজে নিলেন—যাতে প্রাণনাথের কথাবার্তা প্রেমসীর শ্রবণগোচর না  
৫৪ ]

হয়—অথচ ভাত হ'লেই চট্ করে' প্রাণনাথকে ডাকা যায়। রাত্রিকালে গহনার ফর্দ দিতে দিতে প্রেয়সীর নাসিকাধ্বনি ; সংসারের ঝঙ্কাটেব তালিকা দিতে দিতে প্রাণনাথের নির্ঝাণ-প্রাপ্তি ; যবনিকা পতন ; মশকের ঐক্যতান বাদন !—কেমন !—মিলছে কি না !—

বিশ্বেশ্বর। ওরে ! ঠিক মিলছে !—তুই এসব জানলি কেমন করে' ?

সরযু। কল্পনায়। আপনার ত কল্পনাশক্তি নেই !

বিশ্বেশ্বর। কল্পনাশক্তি অত নেই।

সরযু। তার পর শুনুন—তখনকার অবস্থার সঙ্গে ঋতুরাজ বসন্তের কোন সাদৃশ্যই লক্ষিত হোত না। বরং বর্ষার সঙ্গে কতক সাদৃশ্য ছিল।

বিশ্বেশ্বর। বর্ষার সঙ্গে ?

সরযু। অন্ততঃ তার সঙ্গে গর্জ্জন বর্ষণ আর বিদ্যুৎ যথেষ্ট পরিমাণে ছিল—মিলছে কিনা ?

বিশ্বেশ্বর। ওরে, অক্ষরে অক্ষরে মিলছে।—ঐ যে তোর' প্রাণেশ্বর দূরে ক্ষুধার্ত্ত ভিক্ষুকের মত চেয়ে আছে। ও চাহনির অর্থ—'সরে' বা না বুড়ো'—এই আমি যাচ্ছি— [ প্রস্থানোত্তম ]

সরযু। যাবেন কেন !

বিশ্বেশ্বর। না না, নৈলে তোর প্রাণেশ্বর চটে' যাবে।

সরযু। না চটে'বেন কেন !

বিশ্বেশ্বর। আমি থাকলে 'প্রেয়সী' সম্বোধনটা মুখ দিয়ে বেরোতে তোর প্রাণেশ্বরের ঠোঁটে বেধে যাবে ;—ঠিক, সে রকম করে' হাত ধরে', ঘাড় বেঁকিয়ে, মুখের পানে চেয়ে হেসে বলতে পার্বে না—“প্রেয়সী আমি তোমারই।”

সরযু। আচ্ছা দেখুন না।

বিশ্বেশ্বর। দেখ্‌বি।—বলি ও ভায়া, এদিকে এসো। লক্ষ দাও !  
হাঃ হাঃ হাঃ—এসো ভায়া !—ঐ যে আসছে।—চুপ্‌।

মহিমের প্রবেশ।

মহিম। ( নতমুখে ) আপনি ডাকছিলেন ?

বিশ্বেশ্বর। ঐ ডাকার অপেক্ষায় ছিলে কি না !—এঁকে চেনো ?—  
কি ! নীরবে রৈলে যে ! একবার—কি বলে' এঁকে ডাক, ডাক ত !  
'প্রিয়তমে' 'প্রাণেশ্বরী' না 'প্রেয়সী' কি বলে' ডাক ? একবার ডাক  
ত। না হয় নাম ধ'রেই ডাকো। 'সরযু—উ-উ-উ'—আহা কি মধুর !  
আমার জিতেই জড়িয়ে যাচ্ছে, তা তোমার !—পার্কের কেন। আমার  
অনেক দিনের অভ্যাস, তবু নাম ধরে' ডাকতে ডাকতে কেমন ঘুমিয়ে  
পড়ি। আর দেখি যে ডাকা হ'ল না !

সরযু। দাদামহাশয় যে কি বলেন তার ঠিকানা নাই !

বিশ্বেশ্বর। উন্মাদের প্রলাপ !—কি ভায়া চুপ্‌ করে' রৈলে যে !  
মুখ নীচু করে' রৈলে যে। আবার নাতিনার পানে আড়ে আড়ে চাওয়া  
হচ্ছে। আবার উনিও—হঁ !

( সরযু হাসিয়া ফেলিলেন )

বিশ্বেশ্বর। ওরে ! ওরে ! আমি আর তোর দিদিমা ঠিক এই  
রকম কর্তাম রে, ঠিক এই রকম কর্তাম !—কি দিনই গিয়েছে ! (দীর্ঘ  
নিঃশ্বাস ) তবে এতক্ষণ চোখে চোখে কথা হচ্ছিল—এখন খানিক মুখে  
মুখে হোক্‌।—নাতিনী ! নাতিজামাই আমার বোবা না কি !—আচ্ছা  
আমি সরে' যাচ্ছি ! [ প্রস্থান।

মহিম ও সরযু পরস্পরের দিকে চাহিলেন ; পরে মহিম অন্তর্হিত  
৫৬ ]

বিশ্বেশ্বরের দিকে চাহিলেন ; পরে অগ্রসর হইয়া সরষুর করতল স্বীয় করতলে গ্রহণ করিলেন ; পরে আবার নেপথ্যে চাহিলেন ; পরে কহিলেন “সরষু।”

সরষু। কি !

মহিম। বলি—বলি—ভালো আছ ?

সরষু। হাঁ বেশ আছি। তারপর ?

মহিম। এ—এ—এ—বেশ বাতাস বৈছে !

সরষু। সুন্দর !

মহিম। সরষু !

সরষু। কি !—

মহিম। আমি তোমারই !

সরষু। শুনে সুখী হ'লাম !

মহিম। আমি তোমায় ভালোবাসি।

বিশ্বেশ্বর। [ উকি মারিয়া ] এখন পাখী পড়ছে ত বেশ।

মহিম ত্রস্ত হইয়া সরষুর হাত ছাড়িয়া দিয়া ফিরিয়া দাঁড়াইলেন।

সরষু চীৎকার করিয়া হাসিয়া উঠিলেন।

বিশ্বেশ্বর। যাচ্ছি, পড় আত্মারাম পড়। [ প্রস্থান।

মহিম। খাসা চাঁদ উঠেছে ! ছাদে যাবে ?

সরষু। চল।

উভয়ের প্রস্থান ও ভবানীর প্রবেশ।

ভবানী। দাদামহাশয় ! ভেবেছেন কেউ দেখতে পাচ্ছে না !  
পাচ্ছে—একজন দেখতে পাচ্ছে ; আর কাঁদছে। আপনি যতই  
হাসছেন, সে ততই কাঁদছে। আপনার মুখে হাসি অন্তরে ক্রন্দন।



দ্বিতীয় অঙ্ক ]

পরপারে

[ চতুর্থ দৃশ্য

যাকে পরের বাড়ী পাঠিয়ে দিতে হবে তাকে এত ভালবাসতে নাই  
দাদামহাশয় ! সে আজন্ম পবেব সম্পত্তি । লোকে মেয়ে মরে' গেলে  
কাঁদে কেন জানি না ।

[ প্রস্থান ।

### পট পরিবর্তন

স্থান—প্রাসাদমঞ্চ । কাল—জ্যোৎস্নারাত্রি

মহিম ও সরযু

মহিম । তোমার দাদামহাশয় তোমায় খুব ভালোবাসেন ?

সরযু । উঃ !

মহিম । তুমি তাঁকে খুব ভালোবাসো ?

সরযু । তাঁকে ?—জগতে আর কাউকে এত ভালোবাসি না ।

আমি দাদামহাশয়ের জন্ত প্রাণ দিতে পারি ।

মহিম । আর আমার জন্ত ?

সরযু । তোমার সঙ্গে ক'দিনের পরিচয় ?

মহিম । আচ্ছা বেশ !

সরযু । অভিমান ক'লে ! ( হাত ধরিয়া ) ছিঃ ।—চোটো না ।

মহিম । ( হাত ছাড়াইয়া ) যাও, তুমি আমায় ভালোবাসো না ।

সরযু । বাসি । কারণ তুমি আমার স্বামী । এ ভালোবাসা  
অভ্যাসগত । আর দাদামহাশয়কে যে ভালোবাসি সে ভালোবাসা  
প্রকৃতিগত !

মহিম । সেইটেই বেশী !

সরযু । নিশ্চয় । তাঁর আর তোমার মধ্যে তফাৎ অনেক ।

মহিম । কি তফাৎ ?

সরযু। আমি যদি মরে' যাই ত দাদামহাশয় শোকে অন্ধ হ'য়ে যাবেন ; আর তুমি বৎসর না যেতেই একটা নূতন বিয়ে কর্বে ।

মহিম। কখন কর্বে না ।

সরযু। আচ্ছা দেখিয়ে দোবো ।

মহিম। কি রকম করে' !

সরযু। [ সহাস্তে ] সত্যই মরে' দেখিয়ে দিতে ইচ্ছা করে যে তোমরা স্বামীর জাত কি ভণ্ড !

মহিম। কিসে ?

সরযু। প্রথমে ভালোবাসা দেখাও—সমুদ্র-তরঙ্গের মত বেঙ্গার উপর বাহু তুলে যেন তাকে গ্রাস কর্তে আসো । তারপর তৃপ্তি হ'লে সেই সমুদ্র-তরঙ্গের মত অবসাদে বেলা থেকে সরে যাও ।

মহিম। আমি তোমায় সে রকম ভালোবাসি না ।

সরযু। কি রকম বাসো ?

মহিম। এ ভালোবাসা আকাশের মত অনন্ত, উদার, স্বচ্ছ । এর শেষ নাই, তৃপ্তি নাই । এ ভালোবাসা পর্কতের মত অটল, ধ্রুবতারার মত স্থির ।—হাস্‌ছো যে !—যাও, তুমি আমায় ভালোবাসো না ।

সরযু। তোমার কবিতা শুন্‌ছিলাম !—তোমার মা কেমন আছেন ! কোন চিঠি পেয়েছে ?

মহিম। এর মধ্যে সে কথা আসে কোথা থেকে ?

সরযু। কথাটা এর মধ্যে নয়, এর বাইরে ।—আচ্ছা ! 'মা' জিনিষটা বড় গম্ভীর । না ?

মহিম। কেন ?

সরযু। নৈলে ছুটিটায় একবার তাঁর কাছে গেলেও না ! দাদাখণ্ডুর-

বাড়ীতেই কাটিয়ে দিলে ! চক্কুলজ্ঞাও নাই ! এখানে কর্ছ কি !  
সেখানে যে তোমার মা শূন্যনবনে তোমার পথ চেয়ে আছেন ।

মহিম । কে বল্লে ?

সরযু । আমি জানি । সে কথা আবার কারো বলতে হয় ? হায়  
স্বামী ! মা চিন্লে না । চিন্বে সেইদিন, যেদিন হারাবে ।

মহিম । তুমি চিনেছ ?

সরযু । হাঁ—আমি যে হারিয়েছি । ও রতন না হারালে ঠিক চেনা  
যায় না । তোমার বৃদ্ধা মা একাকিনী সাশ্রনয়নে পথের দিকে চেয়ে  
আছেন, আর তুমি এখানে একটা নগণ্য নারীর পায়ের তলায় পড়ে’  
আছ ?—যাকে এক বৎসর আগে চিন্তে না, যার একমাত্র ঞ্গণ আছে,  
সে ঞ্গণ রূপ যৌবন ।

মহিম । তা হ’লে তোমার ইচ্ছা নয় যে, এখানে আমি থাকি ।

সরযু । ইচ্ছা যে এখানে থাক—কিন্তু মাকে ছেড়ে নয় । প্রেমের  
পায়ে নিজের স্বার্থ বলি দিতে পার—কিন্তু কর্তব্য নয়, মাতৃভক্তি নয় ।

মহিম । সে আমার বিচার্য্য । তোমার কি !—তোমার কাজ  
আমায় আদর, চুষন, আলিঙ্গন দেওয়া ।

সরযু । আমি তোমার গণিক। নই । আমি তোমাব স্ত্রী ।—তোমার  
জন্ত আমার ভয় হয় ।

মহিম । কেন ?

সরযু । তুমি কি পাপ কাজ না কর্তে পার জানি না, যখন মায়ের  
প্রতি তোমার টান নেই । মাতৃভক্তি—যে কর্তব্য সৰ্ব্ব কর্তব্যের মূল,  
জীবনের প্রথম মহাশিক্ষা, মনুষ্য প্রকৃতির মজ্জাগত সনাতন ধর্ম ;  
মাতৃভক্তি—যার কোমল করম্পর্শে কর্তব্যের কাঠিগু খসে’ পড়ে, ভক্তি  
৬০ ]

স্নেহে হাস্ত করে—যে কর্তব্য তর্কের ধার ধারে না, যুক্তির সাহায্য চায় না, বিধি ও বিধান মানে না ; মাতৃভক্তি—যা একটা স্বর্গীয় অভিপ্রায় মানবজীবনকে মণ্ডিত করে, সানন্দে প্রকৃতির ঋণ পরিশোধ করে, আত্মাকে দীপ্ত করে, অভ্যাসগত সংস্কারকে জীবনের মূলমন্ত্র করে, মানুষের সমস্ত কোমল প্রবৃত্তির উপর রাজত্ব করে, ঘটনার বিপর্যয়ের উপর ক্রীড়া করে, জরার ম্রিয়মাণ শক্তি সঞ্জীবিত করে, আর মৃত্যুর সেই ভয়ানক মুহূর্ত আলোকিত করে ;—যে এই মাতৃভক্তির কাক্সাল, তার আর কি আছে ! সে জীবনে কি পাপ কাজ না কর্তে পারে ! তাই বলছিলাম—সাবধান ! সংসারে মায়ের বাড়া কেউ নেই—ভগ্নী নয়, কন্যা নয়, জ্ঞী নয় ।—বল, তোমার মা ভাল আছেন ?

মহিম। আ—ছেন ।

সরযু। মিথ্যা কথা । নিশ্চয়ই তিনি ভাল নাই । সত্য কথা বল । তাঁর অসুখ ?

মহিম। বিশেষ কিছু নয় ।

সরযু। আবার মিথ্যা কথা ! আমি তোমার জ্ঞী, আমার কাছে মিথ্যা কথা !—না, মনে হচ্ছে যে তোমার মায়ের সাংঘাতিক পীড়া হয়েছে । না ? কি ! চুপ করে' রৈলে যে ! বুঝেছি । তোমার মা এখন কোথায় ? আমি তাঁর দাসীত্ব স্বীকার করেছি । তাঁর পীড়ায় আমি তাঁর সেবা করব । তুমি না যাও, আমি যাবো । তাঁর কি হয়েছে বল ।

মহিম। নিউমোনিয়া—বিশেষ কিছু নয় ।

সরযু। তবে আমি যা স্বপ্নে দেখেছি তা মিথ্যা নয় ?—আমি যাবো তাঁর কাছে । আজই যাবো । তুমি এখানে থাক । শৈশবে মা হারিয়েছি । সেবা করে' সাধ মেটে নি । মা বলে সাধ মেটে নি । আর

এক মা পেয়েছি যদি, সেবার সাধটা তাঁকে সেবা করে' মেটাবো—আমি যাবো।

মহিম। তোমার এ অবস্থায় কোন যায়গায় যাওয়া উচিত নয়।

সরষু। উচিত নয়! তুমি তাঁর ছেলে হ'য়ে এই কথা বলছো! তোমার মা যিনি—তোমায় যিনি গর্ভে ধরেছিলেন—বল তোমার মা এখন কোথায়?

দয়ালের প্রবেশ।

দয়াল। স্বর্গে।—উৎসব কর মহিম! আপদ দূর হয়েছে। তাঁর মৃতদেহের উপর তোমরা দুজন তাণ্ডব নৃত্য কর। তোমাদের বাংলায় গিয়েছে।

সরষু। তাঁর মৃত্যু হয়েছে?

দয়াল। বোমা! ধন্য তোমরা এই বৌজাতি! তোমরা স্বামীকে পশুর অধম করে' ফেল, ভাইকে ভায়ের শত্রু কর, পুলকে মায়েব কোণে থেকে ছিনিয়ে নাও! ধন্য জাতি! বলিহারীণ!—আর তুমি মহিম! নীচ, পাষাণ, মাতৃহন্তা! নরকেও যেন তোমার স্থান না হয়! তোমাকে অভিশাপ দিই, যেন আহায়ে ভাতের মুঠো মুখে তুলতে তা ভস্ম হ'য়ে যায়;—আর সর্বসময়ে তোমার মায়ের মরাসুখ দেখে যেন তুমি শিউবে ওঠো, আমি তোমায় এই অভিশাপ দিয়ে গেলাম। মনে রেখো।

— — —

## পঞ্চম দৃশ্য

স্থান—বাগানবাড়ী। কাল—রাত্রি।

পার্কতীর বন্ধুবর্গ—নানারূপ অবস্থায় অবস্থিত। দূরে খানসামা ইত্যাদি

আহার পাত্রাদি গুছাইতেছিল।

নীলমাধব। আজকের পাটি বেশ জমকালো রকম হবে।

সারদা। এবার ভূঁইক্ষ হবে বোধ হয়।

বিনোদ। ওরে বিন্দে, তামাক সাজ্‌।

অনুকূল। দেবেন্দ্রবাবুর জীর বড় অসুখ!

সারদা। প্রমাণ হ'য়ে গিয়েছে যে, বক্তির্যার খিলিজি নবদ্বীপ  
প্রাক্রমণ কবেন নি।

নীলমাধব। এবার শীত পড়েছে খুব।

নবীন। ওহে গীতগোবিন্দ তোমার কেমন লাগে?

হরি। ওবে সোডা এনেছি স্‌ ত!

চন্দ। তোমার ছেলেপিলে ক'টি?

সারদা। অশোকের সময় বৌদ্ধধর্মের প্রচার হয় নি। তাম্রলিপি  
পাওয়া গিয়েছে।

কালী। ওহে। Give me a glass of liquid fire—distilled  
damnation.

পার্কতীর প্রবেশ।

অনুকূল। এই যে পার্কতী।

পার্কতী। কৈ। এখনো আসি নি?

অমুকুল। জাপানীরা যে দিন পোর্ট আর্থর দখল কলে, সে দিন আমাদের আপিণে বারা কৃষিয়ার পক্ষে ছিল, তারা তামাক খায় নি।

নীলমাধব। বল কি !—এই যে—

সারঙ্গীসহ বাইজি-বেশে শাস্তার প্রবেশ।

চন্দ্রকান্ত। এই যে সরে' দাঁড়াও, সরে' দাঁড়াও। বাইজির জগ্ন রাস্তা কর, রাস্তা কর। [ রাস্তা করিতে লাগিলেন ]

নীলরতন চাদর দিয়া রাস্তা ঝাড়িতে লাগিলেন।

বিনোদ চাদর দিয়া শাস্তাকে বাতাস করিতে লাগিলেন।

সারদা প্রশান্তভাবে তামাক টানিতে টানিতে অমুকুলের সহিত নিম্নস্বরে গল্প করিতে লাগিলেন। প্রেমতোষ গিয়া শাস্তার হাত ধরিয়া কহিলেন “আমুন”—

শাস্তা। হাত ছাড়ুন। ( ছাড়াইয়া লইলেন )

প্রেমতোষ। ও বাবা ! এ ত বাইজী নয়, এ যে গোখরো সাপ। একবারে কণা তুলে ফোঁস করে' উঠলে যে ! এস চাঁদ [ পুনরায় তাহার হাত ধরিতে উদ্যত ]

শাস্তা। খবর্দার, আমায় স্পর্শ কর্কেন না।

প্রেমতোষ। ওহে পার্কতী ( মাথা ঝাঁকিয়া প্রস্থ করিলেন )

কালী। ওহে ! বেশ বাংলা বলছে ত ! ‘স্পর্শ কর্কেন না’—বেশ বলেছে ! এ যে অত্যন্ত ভদ্র রকম বাইজি। Is she a vision ! Or a fairy ! She seems to me too fine to be a woman.’

পার্কতী। এত রোখ কিসের চাঁদ ! তুমি ত বেণ্ডা।

শাস্তা। যাব মাতা বেণ্ডা, পিতা লম্পট, সে বেণ্ডা না হ'য়ে কি স্বর্গের দেবী হবে ? ‘তথাপি আমি’ বেণ্ডা নই।

সকলে চমকিত হইয়া তাহার পানে চাহিলেন ।

বিনোদ । তুমি বেণী নও !—তবে কি তুমি খড়্গদার মা মৌসাই !

শাস্তা । ওঃ ! অস্বীকারও যে কর্তে পারি না । এ কলঙ্ক, এ অপবাদ বিধাতা আমার কপালে দেগে দিয়েছেন । আমি কি করব !—  
যাক্ । মহাশয় গান আরম্ভ হবে ?

পার্বতী । তোমার সঙ্গে কি শুদ্ধ গাইবার বন্দোবস্ত হয়েছে, না নাচবে ?

শাস্তা । আজ্ঞে না, শুদ্ধ গাইব ।

চক্র । আর আমরা চোখ বুজে শুন্বো !—এটা কি উপাসনা মন্দির পেয়েছো !

নীলরতন । আচ্ছা গাও—

শাস্তা । ( সারঙ্গীদিগকে ) ধর ।

সারঙ্গীরা সারঙ্গ কোলে লইয়া বসিয়া বাঁধিতে লাগিল ।

পার্বতী । দাঁড়াও ! আগে ‘ইশু’ ধার্য্য করে’ নেই ! তুমি শুদ্ধ গায়িকা হিসাবে এখানে এসেছো ?

শাস্তা । আজ্ঞা হাঁ !

পার্বতী । তা হবে না ।

শাস্তা । মহাশয়ের অভিরুচি ।

[ চলিয়া যাইতে উদ্ভত ]

পার্বতী । যাচ্ছ কোথায় ?—আগাম টাকা নিয়ে—

একজন সারঙ্গী নোটসহ টাকার পুঁটলি ঝনাৎ করিয়া ফেলিয়া দিল । পরে সারঙ্গী ও শাস্তার প্রস্থান ।

নীলরতন । উঃ ! একেবারে যে কুইন সেমিরেমিস্ ।



প্রেমতোষ । আজকার আমোদটাই মাটি করে' দিলে ।—ওহে  
ডাক ডাক, গানই গাক্, তা আর কি হবে । চারু ডাক ।

চারু বাহিরে গিয়া শাস্তা ও সারঙ্গীকে ডাকিয়া আনিল ।

পার্বতী । আচ্ছা গাও । তুমি কেমন তা আর একদিন দেখে নেবো ।

শাস্তা । [ সারঙ্গীকে ] ধর ।

সারঙ্গীরা সারঙ্গ বাঁধিতে লাগিল ।

সারদা । ( অমুকুলকে ) তুমি গগুমূৰ্খ ।

অমুকুল । তুমি গোমূৰ্খ ।

সারদা । ১৪১৫ শাল

অমুকুল । ১৪১৬ শাল ।

সারদা । বেয়াদব !

অমুকুল । চোপ্তাও ।

পার্বতী । কি হয়েছে ! কি হয়েছে !

সারদা । Battle of Agincourt ১৪১৫ শাল ।

অমুকুল । হাঁ Battle of Agincourt ১৪১৬ শাল ।

সারদা । নরাধম !

অমুকুল । গৰ্ভশ্রাব !

সারদা । এসো ত ( আস্তিন গুটাইলেন )

অমুকুল । এসো না দেখি ( আস্তিন গুটাইলেন )

পার্বতী । আরে কর কি ! কর কি !—হয়েছে কি ?

সারদা । Battle of Agincourt ( ঘুঁষি তুলিলেন )

অমুকুল । হাঁ, Battle of Agincourt ( ঘুঁষি তুলিলেন )

সারদা । ১৪১৫ শাল ( হুকার )

অনুকূল । ১৪১৬ শাল ( হুকার )

চারু । আরে Battle of Agincourt কোন্ শালে—তা নিয়ে ঘুঘোঘুঘি কেন ?—আর এখানেই বা কেন ! আমোদ কর্তে এসেছে !

সারদা । আচ্ছা—এসো, বাইরে এসো [ মালকৌচা মারিলেন ]

অনুকূল । এসো না [ মালকৌচা মারিলেন ]

সারদা । মাঠে চল ।

অনুকূল । চল ।

সারদা । [ লাফাইতে লাফাইতে ] Battle of Agincourt.

অনুকূল । [ লাফাইতে লাফাইতে ] Battle of Agincourt.

উভয়ে । Battle of Agincourt. [ হুকার ও নিষ্ক্রান্ত ]

পার্ক্‌তী । আরে ! এরা করে কি ! Battle of Agincourt নিয়ে এদের এত মাথাব্যথা কেন !

কালী । হাঁ, বীর বটে ! সত্য সত্যই যেন দুজন Battle of Agincourt কর্তে গেল ! মালকৌচা মেরেছে, আন্তিন 'গুটিয়েছে, ঘুঁষি তুলেছে, লাফিয়েছে,—আর কি চাও ? Strange all this difference should be betwixt Tweedledum and Tweedledee.

শাস্তা । মহাশয় গাইব ?

পার্ক্‌তী । গাও ।

কালী । রোস, আগে Battle of Agincourt কোন্ শালে ঠিক হ'য়ে যাক ! আমার একটা ছুঁতাবনা হয়েছে । রাত্রে ঘুম হয় না ।

[ সকলে হাসিলেন ]

পার্ক্‌তী । তুমি হিন্দী গাও, না বাঙ্গালা গাও ?

শাস্তা । হুই গাই ।

কালী। তবে একটা বাংলালাই গাও—যা বুঝি। হিন্দী is Greek to me.

প্রেম। না, আগে একটা হিন্দী হোক—( সুরে ) আরে সেইয়া ।

কালী। ওস্তাদ !

চন্দ্র। না—না, বাংলাই গাও—সেইয়া মেইয়া রেখে দাও ।  
বাংলাই গাও ।

নীল। কিন্তু ব্রহ্মসঙ্গীত নয় ।

বিনোদ। ব্রহ্মসঙ্গীত এখানে চলবে না ।

কালী। দেখ না কি গায় । Perhaps it may turn out song,  
perhaps turn out a sermon.

পার্কর্তী। আগে একটা হিন্দী গাও ।

শাস্তা। যে আজ্ঞে ।

শাস্তার গীত ।

পল খন সৌ পাগে ঝারে দ্রিম  
যব ঘর আই প্যারা মোরা ।  
গাবোঁয়া লাগাউ নবত বুঝাউ—  
তন মন ধন সবোয়ারা ।

হিরণ্ময়ীর প্রবেশ ।

প্রেম। এ আবার কে ।

পার্কর্তী। [ চমকিয়া ] তুমি !—এখান্ন !

হিরণ্ময়ী। বাঃ ! খাসা সজ্জিত বিলাসভবন, চমৎকার উজ্জ্বল প্রশস্ত  
কক্ষ, অপার্থিব প্রাণোন্মাদী সঙ্গীত ।—( পার্কর্তীকে ) কি ! মুখ যে  
ছাইয়ের মত সাদা হ'য়ে গেল । সে কথা বলব না, ভয় নাই ! রাস্তা  
৬৮ ]

দিয়ে যাচ্ছিলাম, আলোকিত উদ্যানভবন দেখলাম, হাশুবিজড়িত সুন্দর সঙ্গীত শুনলাম, ভাবলাম একবার উঁকি মেরে দেখে যাই যে এখানে কি রকম প্রেতের নৃত্য হচ্ছে।

পার্কতী। তা—এখন যাও।

হিরণ্ময়ী। একটু থাকলামই বা। বাইরে ঘোর অন্ধকার। পথ কর্দমান্ত। শীতের প্রখর বাতাস বৈছে। সেই কাল রাত্রির কথা মনে হ'ল। মমে হ'ল সেই পাষণ্ডকে একবার দেখে যাই।

পার্কতী। দরোয়ান।

হিরণ্ময়ী। কিছু বলছি না; ভয় নাই! এখন এই সুসজ্জিত নাট্যশালায়—এই গীতমুখর দীপোদ্ভাসিত বিলাসমন্দিরে যদি সে কথা উচ্চারণ করি—তা হ'লে সঙ্গীত ভয়ে থেমে যাবে, আলো আতঙ্কে মুখ ঢাকবে, হাশু আর্তনাদ করে' উঠবে।

পার্কতী। এই দরোয়ান!

হিরণ্ময়ী। তার পর সেই অন্ধকারে হঠাৎ শ্মশানের চিতা হুপ করে' জলে' উঠবে, সুবাসিত বাতাস পচা হাড়ের দুর্গন্ধ বমন কর্বে, মাটি ফুঁড়ে শয়তানের দল লাফিয়ে উঠবে। না, সে কথা প্রকাশ করব না। সে কথা শুনে বন্ধ বন্ধুর মুখের দিকে মুখ তুলে চাইতে পার্বে না, জী স্বামীর আলিঙ্গনের নীচে গুপ্ত ছোরা দেখবে, সন্তান মাতৃস্তনে বিষ আছে বলে' সন্দেহ কর্বে। কিছু প্রকাশ করব না, ভয় নাই! তবু ইচ্ছা করে যে একবার সে কথা রাষ্ট্র করে' দেই, পরে কি হয় একবার দেখি। একবার বলে' দেখবো কি হয়?

পার্কতী। কোথা থেকে এক উন্মাদ এসে জুটলো! নিকালো—

হিরণ্ময়ী। কি! উন্মাদ?—নিকালো? তবে বলি!—না,

বলবো। এ কথা রাষ্ট্র কর্কস! আর চেপে রাখতে পারি না।—  
মহাশয়েরা! আমি পাগল নই! যে কথা আজ বলছি তা উন্মাদের  
প্রলাপ নয়!

পার্কসী। দরোয়ান [ বাহিরে দরোয়ান ডাকিতে গেলেন ]

হিরণ্ময়ী। ঈশ্বরকে আমরা সাক্ষী মানি, কিন্তু তিনি কখন সাক্ষ্য  
দেন না। তিনি হাত গুটিয়ে বসে' আছেন। মরা মানুষ সাক্ষ্য দেয়  
না;—শুধু স্থির, পারদপাংশু, দৃষ্টিহীন নেত্রে চেয়ে থাকে। কিন্তু আমি  
যা এই সভায় প্রকাশ কর্কস, তার প্রত্যেক অক্ষর যে কোন বিচারালয়ে  
প্রমাণ কর্তে পারি।—না, আমি উন্মাদ নই! এই কৃশা, চৌরবসনা,  
রুক্মকেশা, ধূলিধূসরিতা ভিখারিণী—সম্ভ্রান্তকুলের শিক্ষিতা মহিলা।

পার্কসীর পুনঃ প্রবেশ।

পার্কসী। দরোয়ান গেল কোথা?—বেরিয়ে যা বলছি, নৈলে—

হিরণ্ময়ী। মহাশয়েরা, এই যে আপনাদের সম্মুখে নিরীহ ভদ্রের মত  
পোষাক পরা ব্যক্তিকে দেখছেন,—এ ব্যক্তি ষষ্ঠ, ন্যাভিচারী, ইত্য।—

পার্কসী। [ দৌড়িয়া গিয়া হিরণ্ময়ীর কণ্ঠদেশ সজোরে ধরিয়া ]  
চোপ্‌রও—

হিরণ্ময়ী। রক্ষা কর—রক্ষা কর—[ গলদেশ ছাড়াইবার চেষ্টা  
করিতে লাগিলেন ] আমি এ কথা—আজ—প্রকাশ করে—তবে  
মর্যো।—রক্ষা কর।

শাস্তা। সম্মুখে নারীহত্যা হয়; আর পুরুষ সবই পাথরের মূর্তির মত  
স্থির! যখন পুরুষ এমন কাপুরুষ—তখন পুরুষের কাজ নাবীরই কর্তে  
হয়। [ দৌড়িয়া গিয়া পার্কসীর কণ্ঠদেশ ধরিয়া ] ছেড়ে দাও—ছাড়  
এই মুহূর্তে—নহিলে—

পার্কভী । [ হিরণ্ময়ীকে ছাড়িয়া ] চোপ্‌রও ! [ শাস্তার কণ্ঠদেশ ধরিলেন ]

“এর জন্ত প্রস্তুত হ’য়ে এসেছি”—এই বলিয়া শাস্তা স্বীয় বস্ত্রমধ্য হইতে তৎক্ষণাৎ একখানি শাণিত দীপ্ত ছোরা বাহির করিয়া পার্কভীর বক্ষ লক্ষ্য করিয়া কহিল, “সাবধান !”

পার্কভী তৎক্ষণাৎ শাস্তাকে ছাড়িয়া পশ্চাতে হেলিলেন । শাস্তা কিন্তু ছোড়া হস্তে পূর্ববৎই দাঁড়াইয়া রহিল । ইত্যবসরে প্রায় সকলেই উঠিয়া দাঁড়াইয়াছিল ও নির্বাক্ বিস্ময়ে তাহার পানে চাহিয়া রহিল । হিরণ্ময়ী নেত্রময় বিস্ফারিত করিয়া সভয়ে চীৎকার করিয়া শাস্তাকে লক্ষ্য করিয়া কহিল,—“কে তুমি !—কে তুমি !”—এই বলিয়া মুর্ছিত হইয়া পড়িল ।

---

# তৃতীয় অঙ্ক

## প্রথম দৃশ্য

স্থান—বিশ্বেশ্বরের বহির্কাটা। কাল—প্রভাত।

বিশ্বেশ্বর, পরেশ ও কালীচরণ।

পরেশ। তাওউই মহাশয়, আপনি ছহাতে সম্পত্তি বিলিয়ে দিচ্ছেন—শেষে যে হাত ধুয়ে রাস্তায় বসতে হবে।

বিশ্বেশ্বর। যখন বসতে হবে বসবো।

পরেশ। তবু বিলোবেন ?

বিশ্বেশ্বর। যতদিন আছে—বিলোতে হবে বৈ কি !

পরেশ। আব কি আছে যে বিলোবেন ?

বিশ্বেশ্বর। সে কি বাবাজি ! এই বাড়ীখানা কি সহজ ব্যাপার বিবেচনা কর বাপু !—আর জমীদারি !

পরেশ। সে ত একে একে বিক্রয় হ'য়ে গিয়েছে।

বিশ্বেশ্বর। তা কি হয় !—তবে টাকা আসছে কোথা থেকে ?

পরেশ। সে তো নিলাম খরিদের বাকি টাকা আমমোক্তার যা দয়া করে' এনে দিচ্ছে।—তাও জানেন না' ? এখন আপনার জমীদারির আয় কত জানেন ?

বিশ্বেশ্বর। কত ?

পরেশ। কিছু খবর রাখেন না ?

বিশ্বেশ্বর। না।

পরেশ। আশ্চর্য্য!—আচ্ছা, জমীদারির আয় একলাখ হবে?

বিশ্বেশ্বর। তা হবে!

পরেশ। না, ৫০,০০০?।

বিশ্বেশ্বর। মোটে!—

পরেশ। তাও যে নেই।

বিশ্বেশ্বর। নেই না কি?

পরেশ। এখন বার্ষিক আয় ১০,০০০ হবে কি না সন্দেহ।

বিশ্বেশ্বর। সে কি!—

পরেশ। ছিল ছুলাখ, হয়েছে দশ হাজার।

বিশ্বেশ্বর। বটে! বাকি একলাখ ৯০ হাজার কি হ'ল?

পরেশ। রেভিনিউ না দেওয়ায় নিলাম হ'য়ে গিয়েছে।

বিশ্বেশ্বর। যাক—আপদ গিয়েছে।

পরেশ। আপনাবু গোমস্তা খাজনা আদায় করে' টাকা নিজেই  
গাপু করেছে।

বিশ্বেশ্বর। করেছে না কি!—কেন করল? চাইলেই ত দিতাম!

পরেশ। তার উপরে পার্শ্ববর্তী বাবুর সঙ্গে ষড়্ করে' বিনা ইস্তাহারে  
জমীদারি নিলাম করিয়েছে।

বিশ্বেশ্বর। নীলাম করিয়েছে?—না না, তা কি হয়! তুমি  
শুস্তে ভুলেছ।

পরেশ। শুস্তে ভুলেছি!—আগে তাই শুস্তে পেতাম; এখন বিশেষ  
তদন্ত করে' জেনেছি।—শুনুন, এখনও একটু ছাত শুটোন; নৈলে  
ছদিন পরে যে খেতে পাবেন না; সাফ খেতে পাবেন না।



বিশ্বেশ্বর । [ হাসিয়া ] তাও কি হয় বাবাজি !

পরেশ । জমীদারি বা আছে এখন থেকে আমি দেখছি—আপনি হাত গুটোন ।

বিশ্বেশ্বর । হাত কখন গুটোন যায় ? গরীব চাইলে যে চোখে জল আপনি আসে, হাত যে আপনি এগিয়ে যায় তাকে বুকের মাঝখানে জড়িয়ে ধর্তে । থাকতে দেবো না ! এ কি হয় বাবাজি !

কালীচরণ । The robbed that smiles, steals something from the thief. [ প্রস্থান ।

বিশ্বেশ্বর । পরেশ ! নিজের বাড়ীর খরচ চেষ্টা কর্নে কমাতে পারি । কিন্তু পরের হুংখ মোচন কর্তে হাত কি গুটোন যায় বাবাজি ! তুমি জান না যে ত্যাগে কি আনন্দ, দানে কি সুখ ! চক্ষের জল মুছিয়ে দেওয়া, শুষ্ক ওষ্ঠপুটে হাসি ফোটান, স্নান মুখ উজ্জল করা—এ একটা সৃষ্টি । কঠোরকে ভালোবাসান, পাপীকে কৃতজ্ঞ করা—তুমি জান না পরেশ—ছেলে মানুষ—হেঁ হেঁ হেঁ—নিতাস্ত ছেলে মানুষ !

পরেশ । আর এদিকে জমীদারি যে একে একে সব পার্বর্তী কিনে নিল ।

বিশ্বেশ্বর । নে'ক । তার ত আনন্দ হচ্ছে ।

পরেশ । চোরা না শোনে ধর্ম্মের কাহিনী । [ প্রস্থান ।

বিশ্বেশ্বর । পরেশ বড় চটেছে ।—ও কে ? দয়াল না ! তাই ত, দয়ালই ত !—এসো দয়াল । এ যে অনেক দিন পরে !

দয়ালের প্রবেশ ।

বিশ্বেশ্বর । এসো, আমার প্রিয়তম বাল্যবন্ধু—[ ব্যস্ত ভাবে উঠিয়া কোলাকুলি করিয়া ] দেশ থেকে এলে কবে ?

দয়াল। আজই।

বিশ্বেশ্বর। ওঃ! কতদিন তোমায় দেখিনি?—আমার সরষু ভাল আছে?

দয়াল। চমৎকার!

বিশ্বেশ্বর। আর মহিম!

দয়াল। ততোধিক।

বিশ্বেশ্বর। বোস বোস সরষুর কথা বল! কতদিন যে তাকে দেখিনি—নিজের অসুখ, বাতে পঙ্গু—যাক্ সরষুর সঙ্গে তোমার প্রায়ই দেখা হ'ত?

দয়াল। তা হ'ত।

বিশ্বেশ্বর। সে আমার কথা তোমায় বলতো!—বলতো যে সে আমার এখনও ভালবাসে!

দয়াল। তা আর বাস্বে না!—তার যে বিয়ে দিয়েছে!

বিশ্বেশ্বর। কি বিয়ে দিয়েছি!

দয়াল। চমৎকার! এমন সোণার প্রতিমাকে এক চণ্ডালের হাতে সঁপে' দিয়েছ।

বিশ্বেশ্বর। সে কি!—

দয়াল। তার অবস্থা একবার নিজে গিয়ে দেখে এসো! তাকে এখন দেখলে চিন্তে পার্কে না।

বিশ্বেশ্বর। কেন!

দয়াল। কেন আবার! মনের কষ্টে, অনাহারে—

বিশ্বেশ্বর। অনাহারে! কেন! আমি মাস্তে তাকে ৫০০ টাকা পাঠাই, তা কি পাঠান হয় না?—পরেশ!—

দয়াল। পাঠান ঠিক হয়। তবে তোমার সাধের নাতুজামাই সেই পাঁচশর মধ্যে চারশ যে এক বেণ্ডার পায়ে ঢেলে দিচ্ছেন।

বিশ্বেশ্বর। কি! কার পায়ে ঢেলে দিচ্ছে?

দয়াল। কার পায়ে আবার! সেই গণিকার পায়ে!—বেছে বেছে পাত্র খুঁজে বের করেছিলে খুব! তোমার সম্পত্তি এক বেণ্ডার ভোগে লাগছে।—বলিহারি!

বিশ্বেশ্বর। তুমি কি বলতে চাও যে মহিম এক গণিকা রেখেছে?

দয়াল। সে কি তুমি জান না? শোন নি?

বিশ্বেশ্বর। না। দিদি ত সে রকম কিছু লেখে নি!

দয়াল। লেখে নি যে সে খেতে পায় না?

বিশ্বেশ্বর। কৈ!—না।

দয়াল। লেখে নি যে তার ছেলে অনাহারে জরে বিনা চিকিৎসায় মারা গিয়েছে?

বিশ্বেশ্বর। কৈ! থোকা?

দয়াল। হাঁ থোকা।

বিশ্বেশ্বর। মারা গিয়েছে?—কি বলছ সব?

দয়াল। তাও শোন নি?

বিশ্বেশ্বর। মারা গিয়েছে?—কৈ! দিদি ত কিছু লেখে নি।

দয়াল। লেখেনি! আশ্চর্য্য!

বিশ্বেশ্বর। মারা গিয়েছে? ঠিক?

দয়াল। আমাদের কথা বিশ্বাস হচ্ছে না?

বিশ্বেশ্বর। বুঝেছি সরযু। এ সংবাদ শুনে আমার কণ্ঠ হবে বলে' সে কথা লিখিস্ নি!—ওঃ! এই বয়সেই তোর পুত্রশোক সহ্য কর্তে হ'ল দিদি!

দয়াল । অদৃষ্ট !

বিশ্বেশ্বর । মহিম গণিকা রেখেছে ?

দয়াল । হাঁ ।

বিশ্বেশ্বর । গণিকা ?

দয়াল । বুঝতে পার্ছ না ? এ ত বেশ বিপুল বাজালা ! গ্রাম্য ভাষায় বলবো ?

বিশ্বেশ্বর । গণিকা রেখেছে !—কেন !

দয়াল । নাও । এ ‘কেন’র জবাব কি দেব !—গণিকা লোকে আবার রাখে কেন !

বিশ্বেশ্বর । মহিম সরযুকে আর ভালোবাসে না ? বল কি !

দয়াল । তা বাসে বৈ কি । তোমার নাতিনৌই ত সে গণিকার খরচ যোগায় ।

বিশ্বেশ্বর । মাথা ঘুলিয়ে যাচ্ছে ।—বোস । মহিম সরযুকে আর ভালোবাসে না !

দয়াল । সর্প যেমন ভেককে ভালোবাসে ।

বিশ্বেশ্বর । কিন্তু একদিন ত বাস্তুতো !

দয়াল । তা হবে ।

বিশ্বেশ্বর । এ যে আমার স্বপ্নের অগোচর ! সরযুকে ভালো না বেসে কেউ থাকতে পারে । এ যে আমার ধারণার অতীত । সে আমার সরযুকে এত ভালোবাস্তো ! সে যে সরযু বৈ আর জান্ত না ! সে যে সরযু বলতে অজ্ঞান ছিল ! সে কি আমি সব স্বপ্ন দেখেছি, সে কি সব ভ্রম ! এ যে আমি কখনও ভাবি নি !

দয়াল । যা কখন ভাব নি এমন ব্যাপার পৃথিবীতে অনেক ঘটে ।

বিশ্বেশ্বর । [ চিস্তিতভাবে ] সে যে তাকে বড় ভালোবাসতো !—  
বেশ মনে আছে । একদিন মনে পড়ে—সে দিন বিজয়া—সেই শরতেব  
শাস্ত সন্ধ্যায়, নাতিনী আমার বাগানে একটা নারিকেল গাছে  
হেলান দিয়ে দাঁড়িয়ে ছিল ; অন্তগামী সূর্য্যের স্বর্ণরশ্মি তার মুখের উপর  
এসে পড়েছিল ; দূরে বিজয়ার বাগ বাজুছিল ; বাতাসে গাছে পাতাগুলো  
নড়ুছিল ; মহিম একটি গোলাপ ফুল তুলে হেসে সরষু ব কুন্তলে পরিষে  
দিচ্ছিল ; একটা ভ্রমর ফুল থেকে আর একটা ফুলে উড়ে বসছিল ।—  
আর আমি অন্তরালে দাঁড়িয়ে সেই মধুব ছবিখানি আমার চিত্তপটে এঁকে  
নিচ্ছিলাম ।—সে দিন ত মহিম তাকে ভালোবাসতো ?

দয়াল । কে না বাসে ! সে যে যুবকের সন্মুখে যুবতী, ক্ষুধিত  
গ্রাসের সন্মুখে স্তম্ভাঙ্ক খাঙ ।—ভালোবাসবে না !

বিশ্বেশ্বর । তার পর সন্ধ্যায় প্রদীপ জ্বালা হ'লে সরষু এসে আমাকে  
বিজয়ার প্রণাম করলে । আমি অমনি তাকে কল্পিত আলিঙ্গনে বক্ষে  
তুলে নিয়ে সেই উদ্ভাসিত মুখখানি বারবার চুম্বন করলাম ! তার পর  
তাব গলাটি ধরে' হেসে তাকে জিজ্ঞাসা করলাম “সরষু ! বাগানে কি  
হচ্ছিল ।” সরষু হেসে বললে “আপনি লুকিয়ে লুকিয়ে দেখেছিলেন বুঝি !  
ভাবি ছুট !”—এই ‘ভারি ছুট’ কথাটা সে এমনি বললে—কি বলব দয়াল—  
এখনও তা আমার কাণে বাজছে ।

দয়াল । নাও ! এখন প্রেমের ইতিহাস আরম্ভ হ'ল !

বিশ্বেশ্বর । তার পর সেই রাত্রে তারা বিদায় নিল । বিদায় দেবার  
সময় আবার সরষুকে বক্ষে নিয়ে টেঁচিয়ে কেঁদে উঠলাম ! সরষুও কেঁদে  
উঠল ।

দয়াল । তাই বলে' এখন সত্য সত্যই কেঁদো না ।

বিশ্বেশ্বর। [ কতক প্রকৃতিস্থ হইয়া ] তার পর আমি বল্লাম “সরযু মনে থাকবে ত ?” সরযু তখন—মুখে হাসি চোখে জল—সে কি অপূর্ণ দৃশ্য দয়াল—সরযু বল্লে “দাদামহাশয়, আপনাকে যে দিন ভুল্‌বো চিঠি লিখে জানাবো।” তার পর গাড়িতে চ’ড়ে তারা দুজনে চলে’ গেল। সরযু গাড়ি থেকে মুখ বাড়িয়ে বল্লে—“চিঠি লিখ্‌বেন দাদামহাশয়!” গাড়ি চ’লে গেল! পৃথিবী ছইহাত দিয়ে মুখ ঢাকল। সেই নৈশ আকাশে একটা দীর্ঘনিশ্বাস উঠে মিলিয়ে গেল!—সে আজ তিন বৎসর হবে।—হাঁ ঠিক তিন বছর!

দয়াল। তা কে অস্বীকার কর্ছে!

বিশ্বেশ্বর। তার পর কত দীর্ঘ দিবস তার সেই হাসি মুখখানি, তার সেই স্বর বাতাসে ভেসে বেড়িয়েছে। কত দীর্ঘরাত্রি তার বায়বী মূর্ত্তিকে অশ্রুজলে স্নান করিয়ে দিয়েছি। সে ত মানবী নয় দয়াল!—সে যে দেবী, সে যে কবির কল্পনা, ধ্যানের ধারণা, মানসী প্রতিমা—তাই বৃষ্টি মহিম তাকে ধর্তে পারে নি।

দয়াল। ধর্তে বেশ পেরেছিল;—এখন আর সে সব কথা ভাব্লে কি হবে! একটা উপায় কর।

বিশ্বেশ্বর। উপায়!—হুঁ তাই ত! ছেলেটা বিগড়ে গেল।—দয়াল তোমার খাওয়া হয়েছে?

দয়াল। হাঁ, হয়েছে।

বিশ্বেশ্বর। উহু! সুবিধে রকম ঠেক্‌ছে না।—ভবানীপ্রসাদ।

দয়াল। এখন আপনি বিহিত একটা কিছু করুন।

বিশ্বেশ্বর। একটা কিছু কর্‌ক।—তাই ত।—একটা কিছু কর্‌ক।—ওহে ভবানীপ্রসাদ।

ভবানীপ্রসাদের প্রবেশ।

বিশ্বেশ্বর। ওহে একটা গান গাও ত।

দয়াল। গান গাইবে কি!

বিশ্বেশ্বর। আমার মাথাটা কি রকম কর্ছে। তাই ত—সেই বেণ্ণাটির কি রকম চেহারা?

দয়াল। নাও! এতক্ষণ পরে জিজ্ঞাসা করলেন কি না যে তার কি রকম চেহারা!

বিশ্বেশ্বর। আমার নাতিনীর চেয়ে সে ভালো দেখতে? তার চেয়ে টানা জ্র? তার চেয়ে নীল চক্ষু?—কখন উল্লাসে জলে ওঠে, কখন জলে ভরে আসে। তার চেয়ে মিষ্ট হাসি?—রাঙ্গা ঠোট হুথানি যেন ছুঙ্কুগুদ্র দন্তপাঁতির সঙ্গে সই পাতিয়েছে। তার চেয়ে স্নগোল বাহ?—সোণার চুড়ি যেন তাকে সোহাগে জড়িয়ে ধরেছে। তার চেয়ে কোমল করপুট? মল্লিকা আর জবা সেখানে প্রভুত্বের জন্ত যুদ্ধ কর্ছে। আমার নাতিনীর চেয়ে তার রং কি রক্তাভ শুভ্র, কণ্ঠস্বর ঝঙ্কারময়, লঘু গতি, ব্রীড়ানম্র ভঙ্গিমা, কৃষ্ণ কেশদাম? আহা সে ঘাড়টি নাড়ুত, আর পাশের চুলগুলি এসে মুখের উত্তর আদরে বাঁপিয়ে পড়তো।—

দয়াল। নাও, এখন কবিত্ব আরম্ভ হ'ল।

বিশ্বেশ্বর। সব চেয়ে ভাল তার চক্ষুদুটি! কত রকম চাইত।—গাও ভবানীপ্রসাদ। মায়ের নাম গাও।

গীত।

আর কেন মা ডাক্ছ আমায়, এই যে এইছি তোমার কাছে।

নাও মা কোলে দাও মা চুমা এখন তোমার যত আছে।

সাজ হ'ল খুলা থেলা, হ'রে এল সন্ধ্যাবেলা,  
ছুটে এলাম এই ভয়ে মা এখন তোমায় হারাই পাছে।  
অঁধার ছেয়ে আসে ধীরে, বাহ দিয়ে নাও মা ধীরে,  
ঘুমিয়ে পড়ি এখন আমি—মা তোমার ঐ বুকের মাঝে।  
এবার যদি পেইছি ছাঁমা, আর ত তোমায় ছাড়ব না মা—

ওমা, ঘরের ছেলে পরের কাছে মায়ে ছেড়ে সে কি বাঁচে।

[ গাইতে গাইতে ভবানীপ্রসাদের প্রস্থান।

দয়াল। কি বিস্বেশ্বর, কঁাদছ!

বিস্বেশ্বর। না। চল দয়াল, একটু বেড়িয়ে আসি।

দয়াল। চল।

[ উভয়ে নিঃশব্দ।

## দ্বিতীয় দৃশ্য

স্থান—শাস্তার গৃহকক্ষান্তর। কাল—গোধূলি।

শাস্তা একাকিনী।

শাস্তা। আজ আর কিছুই ভাল লাগছে না। যেমন আকাশ মেঘাচ্ছন্ন, তেমনি আমার মন মেঘাচ্ছন্ন। আমার জীবনের প্রধান কাজ যেন কালক্ষেপ করা। আমার জীবনের প্রধান সুখ—আপনাকে আপনি ভুলে থাকা। অথচ খাচ্ছি, শুচ্ছি, কোতুক করছি; এই জঘন্ত রূপকে দর্পণে দেখছি, মাজছি, সাজাচ্ছি—কেন? আর কোন কাজ নাই বলে'। [ দীর্ঘনিশ্বাস ]—একটা শুষ্ক নদী, একটা উষ্ণ ক্ষেত্র, একটা জীবহীন অরণ্য, একটা প্রাণহীন দেহ! [ জানালার কাছে গিয়া বাহিরের দিকে চাহিয়া ] বৃষ্টি পড়ছে, ঝিপ্ ঝিপ্ করে' বৃষ্টি পড়ছে।

[ ৮১



বাতাস নাই, বিদ্যুৎ নাই, মেঘগর্জ্জন নাই। একটা মলিন স্থির পক্ষি  
দিবস। আমার জীবনের প্রতিচ্ছবি।—কে ওস্তাদজি।

ওস্তাদজির প্রবেশ।

ওস্তাদ। হাঁ বেটি।

শাস্তা। আদাব। বৈঠিয়ে ওস্তাদজি।

ওস্তাদ। [ সেলামানস্তর বসিয়া ] হাম্কে। বোলায়ি থি বেটি ?

শাস্তা। জি।

ওস্তাদ। কিস্ ওয়াস্তে।

শাস্তা। ওস্তাদজি ! আপ্ মুঝ্ সে নারাজ হয়ে ?

ওস্তাদ। রজ্জ ? কুছ্ নেই।

শাস্তা। বেশখ্ হয়ে। এংনে রোজ্ মেরা সাখ্ মোশাকাং ভি  
কিনে, খবর ভি নহি লি ! একঠো খংভি নেই ভেজা !

ওস্তাদ। তুম্ হাম্‌রা কোন্‌ হায় বিবিসাহাব !

শাস্তা। নারাজ্ মং হোনা !

ওস্তাদ। গোসা হোনেসে তোমারি হরজ্ কেয়া ?—এইসেই দস্তর  
হায়। তুম্‌লোক একঠো জোয়ান মিল্‌নেসে নউলকা মাফিক সাখ্ সাখ্  
ফিরতে হো। এইসেই দস্তর হায়, এইসেই দস্তর হায় [ চক্ষু মুছিলেন ]  
লেকেন—মেজাজ সরিফ।

শাস্তা। আপ্‌কি দোয়াসে।

ওস্তাদ। তুম্‌ পর আশিক্ হায় ?

শাস্তা। কোন্‌ ?

ওস্তাদ। মরদ্ ?

[ শাস্তা মস্তক অবনত করিলেন ]

ওস্তাদ । এইসেই দস্তুর হায় । মরদ্ জোয়ান হায় ।—তুমতি পিয়ার কৰ্ত্তি হো ?

শাস্তা । আলবৎ ! আপু কেয়া সমঝাতে হেঁ ময় রুপেয়াকোয়ান্তে—

ওস্তাদ । কভি নেই । লেকেন উস্কো বিবি হায় ?

শাস্তা । কিস্কো ?

ওস্তাদ । তোমারে খসম্‌কো, তোমারে পিয়ারেকো, তোমারে জান্‌কো ?—উস্কো বিবি হায় ?

শাস্তা । [ অবনত মস্তকে নিম্নস্বরে ] হায় ।

ওস্তাদ । [ উঠিয়া ] জাহান্নম্‌মে যাও । [ সক্রোধে প্রস্থান ।

শাস্তা কিছুক্ষণ নীরব থাকিয়া কহিলেন “বুঝেছি ওস্তাদজি !—সত্য কথা । এ কথা আমার মনে যে পূর্বে আসে নি তা নয় ! ভেবেছিলাম, ভালবাসায় সব পবিত্র হয়, মাটি সোণা হয় ।—কিন্তু—না, তাই বা কেন ! প্রেম যার সঙ্গে, তারই গ্রায্য অধিকার ! নহিলে—

### গীত

তোমারেই ভালোবেসেছি আমি

তোমারেই ভালোবাসিব ।

তোমারই দুঃখে কাঁদিব সখে

তোমারই হুখে হাসিব ।

তব হাশ্তোজ্জ্বল-বিকশিত-শতদল—

বিতরিব তোমারি গোঁরব পরিমল ;

সজলজলদজালদান-গগন তলে

তোমারি নয়নজলে ভাসিব ।

মিলনে—করিব তব চিত্তবিনোদন

তোমারি মিলনগীতি গাহিয়া ;

বিরহে মলিনমুখে শূন্য নয়নে ছুখে  
 রহিব তোমাৰি পথ চাহিয়া ।  
 মেলেছি নয়ন তব জ্যোৎস্নাব জাগরণে,  
 মুদিব নয়ন তব শূন্য নয়ন সনে,  
 জীবনে মরণে আমি তোমারি, তোমারি কাছে  
 জনমে জনমে ফিরে আসিব ।  
 মহিমের প্রবেশ ।

শাস্তা। কে ! মহিম বাবু ?

মহিম। হাঁ আমি ।

শাস্তা। এসো প্রিয়তম ! [ অগ্রসর হইয়া আলিঙ্গনার্থ হাত  
 বাড়াইলেন ] এসো প্রাণাধিক ।—

মহিম। [ পিছাইয়া ] এ আবার কি ।

শাস্তা। আমি আপনাকে ভালোবাসি, এই আমার অপরাধ !  
 আমি আপনাকে—না, আমি আর ‘আপনি’ বলবো না । তুমি—  
 তুমি—তুমি ! তুমি আমার প্রিয়তম, তুমি আমার প্রাণের প্রাণ, তুমি  
 আমার হৃদয়ের হৃদয়, তুমি আমার জীবনের জীবন, তুমি আমার—  
 [ মহিমকে বাহবেষ্টন করিয়া ] তুমি আমার, আর কাবো নয় ।

মহিম। এ কি ব্যাপার !

শাস্তা। বিবাহ ?—বিবাহ নৈলে প্রেম নিষিদ্ধ ?—কে বলে !—  
 বিবাহ ? সে ত রেজেষ্টারি কবুলিয়ৎ লিখে দেওয়া—বোড়া দিয়ে  
 জমি ঘিরে নেওয়া । তাই বা কৈ ? প্রজাও জমি ছেড়ে দিতে পারে,  
 বিক্রয় কর্তে পারে । কিন্তু জী—আমৃত্যু ক্রীতদাসী । অবজ্ঞাত হোক,  
 পদাহত হোক, পরিত্যক্ত হোক—তাকে তার পতির পাদপদ্ম ধ্যান করে’  
 মর্ত্তে হবে ।—এই ত জী ।

মহিম। আজ এ সব কথা কেন শাস্তা ?

শাস্তা। প্রেম বিবাহজ না হ'লেই বেগ্যাসক্তি।—কে বলে ?—এই ত প্রেম। দাস্ত নাই, বিপত্তি নাই, দায়িত্ব নাই, ভবিষ্যৎ নাই—একটা অবাধ অগাধ অস্তির অসীম উচ্ছ্বাস ! আকাশের মত মুক্ত, শরের মত তীক্ষ্ণ, ঝড়ের মত প্রবল, বিদ্যুতের মত জ্বালাময়, তরঙ্গের মত উদ্দাম !—এই ত প্রেম !—[ মত্ত মাতঙ্গের মত টলিতে লাগিল ] প্রাণ ! মন, হৃদয়, জীবন, ইহকাল, পরকাল—একটি চুস্বনের মধ্যে !—এই ত প্রেম। নইলে—

মহিম। শাস্তা, শাস্তা [ গিয়া তাহার স্বন্ধে হাত রাখিলেন ]

শাস্তা। নহিলে দড়ি দিয়েই বাঁধ, লৌহশৃঙ্খল দিয়েই বাঁধ, আইন দিয়েই বাঁধ, আর মস্ত্র দিয়েই বাঁধ,—প্রেমহীন বন্ধনই অপবিত্র, বাধ্য আলিঙ্গনই বেগ্যাসক্তি ! না না, কি বলছি ! বেগ্যা আমি। বেগ্যার ঘরে আমার জন্ম। জঘন্ঠ রোপ্যের জন্ম দেহ বিক্রয় করেছে। বিবাহের মর্শ্ব আমি কি বুঝবো ? সমাজের আবর্জনা আমি; রাস্তার হন্তে কুকুর আমি; রোগীর ঞ্কার আমি। বিবাহের মর্শ্ব আমি কি বুঝবো !—[ পরে নিজের মস্তকের দুই পার্শ্ব চাপিয়া ধরিয়া উচ্চৈঃস্বরে ] সে দেশ রসাতলে যাউক যেখানে প্রথমে বেগ্যার সৃষ্টি হ'য়েছিল। সে বিধান নিপাত যাউক যে বিধানে বেগ্যা আজীবন বেগ্যা। সে পুরুষ নরকে যাউক যে এই লালসার প্রকাণ্ড অগ্নিকুণ্ডে ঘি ঢালে, যে এই কলঙ্কিনীকুলের কুলবৃদ্ধি করে !

মহিম। স্থির হও শাস্তা !

শাস্তা ধীরে ধীরে জানালার পার্শ্বস্থ একখানি চেয়ারে গিয়া উপবেশন করিয়া বাহিরের দিকে চাহিয়া রহিল।

মহিম। আশ্চর্য্য ! একপ ত' কখন দেখি নাই। এ কি সত্যই বেগ্যা ! [ শাস্তার কাছে গিয়া গায়ে হাত দিয়া ] শাস্তা !

শাস্তা। যান!—দিনটাও কি আমাব নয়?

মহিম। তাব অর্থ!

শাস্তা। তার অর্থ এই যে আমি এখন খানিক একেলা থাকবো। সেই অনুমতি ভিক্ষা কবি।

মহিম। কেন? আমি চলে' গেলেই কি তুমি বাঁচ?

শাস্তা। না। তবে লক্ষ্য কবেছেন কি, যে, বিহঙ্গ কখন বা সুর্যোজ্জ্বল নীলিমায় পক্ষ বিস্তার কবে' ওড়ে, যেন সে আহাব জানে না, চিন্তা জানে না, বিবাম জানে না, দুঃখ জানে না। কিন্তু সেই পক্ষীই আবাব কখন বা পক্ষ গুটিয়ে চক্ষু মুদ্রিত কবে' নীড়ে চূপ করে' বসে' থাকে, যেন সে কখন উড়তে শেখে নি।—দেখেছেন কি?

মহিম। দেখেছি।

শাস্তা। আমবা সেই জাতি। আমবা যখন পিঞ্জবেব গবাদেতে বক্তাক্ত সাপটেব যজ্ঞণাষ ছট্‌ফট্‌ কবি, আপনাবা হাশ্রমুখে তাই দাঁড়িয়ে দেখেন। আমবা যখন মর্শ্বে মর্শ্বে গুম্বে' ম্বে' যাই, আপনাবা হাসেন। আমাদের দেখে দুঃখ হয় না মহিম বাবু!

মহিম। না, তোমাদের দেখে আমাদের পবম স্মৃথ হয়,—নইলে বাড়ী ছেড়ে এখানে আসি।

শাস্তা। আঙ্ক যান।

মহিম। কেন! আমি কি তোমাব চক্ষু:শূল?

শাস্তা। তুমি আমাব সর্কস্ব! তুমি আমাব—[ জড়াইয়া ধবিলেন, তৎক্ষণাৎ সর্পাহতবৎ পিছাইয়া আসিলেন ] না—না, আপনি আমাব কেউ ন'ন, কেউ ন'ন।

মহিম। সে কি শাস্তা!

শাস্তা। আমিও আপনার কেউ নই। আমি তরুলতাটির মত উঠে আজ আপনাকে জড়িয়ে ঘিরে আছি। কিন্তু যেদিন আপনার আমাকে আর ভাল লাগবে না, সেদিন আমার বাহর এই ক্ষণ বেঠন-বন্ধন ছিঁড়ে আপনি চলে' যাবেন।

মহিম। কে বললে ?

শাস্তা। আমি জানি ! আমি জানি !

মহিম। কখন যাবো না।

শাস্তা। যাবেন না ! সত্য বলুন, যাবেন না ! সত্য বলুন—বুকে হাত দিয়ে বলুন দেখি—আপনি আমায় ভালোবাসেন ? সত্য ? সত্য ?

মহিম। বাসি।

শাস্তা। জীব চেয়ে ! নিজের চেয়ে ? আত্মার চেয়ে ?—আমি যেমন ভালোবাসি ?

মহিম। বাসি শাস্তা।

শাস্তা দীর্ঘনিঃশ্বাস ফেলিল। দাসী দীপ লইয়া আসিল ও রাখিয়া প্রস্থান করিল।

মহিম। রাত হ'ল একটা গান গাও।

শাস্তা। আপনার জী কি রকম দেখতে ?

মহিম। অতি সুন্দরী।—

শাস্তা। খুব সুন্দরী !

মহিম। একদিন না হয় গিয়ে দেখে এসো !

শাস্তা। তিনি আপনাকে ভালবাসেন ?

মহিম। বাসে।

শাস্তা। কিন্তু এই রকম ?

মহিম। কি রকম ?

শাস্তা। আমার মত ?—যেন সমুদ্রের উত্তালতরঙ্গ ? রাহুর গ্রাস ? দাবান্লির আলিঙ্গন ? ব্যাঘ্রের ক্ষুধিত গর্জন ? আমি যেমন ক্রুদ্ধ ফণিনীর মত উখিত ফণা তুলে—না না, পালান, পালান !—আমি আপনার সর্বনাশ ; আমি আপনার অভিশাপ ; আমি আপনার নরক ! —পালান, পালান !

## তৃতীয় দৃশ্য

স্থান—শাস্তার বাসবাটীর সম্মুখে রাস্তা। কাল—জ্যোৎস্না রাত্রি

বিশ্বেশ্বর, ভবানীপ্রসাদ ও দয়াল প্রবেশ করিলেন।

বিশ্বেশ্বর। এই বাড়ী বোধ হচ্ছে।—না দয়াল ?

দয়াল। কিন্তু তোমার তাতে কি ? তুমি বুড়ো মানুষ—এ সময়ে—

বিশ্বেশ্বর। না, আমি একবার তাকে দেখবো।

দয়াল। দেখে কি হবে ?

বিশ্বেশ্বর। দেখবো, সে কত বড় সুন্দরী। নৈলে আমার নাতিনীকে ছেড়ে—না, আমি একবার দেখবো !—কি ভবানীপ্রসাদ ! অত করুণভাবে মাথা নাড়ছে যে !

দয়াল। কিন্তু—

বিশ্বেশ্বর। না, না, আমার নাতিনীর এখনকার চেহারা তুমি দেখনি দয়াল। তাই বলছ। তার সেই গোলাপী রঙ্গের গোল গাল ছুটি ছাইয়ের মত সাদা হ'য়ে গিয়েছে। তার চক্ষুর অপাঙ্গে কে যেন

কালি লেপে দিয়েছে। তার সেই নিটোল কপালে দাগ প'ড়ে গিয়েছে। তার মাখমের মত শরীর বাঁকারির মত শুকিয়ে গিয়েছে। তার মুখে অব্যক্ত বেদনা। তার চক্ষে দুঃস্বপ্ন।

দয়াল। তা ত বুঝলাম। কিন্তু এ বেশীকে দেখে কি হবে!

বিশ্বেশ্বর। সে—সে আমায় দেখে হাসল—সে যেন কঙ্কালের হাসি; আমায় 'দাদামহাশয়' বলে' ডাকল, সে স্বর যেন একটা শুষ্ক ব্যঙ্গ; আমায় প্রণাম করল, অমনি তার চোখ ছুটি দিয়ে দর দর করে' ধারা ব'য়ে গেল; আঁচলে মুখ ঢাকল।—তাকে বললাম, আমার সঙ্গে চলে' আয়; সে তার কি উত্তর দিলে জানো!

দয়াল। কি?

বিশ্বেশ্বর। বল্ল—'না দাদামহাশয়! আপনি ত আমায় জন্মের মত বাড়ী থেকে বিদায় করে' দিয়েছেন—এখন এই আমার ঘর, এই আমার আশান'। আমি তখন তাকে জড়িয়ে ধরে'—বুড়ো মানুষ আমি—চঁচিয়ে কেঁদে উঠলাম।

দয়াল। এই!—এই!—আবার চঁচিয়ে কেঁদে উঠো না যেন!

বিশ্বেশ্বর। না। কেঁদে কি হবে! যখন হাত পা বেঁধে জলে ফেলে দিয়েছি, তখন সে গিয়েছে। কেঁদে কি হবে!—কিন্তু আমি একবার এই স্তন্দরীকে দেখবো।

দয়াল। দেখেই বা কি হবে?

বিশ্বেশ্বর। যদি সে আমার নাতিনীর চেয়ে স্তন্দরী হয়, তা হ'লে তাকে কিনে নিয়ে গিয়ে, পূজার দালানের কোলোঙ্গায় সাজিয়ে রেখে দেবো।

দয়াল। তুমি কি ক্ষেপেছ?



বিশ্বেশ্বর । হয় ত ।

ভবানী হতাশভাবে দেওয়ালে হাত দিয়া উর্দ্ধমুখে দীর্ঘশ্বাস ফেলিলেন ।

বিশ্বেশ্বর । আমি ক্ষেপেছি দয়াল । সত্যই ক্ষেপেছি । আগি একবার [ উপরে শাস্তা গবাক্ষদ্বার খুলিয়া দিল ] ।—ঐ না ?

দয়াল । কৈ ?

বিশ্বেশ্বর । ঐ যে ।

দয়াল । হাঁ, ঐ বটে !

বিশ্বেশ্বর । দেখি !—[ চসমা পরিয়া তাহার দিকে একদৃষ্টে চাহিয়া রহিলেন ] সুন্দরী !—হাঁ সুন্দরী ।—ঠোট ছোটো তেমন পাতলা নয়—লালসাময় । মুখখানি গোল নিটোল ।—সুন্দরী ! চোখ ছোটো টানা নয়—তবে মুখের উপর ভাসছে বটে । দীর্ঘকেশী ।—সুন্দরী !—তবে আমার নাতিনীর মত নয় । ঐ ! হাসছে ।—সুন্দর । মন্দ নয়, কিন্তু হাসিতে প্রাণ নেই । ঐ আবার ।—সুন্দর ।—হঁ সুন্দর ।

দয়াল । বুড়ো মজে' গিয়েছে ।

বিশ্বেশ্বর । ভবানী'প্রসাদ ! বড় রাস্তায় গাড়ী রৈল । মাসে পাঁচ শ' । নিয়ে একেবারে ট্রেনে ।—কাশী !—বুঝ্লে !—একবার নেশা ছুটে গেলে, আবার ঠিক হবে । চল দয়াল ।—বুঝ্লে ভবানী পাঁচ শ' । [ বিশ্বেশ্বর ও দয়ালের প্রস্থান ।

ভবানী । গল্প বেশ জমে' আসছে । এর পর কি হয় বলা যায় না । জ্ঞানলোক নিয়ে সুন্দ উপস্থানের যুদ্ধ বেধেছিল শুনেছি । কিন্তু নাতজামাই আর দাদাশ্বশুরে যুদ্ধ—পুরাণে লেখে না । যা' হোক, এরা সকলেই কিছু না কিছু কছে ! আর আমি ? হসন্তর মত নীচে পড়ে

আছি, আর গান গাচ্ছি। জগতের কোন কাজেই লাগ্ছি না—ঐ বুঝি।—হাঁ। সঙ্গে কে!—এ কি! স্বপ্ন দেখ্ছি না কি! [অন্তরালে অবস্থিতি]

কথা কহিতে কহিতে শাস্তা ও হিরণ্ময়ী গৃহদ্বার খুলিয়া বাহির হইয়া আসিল।

হিরণ্ময়ী। তবে আমি চললাম।

শাস্তা। কোথায়?

হিরণ্ময়ী। কোন বিশেষ দিক্ নাই, কোন নির্দিষ্ট পথ নাই।—যে দিকে চক্ষু যায়। তোমার আংটিটি আমি রাখলাম। হয় ত আবার একদিন ঘূর্ত্তে ঘূর্ত্তে এখানে আসবো।—আত্মহত্যা কর্ৰ ভেবেছিলাম—না, তা কর্ৰ না। ঘরেও প্রবেশ কর্ৰ না।

শাস্তা। কেন?

হিরণ্ময়ী। না, যে ঘর ছেড়েছি, সে ঘরে আর প্রবেশ কর্ৰ না। তার পবিত্র দেবালয়ে প্রবেশে আমার অধিকার নাই। তোমার ঘরেও ঢুকিনি দেখ্লে না? তার কারণ কি জান?

শাস্তা। কি কারণ?

হিরণ্ময়ী। ঘরের মধ্যে গেলেই মনে হয় যে, তার কোণ থেকে সহস্র কেউটে সাপ ফণা বিস্তার করে' আমার পানে ধেয়ে আসছে; তার ছাদ্দি' নেমে এসে আমার বকে চেপে ধরেছে; নিশ্বাস ফেলতে পারি না।

ভবানী। অভাগিনী!

হিরণ্ময়ী। [চমকিয়া] ও কার স্বর!—ও কে।—এখানে ভূত আছে না কি। পালাই পালাই। [বেগে প্রস্থান।]

ভবানী। উন্মাদিনী।

শাস্তা। মুক্তি ও দাস্ত, আশা ও নৈরাশী, লাভ ও সর্বনাশ, স্বর্গ ও নরক আমার প্রজ্জ্বলিত মস্তিষ্কের ধূমায়িত রক্তমঞ্চে হাত ধবধরি করে' নৃত্য কচ্ছে। [জানু পাতিয়া করঘোড়ে উর্কে চাহিয়া]—ক্ষমা ক'রো। আমি জাস্তাম না।

ভবানী। [অগ্রসব হইয়া] মা !

শাস্তা। কে—কে আপনি ?

ভবানী। ব্রাহ্মণ।

শাস্তা। ভিক্ষা চান ?

ভবানী। না।

শাস্তা। তবে ?

ভবানী। কিছু বক্তব্য আছে।

শাস্তা। কি ! বলুন !

ভবানী। তুমি কে মা !

শাস্তা। আমার নাম শাস্তা—বেশা।

ভবানী। ছলনা ক'চ্ছ ?

শাস্তা। না ব্রাহ্মণ !

ভবানী। তবে কাঁদছিলে কেন ?

শাস্তা। তা জেনে আপনার কি হবে ?

ভবানী। তোমার কি হুঃখ আমায় বল।

শাস্তা। বেশার কি হুঃখ ? তাই আবার জিজ্ঞাসা ক'চ্ছেন !

ভবানী। বুঝেছি ! তবে এই দূষিত বায়ু ছেড়ে, এসো মা আমার সঙ্গে, মায়ের চন্দন-সুগন্ধ পবিত্র মন্দিরে—শান্তি পাবে।

শাস্তা। শাস্তি পাবো ! ব্রাহ্মণ ! তুমি কি বাতুল !

ভবানী। হবে !

শাস্তা। কিংবা আমি কিছু বুঝতে পারছি না। আমার মাথার ঠিক নাই।—শাস্তি পাবো ! আমি ! আমার শাস্তি [পিস্তল দেখাইল]

ভবানী। [ সভয়ে ] ও কি !

শাস্তা। আমার আর সময় নাই। [ প্রস্থান।

ভবানী। কে এ নারী—আশ্চর্য্য ! [ প্রস্থানোত্তত ]

মহিমের প্রবেশ।

ভবানী। এই যে সেই লম্পট। দেখি কি করে।

মহিম। চপলা ! চপলা ! [ দ্বারে আঘাত ]

দ্বার খুলিয়া দাসীর প্রবেশ।

দাসী। ঠাকরুণ বাড়ীতে নেই গো !

মহিম। কোথায় ?

দাসী। জানি না।

মহিম। ‘জানি না’ কি রকম !—রাতে আমায় না বলে’ ক’য়ে !—

ভবানী। [ অগ্রসর হইয়া ] তুমি কত দাও ?

মহিম। কে তুমি ?

ভবানী। ব্রাহ্মণ।—তুমি কত দাও ?

মহিম। চার শ’।

ভবানী। সে হেঁকেছে পাঁচ শ’।

মহিম। কে !

ভবানী। এক চুল-পাকা গাল তোবুড়ানো মাস্কাতার আমলের

বুড়ো। তিনকাল গিয়েছে এককাল আছে—তাও আছে কি না সন্দেহ।  
কিন্তু তার টাকা আছে।

মহিম। তার সঙ্গে বেরিয়ে গিয়েছে ?

ভবানী। সে ত আর তোমার জীটি নয় যে লাখি ঝাঁটা খেয়ে  
পায়ের তলায় পড়ে থাকবে। তুমি দাও চার শ' সে হেঁকেছে পাঁচ শ'!

মহিম। বেশ! আমি দেবো ছ' শ'!

ভবানী। হাঁ, নিলামে চড়িয়ে দাও। প্রেমটাকে নিলামে চড়িয়ে  
দাও। তার পরে সে ডাকবে সাত শ', তুমি ডেকো আট শ'।

মহিম। তুমি কে ?

ভবানী। আমাকে তোমার চিন্তার কথা, তবে প্রথম প্রেমে  
কারো আশে পাশে চাইবাব অবসর থাকে না।—নৈলে—

মহিম। চলে' যাও।

ভবানী। এই যাচ্ছি! মেরো না!—

মহিম। আচ্ছা, আমি দেখে নিচ্ছি—সেই কেমন আব আমিই  
কেমন! ছাড়ছি না।—দেখেঙ্গে। [ প্রস্থান।

ভবানী। যাও য়াও—অধঃপাতে যেতে বসেছো, যাও। স্বয়ং  
ভগবান্ তোমায় রক্ষা কর্তে পারেন না, তা দাদামহাশয়। যে উচ্ছন্ন  
যেতে বসেছে সে যাবে! কেউ তার গতিরোধ কর্তে পারেন না। কিন্তু  
এই নারী—আশ্চর্য্য! [ প্রস্থান।

হিরণ্ময়ী হাত ধরিয়৷ পার্কতীর প্রবেশ।

পার্কতী। এসো বলছি।

হিরণ্ময়ী। ছেড়ে দাও।

পার্কতী। ঘরে চল—সুখে রাখবো।

হিরণ্ময়ী। ঘরে!—না, ঘরে যাবো না! প্রতিজ্ঞা করেছি।

পার্কস্‌তী। রোদ্দ বৃষ্টি শীতে কেন মিছে—

হিরণ্ময়ী। রোদ্দ বৃষ্টি শীত খল পুরুষদের চেয়ে ভাল। রোদ্দ যখন পোড়ায়,—পোড়ায়, বলে না যে সে গোলাপ জলে স্নান করিয়ে দিতে এসেছে। শীতের দাঁত যখন মাংস কেটে বসে—সোজা বসে, তার মধ্যে চলনা নাই। বৃষ্টি যখন নামে—প্রেমালিঙ্গন করে না, সোজা শত্রুভাবে মুখের উপর ছড়িয়ে পড়ে!—ছেড়ে দাও।

পার্কস্‌তী। আমার সঙ্গে এসো।

হিরণ্ময়ী। আমি যাবো না।—পাষাণ নরাদম তুমি; ছেড়ে দাও বলছি—নহিলে চাঁচিয়ে সহর শুদ্ধ এখানে এনে জড় করব। ছেড়ে দাও বলছি।

পার্কস্‌তী। আমার কিছু বলবার আছে।

হিরণ্ময়ী। এখানে বল।

পার্কস্‌তী। তবে ঐ গাছতলায় চল।

হিরণ্ময়ী। তা চলণ [ উভয়ের প্রস্থান।

চারু ও বিনোদের প্রবেশ।

চারু। ওহে পার্কস্‌তী একটা জীলোকের পিছনে পিছনে গেল না?

বিনোদ। হাঁ গেল বটে!—সেই জীলোকটা বোধ হ'ল।

চারু। কোন্ জীলোকটা?

বিনোদ। ঐ সেইদিন বাগানে যে সাহানায় কড়ি মধ্যমের মত এসে পড়ল।

চারু। বটে বটে! এর মধ্যে নিশ্চয়ই একটা গুড় ব্যাপার আছে।  
চল চল, দেখা যাক কি করে। [ উভয়ে নিষ্কাশ্য ]

দয়াল ও ভবানীর প্রবেশ।

দয়াল। রাজী হ'ল না?

ভবানী। না!

দয়াল। তুমি গুছিয়ে বলতে পার নি।

ভবানী। তা পারি নি।

দয়াল। কেন পারলে না?

ভবানী। ঘাবড়ে গেলাম!

দয়াল। কেন!

ভবানী। জ্যোৎস্নালোকে তার স্নান মুখখানি দেখলাম,—সে নতজাহ্নু হ'য়ে করযোড়ে উর্দ্ধমুখে সজলনেত্রে প্রার্থনা ক'চ্ছিল “আমায় ক্ষমা করে”—কাকে বল্ল তা জানি না; কেন বল্ল তাও জানি না। কিন্তু আমার চোখে জল এলো। তার কণ্ঠস্বর যেন কোথায় গুনেছি বলে মনে হ'ল। আমার বক্তব্য আমি গুছিয়ে বলতে পারলাম না।

দয়াল। তুমি অত্যন্ত অপদার্থ।

ভবানী। নেহাইৎ।—তার পর নাতজামাইয়ের সঙ্গে দেখা হ'ল।

দয়াল। মহিমের সঙ্গে দেখা হ'ল?

ভবানী। হ'ল।

দয়াল। সে কি বল্ল?

ভবানী। হিন্দী কৈল।

দয়াল। কি হিন্দী?

ভবানী। বল্ল “দেখেঙ্গে”।

দয়াল। হারে হতভাগা! নিজের জিনিস মনে ধরে না! লাল ওড়না আর ক্লিওপ্যাট্টা খোঁপা দেখে ভুলে যাস। সাধা হাসি আর

ঝাঁকা চাহনিতে মজে' থাকিস্ ! যরের লক্ষ্মীকে ছেড়ে অলক্ষ্মীকে আশ্রয় করিস্ । মঙ্গলপ্রদীপ ছেড়ে জোনাকি খণ্ডে ছুটিস্ ।—

ভবানী । এ উপমাগুলো দিলে বোধ হয় সে বুঝতো ! আপনি গেলেন না কেন বোঝাতে ?

দয়াল । কি কর্তাম ?

ভবানী । উপমা দিতেন !

দয়াল । আরে উপমা দিয়ে কি হবে ?

ভবানী । তাও ত বটে !

দয়াল । ওরে মূর্খ ! প্রেমে পড়ে' উচ্ছন্ন যাস্, নিজের ও পরের সর্বনাশ করিস্, সে নেশা কতক বুঝতে পারি । কিন্তু ক্রীত চুশনে ও প্রাণহীন আলিঙ্গনে কি সুখ পাস্ বুঝি না ।—বলিহারি !

ভবানী । বলিহারি !

দয়াল । চল ।

ভবানী । চলুন ।

[ নিজ্রাস্ত ]

## চতুর্থ দৃশ্য

স্থান—পার্কতীর গৃহকক্ষ । কাল—রাত্রি ।

পার্কতী একাকী ।

পার্কতী । সে কাজ করেছি ।—কি ভয়ঙ্কর ! অথচ কি সহজ !—  
পাপ আর গুরুতর পাপের মধ্যে তফাৎ—এক ধাপ মাত্র ! পাপের  
রাজ্যেও একটা শৃঙ্খলা আছে । নৈলে সে রাজ্য চলেবে কেন । পাপের



রাজ্যে বাস কর্তে চাও, ত তার আইন মেনে চলতে হবে ! এক জায়গায় খাড়া হ'য়ে থাকতে পার্কে না । হু উখান না হয় পতন !— হতেই হবে । উঠতে হ'লে, শক্তিবলে কৃত পাপের গুরুভার ঠেলে উঠতে হবে—শক্ত । নামতে চাও, নিজ ভারে নেমে যাবে—অত্যন্ত সহজ !— ও কি !—না, পেচকের শব্দ !—যাক্ । মৃত জিহ্বা নড়ে না ।—বাস্ !— ও কি শব্দ !—কে ?—কৈ !—

চারু, বিনোদ ও কালীচরণের প্রবেশ ।

পার্বতী । এ—এ কি ! তোমরা এত রাত্রে !

চারু । রাত্রি ন'টার বেশী হবে কি ?

পার্বতী । না—তা—তা—রাত আর এমন বেশী কি !

বিনোদ । এই বেড়াতে বেড়াতে এইদিকে এলাম !

পার্বতী । তা—তা—বেশ করেছে ।

চারু । এতক্ষণ ছিলে কোথায় ?

পার্বতী । কোথায় !—

চারু । তাই জিজ্ঞাসা করছি ! ছিলে কোথায় ?

পার্বতী । ছিলাম কোথায় !—

বিনোদ । বলি, বনে ঝোপে কি করা হচ্ছিল !

পার্বতী । কৈ—না—আমি ত—

চারু । ও রকম করছ কেন ?

বিনোদ । কাঁপছ যে !

পার্বতী । না । আমি—আমি ত করিনি ।

চারু । কি কর নি ?—কালী, জানো না ?

কালী । Where ignorance is bliss it is folly to be wise.

বিনোদ । আমরা দেখেছি !

পার্কী । কি দেখেছ !

চারু ও বিনোদ উচ্চ হাস্য করিলেন ।

পার্কী । না না, আমি করি নি । এই দেখ !—এ কি ! হাতে  
রক্তের দাগ !—না, আমি ত হত্যা করি নি । সে জলে নিজেকে পড়ে' গিয়েছিল ।

চারু ও বিনোদ পুনরায় উচ্চ হাস্য করিলেন ।

পার্কী । অত চেষ্টায়ে হাস্ছ কেন ?—যাও, এখান থেকে বেরোও ।

চারু । চল বিনোদ ।

[ সহাস্তে উভয়ের প্রস্থান ।

কালী । When ill indeed, dismissing the doctor don't  
always succeed.

পার্কী । তুমিও দেখেছ ?

কালী । বুঝেছি পার্কী !—You have sown the wind and  
shall reap the whirlwind.

পার্কী । আমি' ত হত্যা করি নাই ।

কালী । For the wages of sin is death.

[ প্রস্থান ।

পার্কী মুখব্যাধান করিয়া দাঁড়াইয়া রহিলেন ; পরে সহসা দৌড়িয়া  
বাহির হইতে হইতে গুরুস্বরে ডাকিতে লাগিলেন “কালীচরণ—চারু—  
বিনোদ ।—শোন—শুন য়াও—”

[ নিক্রান্ত ]

## পঞ্চম দৃশ্য

স্থান—সরষুর কুটীর-প্রাঙ্গণ । কার্গ—রাত্রি ।

সরষু অর্দ্ধশয়ান অবস্থায়—ভূমিশয্যায় উর্দ্ধে চাহিয়া ছিল ।

সরষু । অমাবস্তা রাত্রি ! আকাশ নির্মল !—উঃ ! কি উজ্জ্বল ঐ নক্ষত্রগুলো—আচ্ছা, ওগুলো কতদূরে । দাদামহাশয়ের কাছে শুনেছি, ওগুলো এক একটা সূর্য্য ।—এই সময় তিনি ছাদে আমার কোলে মাথা রেখে শুয়ে থাকতেন ; আমি তাঁর মাথায় হাত বুলিয়ে দিতাম ; আর তিনি কত দেশের যুগযুগান্তের ইতিহাস, পৃথিবীর জন্মকথা, মহাত্মাদের জীবনচরিত, জ্যোতির্মণ্ডলের বিবরণ আমায় শোনাতেন । আমি সেই মায়াময় উপাশাস মন্ত্রমুগ্ধবৎ শুনতাম ।—ঐ বুঝি তিনি এলেন ! উঠিয়া বসিলেন ] না, এ কে ?

শাস্তার প্রবেশ ।

সরষু । কে ?

শাস্তা । এ কি ! এই ধূসর বসনে, রুক্ষকেশে, ভূমিশয্যায় !—

সরষু । কে তুমি ?

শাস্তা । এই স্ত্রী ! এই সতী !—মুখে কি জ্যোতিঃ ! ললাটে কি মহিমা ! অঙ্গে কি লাবণ্য !—শৈলমূলে প্রভাতমণ্ডিত হ্রদের মত শাস্ত, স্বচ্ছ, সুন্দর । এই সতী ! ঐ ভূমিশয্যা মনে হচ্ছে যেন স্বর্ণসিংহাসন, ঐ মাথার কাপড়খানি জলছে যেন হীরার মুকুট—এই সতী !

সরষু । তুমি কে ?

শাস্তা । শয্যতানী ! এই দেবীর সম্মুখে নতজান্ন হ'য়ে হাত বোড় করে' দাঁড়া ।—দেবি ! [ 'নতজান্ন হইয়া ' ] দেবি !—

সরষু। কিছু বুঝতে পারছি না।—কে তুমি বোন?

শাস্তা। হাঁ—বোন বলে ডাক; আমায় ধন্ত কর; আমায় এই পঙ্ক থেকে উদ্ধার কর।—আমায়—

সরষু। কে তুমি?

শাস্তা। এই কুঁড়ে ঘরে তুমি থাক?

সরষু। হাঁ।

শাস্তা। তোমার দাদামহাশয় শুনেছি বড়মানুষ।

সরষু। হাঁ। তাই কি?

শাস্তা। তিনি তোমায় টাকা পাঠান না?

সরষু। পাঠান।

শাস্তা। কত?

সরষু। মাসে পাঁচ শ'।

শাস্তা। তবে!—ও!—বুঝেছি। তবে এই টাকা থেকেই তোমার স্বামী বেঞ্জার খরচ যোগান?

সরষু। [ চমকিয়া ] কার?

শাস্তা। তাঁর এক গণিকা আছে জানো না?

সরষু। কে তুমি! কি সাহসে আমার কাছে এসে আমার পতিনিন্দা কর্ছ।—সমস্ত মিথ্যা কথা!—যাও।

শাস্তা। আমার কাছে গোপন করে' আর কি হবে দিদি! আমি যে সবই জানি।

সরষু। জানো—জানো। আমার কাছে তা বলার কোন প্রয়োজন নাই।

শাস্তা। প্রয়োজন আছে। এ তোমারই দোষ—

সরষু। কি, আমারই দোষ!

শাস্তা। তোমার স্বামীর কামাগ্নির ইন্ধন যে তুমিই যোগাচ্ছ দিদি। তাঁর বেশ্যার খরচের টাকা যুগিয়ে তোমার মতিচ্ছন্ন স্বামীর উচ্ছন্ন বাবার পথ যে তুমিই প্রশস্ত করে' দিচ্ছ। আর এক পরসাত্ত্ব দিও না। স্বামীকে অধঃপাতে যেতে দেওয়া কি সতীধর্ম! স্ত্রী সহধর্মিণী, সহ-অধর্মিণী নয়—

সরষু। আমি শুস্তে চাই না। পতিনিন্দা শোনা পাপ। যাও।

শাস্তা। তোমার যদি কষ্ট হয় ত আর বলবো না দিদি! আমায় বোন্ বলে' ডেকে তুমি আমার সাহস বাড়িয়ে দিয়েছ।—আর বলবো না। তবে আমি আসি দিদি! [প্রস্থানোত্তত]

সরষু। কোথায় যাও বোন্। যেও না। আমি বড় দীন, আমি বড় একা। আমার কেউ নাই!—যেও না।

শাস্তা। সে কি দিদি! তোমার স্বামী তোমায় ভালবাসেন না?

সরষু। একদিন বাস্তুনে।

শাস্তা। আর তুমি?

সরষু। বাস্তুম! পুরুষ যদি বোবনের প্রথম উন্মাদনায় এক মুক্কা সরলা বিহ্বলা বালার পদতলে পড়ে, জগতে কয়জন বালিকা আছে যে ভাল না বেসে থাকতে পারে? আর আমাদের বিবাহ হয়েছিল। সে ভালবাসার কোন বাধা ছিল না। তাঁকে ভালবাসা ভিন্ন আমার কোন উপায় ছিল না।

শাস্তা। তার পর?

সরষু। তার পর—

শাস্তা। বল বোন্, তার পর?

সরষু। তার পর যে দিন দেখলাম যে তাঁর বৃদ্ধা মাকে ছেড়ে তিনি

আমার উপাসনা কচ্ছেন, সে দিন প্রথম আমার মনে ভয় হ'ল!—তখন মনে হ'ল—এ ত প্রেম নয়; প্রেম ত কর্তব্য ভোলায় না, কর্তব্য শেখায়; এ একরকম আসক্তি, যার পরিণাম শুভ হ'তে পারে না।

শাস্তা। মিথ্যা বল নি দিদি!

সরযু। আমার ভয় হ'ল।—সেই ভয় থেকে অবসাদ এলো! নিজের জীবনের ভবিষ্যৎ মনে করে' শিউরে উঠলাম! এখনও মনে গড়ে উঃ!

শাস্তা। তার পর!

সরযু। তার পর অনাহারে বিনা চিকিৎসায় আমার পুত্র মারা গেল। সংসার অন্ধকার দেখলাম। কিন্তু সেই অন্ধকারে পথ খুঁজে নিলাম। জীবনের সমস্ত আশা এতীর কর্তব্যপালনে নিবেশ করলাম। মনকে দৃঢ় করলাম;—প্রতিজ্ঞা করলাম, আর ভালবাস্তে পারি না পারি, চিরজীবন স্বামীর প্রতি জীবন কর্তব্য—সতীত্ব পালন করে' যাবো—কপালে যা'ই থাক্। এখন সেই দিক লক্ষ্য করে' চলেছি।

শাস্তা। সরযু! দিদি! তুমি মানবী নও, তুমি দেবী!—

সরযু। তার পর আর শুন্তে চাও?

শাস্তা। না, আর সবই আমি জানি!

সরযু। জানো?—কিছু জানো না!—এক বিরাট ভালবাসার অমৃত-সমুদ্র আমার সম্মুখে পড়ে' রয়েছে, কিন্তু তৃষ্ণায় আমার ছাতি ফেটে যাচ্ছে। জানো কি যে আমার বর্তমান যেমন অন্ধকার, ভবিষ্যৎ তেমনি অন্ধকার—এ অন্ধকারে নক্ষত্র নাই, বিদ্যা নাই, জোনাকিও নাই; জানো কি যে দিনে দিনে বন্দারোগীর মত আমার ভিতরে সব ক্ষয় হ'য়ে যাচ্ছে! জানো কি!—না, তুমি কি জানবে! তুমি কি জানবে!

শাস্তা । [হাত ধরিয়া] জানি দিদি ! আমি যে তোমার চেয়ে ছঃখিনী ।  
তুমি ত কর্তব্য করে' যাচ্ছ । আমি আমার কর্তব্য খুঁজে পাই না ।

সরষু । কে তুমি !—এত দয়ার্জ হৃদয়, এত কোমল স্পর্শ, এত  
গদগদ স্বর !—কে তুমি ! আমি তোমার সম্মুখে আমার হৃদয়ের ছয়ার  
খুলে দিলাম—যা এতদিন কারো কাছে করি নি !—কে তুমি যাহুকরী !  
যে আমার নিগূঢ় ব্যথা আমার প্রাণ নিংড়ে বের করে' নিলে ! এ কথা  
ত কারো কাছে বলি নি—তোমার কাছে বলতে গেলাম কেন !—কেন  
বললাম !

শাস্তা । দিদি ! যা বলেছো তার জন্ত তোমায় কখন অনুতাপ কর্তে  
হবে না । ভগবানের কাছে প্রার্থনা কবি—যে তেঁমার সংসার আবার  
সুখের হোক । যাব জন্ত তোমার সব গিয়েছে, সে তোমাব 'স্বামীকে  
তোমায় ফিরিয়ে দেবে !

সরষু । সে ত বেণী—

শাস্তা । বেশ্যা ব'লেই তাকে ঘৃণা করো না । জেনো দিদি,  
অনেক পুরুষ বেশ্যার অধম । [ প্রস্থানোত্তত, 'পুনরায় ফিরিয়া ] সে  
বেশ্যাকে তুমি দেখেছো ?

সরষু । না ।

শাস্তা । তবে দেখ, এই সে হতভাগিনী—তোমার সম্মুখে । [ বক্ষে  
করাঘাত করিয়া ] এই শাস্তা বেশ্যা ! [ ক্রত প্রস্থান ।

[ সরষু একদৃষ্টিতে সেই দিকে চাহিয়া রহিলেন ]

অপর দিক্ দিয়া টলিতে টলিতে মহিমের প্রবেশ ।

মহিম । আমি একবার দেখুবো ! পাজি !—একবার দেখবো ।—  
কে ! ও তুমি !

সরষু। হাঁ আমি।

মহিম। সরে' দাঁড়াও।

সরষু দ্বার ধরিয়া দাঁড়াইয়া রহিলেন।

মহিম। সরে' দাঁড়াও। আমার ছায়া মাড়িও না—

সরষু। কেন ! আমি কি তোমার আপদ ?

মহিম। তুমি আমার—[ বিকট শব্দ করিয়া শুইলেন ]

সরষু। তোমার আজ কি কোন অসুখ করেছে ?

মহিম। [ উঠিয়া ] ঘ্যান্ ঘ্যান্ ক'রো না বলছি। আমার মেন্জাজ ঠিক থাকে না। তোমাকে দেখলে আমার জ্বর আসে।

সরষু। এতদূর ! ওঃ—আর সহ্য হয় না।

মহিম। 'সহ্য হয় না।'—তোমার বাপের বাড়ী চলে' যাও, এখানে যদি তোমার না পোষায়।

সরষু। এখানে যদি আমার না পোষায় !—আমি কি তোমার দাসী না গণিকা—যে এখানে যদি আমার না পোষায় অত্নত চলে' যাবো ? আমি কি ভাতের কাঙ্গাল হ'য়ে তোমার বাড়ীতে পড়ে' আছি ?

মহিম। তবে !—

সরষু। হা বিধি !—আমি নিজের জন্ত এখানে পড়ে নেই ; তোমার জন্ত পড়ে' আছি। এ ঘর—ভাঙ্গা হোক পোড়া হোক,—এ ঘর তোমারও যেমন, আমারও তেমনি ! আমার এ সংসার ভাঙ্গা হাট,—কিন্তু তবু সে আমারই সংসার। নিজের সংসার ছেড়ে কোথায় যাবো ! স্বামীর আসন্ন সর্বনাশ দেখে কোন হিন্দু সতী পতিকে ছেড়ে চলে' যায় !

মহিম। ওঃ ! ভারি আমার সতী রে !

সরষু। দেখ, আমি সতী কি অসতী, সে কথার বিচার একজন



মাতালের মুখে, একজন বেণ্ডাসক্তের মুখে শুন্তে চাই না। আমার সতীত্ব আমার ধর্ম—তোমার নয়।

মহিম। তোমার ধর্ম !

সরষু। হাঁ, আমার ধর্ম ! সেই দেবতার পূজার তুমি ত বিশ্বদল মাত্র ! তবে তোমার পবিত্রতা কামনা করি এই কারণে, যাতে সেই বিশ্বদল আমার দেবতার চরণে দেবার উপযুক্ত হয়, যাতে সে আবর্জনার পড়ে কলুষিত না হয়।

মহিম। আব যদিই বা কলুষিত হয় !

সরষু। তা হ'লে আমার অশ্রুজলে তাকে পবিত্র করে' নেবো। সতীর অশ্রুজলের চেয়ে গঙ্গার বারি অধিক পবিত্র নয় জেনো।

মহিম। ঈস্!—যাও, তোমার বক্তৃতা শুন্তে চাই না।

সরষু। তবে কি চাও ?

মহিম। টাকা।—টাকা বের কর !—আমি তাকে মাসে ছ' শ' টাকা করে' দেব। দেখি।

সরষু। তাকে মাসে ছ' শ' টাকা দিতে চাও, হাজার টাকা দিতে চাও, নিজে রোজগার করে' দিও—আমি আর দেবো না।

মহিম। তুমি দেবে না, তোমার চোদ্দ পুরুষে দেবে !—নৈলে বিবাহ করেছিলাম কেন !

সরষু। আমার চোদ্দ পুরুষ উদ্ধার করেছিলে ! আমি আর দেবো না। নিজে উপবাস করে' তোমার কার্মাশ্রিতে ষুত চালবার জন্তু আব এক পয়সাও দেবো না !—ছ' শ' টাকা ত ছ' শ' টাকা !

মহিম। দেবে না ?

সরষু। না। আমার মনে হচ্ছে, আমি ক্রমাগত দাদামহাশয়ের

কাছে থেকে টাকা আন্সিয়ে তোমায় দিয়ে, তোমার উচ্ছন্ন যাবার পথ  
পরিষ্কার করে' দিচ্ছি—আর দেবো না।

মহিম। দেবে না !—দাও বলছি [ হাঁটু দিয়া ধাক্কা দিলেন ]

সরষু। এক পরসাঁও নয় !

মহিম। আচ্ছা, দেখছি। [ ঘরের ভিতরে গেলেন ও পরে পিস্তল  
লইয়া আসিলেন ] দেবে না ?—দেও টাকা বলছি। নইলে !—

সরষু। বধ কর। আত্মহত্যার পাপ থেকে নিষ্কৃতি পাই।

মহিম। কোথায় রেখেছ, দেও বলছি।

সরষু। কখন না।

মহিম। নহিলে—[ পিস্তল দেখাইয়া ] দেখছ !

সরষু। কর বধ।

মহিম। তবে মর। [ পিস্তল লক্ষ্য করিলেন ]

বেগে শাস্তার প্রবেশ।

শাস্তা। [ পিস্তল লক্ষ্য করিয়া ] খবর্দার !

মহিম। [ পিস্তল হস্তচ্যুত হইল ] কে তুমি।

শাস্তা। আমি শাস্তা !

মহিম। ও ! তুই !—সরে' দাঁড়া।

শাস্তা। নরকের কীট ! এই সাধ্বীকে, এই দেবীকে যন্ত্রণা দিয়ে, না  
থেতে দিয়ে, 'প্রহার করে', আমার খরচ যোগাও !—চেয়ে দেখ, ঐ ধূলি-  
ধূসরিতা ঐ রুদ্ধকেশা, ঐ মলিনা কঙ্কালপ্রতিমা। চেয়ে দেখ—কামের  
কীতদাস—দেখ কি করেছে—যদি মানুষ হও ত নষ্টজানু হ'য়ে এই  
সাধ্বীর মার্জ্জনা ভিক্ষা কর। যদি 'তিনি মার্জ্জনা করেন, তুমি বড়  
ভাগ্যবান জেনো।

মহিম। পাজী! আমার টাকায় খান্ধা আবার আমার উপর কথা। [ পিস্তল কুড়াইয়া লইলেন ]

শাস্তা। তোমার টাকা! বলতে লজ্জা করে না? তবে শোন! তোমার জীর দান—তোমার এই টাকা—আর তোমায় দিতে আমিই তাঁকে নিষেধ করেছি। তোমার টাকা? জাস্তাম না যে এ টাকা ভিক্ষা করে, জীর রক্ত শুষে, নিজের মনুষ্যত্ব বিক্রয় করে' দস্যুর অধম হ'য়ে, তুমি আমায় এই টাকা যোগাও। আমি তোমার অর্থে পদাঘাত করি। তোমায় আমি ঘৃণা করি।

মহিম। তবে এখনই তুই তার সঙ্গে জুটেছিস! আমি তবে তোকেই বধ করব।

শাস্তা। কি! আমাকে বধ করবে?—দেখ, আমার হাতেও পিস্তল আছে। তোমায় আমায় যদি এই পিস্তলের যুদ্ধ হয়, ত তোমার পতন নিশ্চিত। সে বিষয়ে অণুমাত্র সন্দেহ নাই। ইচ্ছা কচ্ছে একবার যে যুদ্ধ করি, পুরুষ পাষণ্ড আর নারীবোণ্ডার যুদ্ধ হোক। জগৎ দেখুক, কার জয় হয়। না, আমি তোমায় বধ করব না। তুমি নরাধম, তথাপি তোমার মুক্তির পথ আছে।—তুমি এই লম্পট থেকে মহর্ষি হ'তে পারো। কিন্তু বেগা—চিরদিন বেগা। তোমাকে আমি অনুতাপের সময় দিলাম। এই নাও [ পিস্তল ফেলিয়া দিল ] আমায় বধ কর। বিশ্বপৃষ্ঠ হ'তে শাস্তা বোণ্ডার নাম লুপ্ত হ'য়ে যাক।—এই নাও, বুক পেতে দিচ্ছি।\*

“তবে মর” বলিয়া মহিম গুলি করিলেন। শাস্তা ভূতলে পড়িল। ভৃত্য ও প্রতিবোধিগণ প্রবেশ করিল।

# চতুর্থ অঙ্ক

## প্রথম দৃশ্য

স্থান—একটি সজ্জিত কক্ষ । কাল—রাত্রি ।

মহিম ও বন্ধুবর্গ আসীন । সম্মুখে নৃত্যগীত ।

- এ কি মধুর ছন্দ, মধুর গন্ধ, পবন মন্দ মধুর—  
এ কি মধুর মুগ্ধরিত নিকুঞ্জ পত্রপুষ্প মন্দর ।  
এ কি নিখিল বিশ্বহাসি,—  
এ কি সুরভি, স্নিগ্ধশিশিরসিক্ত কুসুম রাশি রাশি—  
এ কি শ্যাম হাসিত নব বিকশিত ঘন কিশলয় পল্লব—  
এ কি সরিৎ রঙ্গ, শত তরঙ্গ নৃত্যভঙ্গ নির্ঝর ।  
কভু কোকিল যুদ্ব গীতে—  
উঠে জাগি' শব্দ বিনিমুক্ত স্বপ্নময় নিশীথে—  
উঠে বেণুগান মধুরতান করি' বিলাপ কল্পিত—  
ঘন অবিশ্রান্ত—বিষলকান্ত নীল শান্ত অম্বর ।  
এ কি কোটি মুগ্ধ তারা !  
এ কি মধুর দৃশ্য—প্লাবি' বিশ্ব চন্দ্রকিবর্ণ-ধারা—  
এ কি স্তিমিত নয়ন,—শিথিল শয়ন অলসবিভল শর্ব্বরা—  
শশী বাহুল্য মুগ্ধমগ্ন সুপ্ত স্বপ্নসুন্দর ।

মহিম। বাহোবা! বাহোবা! চমৎকার! কি চমৎকার নেমে  
যাচ্ছি! ভেসে যাচ্ছি। একটা ধাক্কাও নে—যেন প্যাবাসুট ডিসেন্ট!

নন্দ। কোথায় যাচ্ছ জানো?

মহিম। জানি! চুলোয়!—চুলো জায়গাটা কি রকম, কিছু ধারণা  
আছে নন্দবাবু?

নন্দ। বেশ একটু গরম।

মহিম। গরম! হাঁ গরম! বিষম গরম। কিন্তু—না, দাঁও আব  
এক গেলাস।

শরৎ। আর খেয়ো না।

মহিম। খাবো না? সে কি বল শরৎ, মদ খাবো না? খাবো—  
দাঁও। বাধা দিও না। বাধা দিলেই গোল। মাঝে এসে ধাক্কা দিও  
না। নামছি, নেমে যেতে দাঁও। শেষে—জানি, একটা বিষম ধাক্কা  
আছে।—সে ধাক্কা—একদম—বাস্! এখন—দাঁও।

অতুল। অনঙ্গ!

মহিম। চুপ! বাধা দিও না।

অতুল। আর খেয়ো না।

মহিম। খাচ্ছি।—তাতে তোমার কি। তোমার বাপের পয়সায়  
মদ খাচ্ছি না কি? তুমি বাধা দেবার কে! যার মদ খাচ্ছি—এই  
নন্দবাবু যদি বাধা দেন—বাস্, আর খাবো না! আর—এখানে আসবোও  
না! যেখানে বিনি পয়সায় মদ পাবো, সেখানে যাবো। তোমার  
সব কে?

শরৎ। চট কেন ভাই! আমরা তোমার ভালোর জন্তই বলছি!  
আর সহ্য হবে না।

মহিম। হবে! সহ হবে। মদ খাবো—যতক্ষণ না ঘুমিয়ে পড়ি—অসাড় হ'য়ে যাই—মুৎপিণ্ডের মত অনড় না হ'য়ে যাই। মদ খাবো।

নন্দ। ভাই, তোমার জন্তই বলছি—

মহিম। কি, তুমিও! ব্যস্ বাবা, চল্লাম! তোমাদের সঙ্গে তবে আমার এই শেষ [ উত্থান ]

নন্দ। কোথায় যাও? ব'সো। না হয় মদ খাও! যেয়ো না!

মহিম। পথে এসো! নন্দবাবু, তুমি পরম ধার্মিক। তুমি আমার প্রকৃত বন্ধু! দাও মদ। [ পান ] তার মুখখানি বড় সুন্দর ছিল। কিন্তু তার স্বর,—নন্দবাবু, দাও মদ।

নন্দ। দিচ্ছি! এই নাও [ মত্ত প্রদান ] কিন্তু ভেবে দেখো! আমি তোমায় ভালোবাসি ব'লেই বলছি! নিজের সর্বনাশ ক'রো না! পৃথিবীতে এসব জিনিস সম্ভোগের জন্ত তৈরি হয়েছিল। কিন্তু মাত্রা ঠিক রাখা চাই। অধিক পরিমাণে যদি অমৃত খাও—সেও পেটে গিয়ে গরল হবে।

মহিম। বিষস্ত বিষমৌষধম্!—দাও মদ [ মত্তপান ]

নন্দ। এই শেষবার কিন্তু। আর পাবে না। আমরা তোমায় ভালবাসি ব'লেই বলছি।

মহিম। তোমরা আমার ভালবাসো নন্দ! ভালবাসো?

নন্দ। হ্যাঁ।

মহিম। কি গুণে?

নন্দ। তোমার মহৎ হৃদয়ের জন্ত!

মহিম। মহৎ হৃদয়! [ সব্যঙ্গ হান্তে ] নন্দবাবু! মহৎ হৃদয়!

তবে তুমি আমায় জানো না—তাই। [ দাঁড়াইয়া ] নন্দবাবু—তোমরা  
আমার পানে তাকাও দেখি। দেখুছো? কি দেখুছো?

নন্দ। কৈ! কিছু না।

মহিম। আবার তাকাও। কি দেখুছো?

শরৎ। তোমাকে—

মহিম। কে আমি?

শরৎ। অনঙ্গবাবু।

মহিম। মিথ্যা কথা। আমায় চেনো নি।

শরৎ। কেন?

মহিম। অতুলবাবু আমায় দেখুছেন?

অতুল। দেখুছি।

মহিম। কে আমি?

অতুল। অনঙ্গবাবু—

মহিম। না।

অতুল। তবে?

মহিম। একটা পিশাচ!—মদ খাই কেন, তা জানো?

অতুল। জানি।

মহিম। কিছু জানো না!—হাঃ হাঃ হাঃ—এই জায়গায়—হাত  
দেও! [ নন্দের হাত নিজের বক্ষের উপর টানিয়া লইয়া ]—  
দেখুছো!

নন্দ। দেখুছি।

মহিম। চলেছে না? দ্রুত! ঝড়ের মত প্রবল! ধবংসের মত  
ভয়ঙ্কর! দেখুছো? দেখুছো নন্দবাবু!

নন্দ । দেখছি

মহিম । বিগত পাপের জন্ত অহুতাপ, আর ভবিষ্যৎ শাস্তির জন্ত ভয় ;—তারা ছটোয় মিলে আমার জীবনকে শয়তানের কারখানা করে' তুলেছে, তা জানো । পিছন দিকে চাইলে শিউরে উঠি, সম্মুখে চাইলে শিউরে উঠি । তার উপরে—ওঃ ! জানো না, ভিতরে কি আতঙ্ক ।—ও কি !!!

শরৎ । কি ?

মহিম । মা ! মা—অ-অমন ক'রে' চেয়ে রয়েছে কেন ! ঐ মরা মুখ—ঐ বিভক্ত ওষ্ঠ—ঐ স্থির পাষণ মূর্তি, ঐ অনিমেয় পারদদৃষ্টি—মা মা, অমন করে' চেয়ো না, অমন করে' চেয়ো না ! বরং অভিশাপ দাও—অভিশাপ দাও ।

শরৎ । ও কি !—কার সঙ্গে কথা কৈছ ?

মহিম । মা ! মা !—আমি—আ—মি—

নন্দ । অনঙ্গ !—

[ অনঙ্গকে ঝাঁক দিলেন ]

মহিম । ও—ও—ও— [ মুর্ছিত হইয়া পড়িলেন ]

সকলে ব্যস্ত হইয়া তাঁহার সেবা করিতে লাগিলেন ।

নন্দ । অনঙ্গ ! অনঙ্গ !

মহিম । [ উঠিয়া ] কে অনঙ্গ ?—ও ! আমি ! না—আর পারি না । তবে প্রকট করে' দিই । বঙ্গগণ ! আমার নাম অনঙ্গ নয়, আমার নাম মহিমারঞ্জন চক্রবর্তী—যে জীব জন্তু মাকে অবহেলা করে'ছে ; বেষ্ঠার জন্তু জীকে ত্যাগ করে'ছে ; প্রতিহিংসার জন্তু বেষ্ঠাকে হত্যা করে'ছে ।

কানাই । কি বলছো অনঙ্গ !



মহিম। কৈ ? কি বলছি ? হাঁ—না, সব ভুল। আমি কিছু করি নাই। আমি পাপিষ্ঠ নই। আমি পরম পুণ্যাত্মা। মাকে পূজা কর্তাম। জীকে ভালবাস্তাম। গণিকা—কখন রাখি নাই। বা' বলেছি সব ভুল—সব ভুল !

অতুল। কি বলছো ?

মহিম। আমি শিক্ষিত ব্রাহ্মণ। ভাল হ'তে পার্তাম, যদি প্রথমে মায়ের প্রতি ভক্তি থাকতো ! আমার মাকে ফিরিয়ে দাও, আমার মাকে ফিরিয়ে দাও, সেই প্রথম পাপ ক্ষালন করে' দাও—আবার সব ফিরে পাবো।

নন্দ। কি বলছো ?—তোমার নাম মহিমারঙ্গন ?

মহিম। না না—ভুল বকছি। আমি ঘুমোবো।

ভৃত্যের প্রবেশ।

ভৃত্য। বাবু !

নন্দ। কি !

ভৃত্য। বাবু, পুলিশ !

নন্দ। পুলিশ !—কি চায় জিজ্ঞাসা কব্। [ ভৃত্যের প্রস্থান।

নন্দ। হঠাৎ এত রাত্রে পুলিশ ? বাগান-বাড়ীতে !

কানাই। তোমরা অনঙ্গের মুখের দিকে তাকাও—একবারে ছায়ের মত সাদা হ'য়ে গিয়েছে।

অতুল। তাই ত। তাকাচ্ছে দেখ !

শবৎ। নন্দবাবু, তোমার পাটিতে এসে শেষে সাক্ষী দিতে না হয়।

নন্দ। অনঙ্গ—অনঙ্গ !

ভূত্যের প্রবেশ ।

ভূত্য । দারোগা বাবু জিজ্ঞাসা করিলেন যে, এখানে মহিমবাবু বলে' কেউ আছেন ? এই যে দারোগাবাবু—

মহিম । ঐ ধর্লে রে !

নন্দ । অনঙ্গ ! অনঙ্গ । [ পশ্চাদ্গমন ; অত্ৰ সকলেও পশ্চাৎ বাহির হইয়া গেলেন ]

হুজন কনষ্টেবল ও দারোগাবাবুর প্রবেশ ।

দারোগা । কৈ এখানে ত কেউ নেই ! ওখানে এত গোলযোগ কিসের ? দেখি—[যাইতে উত্তত ]

মহিম ভিন্ন অত্ৰ সকলের প্রবেশ ।

কানাই । ছাদ থেকে ঝাঁপিয়ে পড় লো ।

অতুল । উঠেই দৌড়—

দারোগা । কে ?

কানাই । অনঙ্গ ।

দারোগা । অনঙ্গ'না মহিম ?

নন্দ । হাঁ, সেই নামই বলেছিল বটে ।

শরৎ । তুমি দেখলে দৌড় দিলে ?

কানাই । স্বচক্ষে ।

অতুল । হাত পা ভাঙ্গে নি ?

কানাই । না, ছাদ থেকে ঐ বকুলগাছের উপর পড়ে' তার পর উটে পাল্টে নীচে পড়ে' গেল ! তার পর তৎক্ষণাৎ উঠেই দৌড় ।

দারোগা । কোন্ দিকে ?

কানাই । পশ্চিম দিকে ।

দারোগা। হুম্মান সিং। যাও—গিছনে গিচ্ছো ছোটো।

[ একজন কনষ্টেবলের প্রস্থান ]

দারোগা। মহাশয়! অনুমতি করেন ত বাড়ীটা একবার খুঁজে দেখি।

নন্দ। কি দারোগা সাহেব। ব্যাপারখানা কি?

দারোগা। বিশেষ কিছু নয়। এই মহিমাবাবুর বিপক্ষে হত্যার অপরাধে গ্রেপ্তারি ওয়ারেন্ট। মহাশয় অনুমতি হয় ত বাড়ী খানাতল্লাস করি।—যদি কোন জায়গায় তাঁকে লুকিয়ে রাখা হ'য়ে থাকে।

নন্দ। দারোগা সাহেব। আমি অনারারি ম্যাজিস্ট্রেট।

দারোগা। মাফ কর্বেন। আমার কর্তব্য কর্তব্য কর্তে হবে জানেন ত সব।

নন্দ। আমুন তবে খুঁজে দেখুন।

[ সকলের নিষ্ক্রান্ত ]

## দ্বিতীয় দৃশ্য

স্থান—বিশ্বেশ্বরের প্রাসাদ-উদ্যান। কাল—সন্ধ্যা।

সরযু একটা খাঁচায় পাখী লইয়া তাহাকে পড়াইতেছিলেন।

বিশ্বেশ্বর বেড়াইয়া বেড়াইতেছিলেন।

বিশ্বেশ্বর। সরযু! একটা কথা বলবো!

সরযু। একটা কেন! দশটা কথা শুনিয়া দেন না।

বিশ্বেশ্বর। তোর সদাই এ মান মুখ কেন?

সরযু। এই কথাটুকু বলবার জন্ত অতখানি ভূমিকা? কথাটার

নূতনত্ব ত কিছু লেখছি না। মাস ছই ধরে' রোজই ত ঐ কথা বলছেন।

বিশ্বেশ্বর। বলি কি সাধে! সর্বদাই ভাবছি।—চল, গাড়ী করে' মাঠে একটু বেড়িয়ে আসি।

সরযু। না দাদামহাশয়! আমার যেতে ইচ্ছা কর্ছে না।

বিশ্বেশ্বর। তবে মুখ ভার করে' বসে থাকতে পাবি নে।

সরযু। [ সহাত্রে ] কৈ মুখ ভার করে' বসে' আছি দাদামহাশয়!

বিশ্বেশ্বর। তোরই বা দোষ দেই কেমন করে'!—যার স্বামী হত্যা করে' ফেরায়!—এও তোর কপালে ছিল!

সরযু। তিনি এখন অজ্ঞাতবাস কর্ছেন। আপনি পাণ্ডবদের কথা পড়েন নি বুঝি! আঃ আমি আর আপনাকে কত শেখাবো—কিছুই জানেন না।

বিশ্বেশ্বর। যে দিন শুনলাম যে মহিম তোকে পদাঘাত করেছে, সে দিন মনে হ'ল—কি বলবো সরযু—মনে হ'ল যে, এই শ্রামা পৃথিবী আমার সম্মুখে গুঁকিয়ে কুঁকড়ে শূঁতে ঝরে' পড়ে' গেল, আর নীচে থেকে নরক লাফিয়ে উঠলো, আর শয়তানের দল শিবাহকে টিটকিরি দিয়ে উঠলো।—ওঃ!

সরযু। সে কি দাদামহাশয়! পতির পদাঘাত সতীর বক্ষে—কৌন্তভঙ্গি কি ছার—আমার ঠিক মনে হ'ল যে স্বর্গ থেকে মন্দার-পুষ্পবৃষ্টি হ'চ্ছে।

বিশ্বেশ্বর। সে কি সরযু!

সরযু। প্রেমের গূঢ়ত্ব আপনি জানবেন কোথা থেকে?

বিশ্বেশ্বর। সে কি! তোদের প্রেম হয়েছিল?

সরষু। প্রেম! উঃ! কি প্রেম যে হয়েছিলু<sup>১</sup>তো আর কি বলবো দাদামহাশয়!—ভয়ানক প্রেম!

বিশ্বেশ্বর। কি রকম?

সরষু। আমার প্রেমের ইয়ত্তা কর্তে পার্তাম না, অস্ত পেতাম না। দস্তুর মত—কি বলবো দাদামহাশয়—প্রেমের হুজুগে পড়ে’—এমন কি অনেক সময় খাওয়া হ’ত না। দিনটা উপবাসে যেত।

বিশ্বেশ্বর। তবে কি কৰ্তিস্?

সরষু। বসে’ বসে’ উপমা দিতাম।

বিশ্বেশ্বর। কি উপমা দিতিস্? একটা নমুনা দে দেখি।

সরষু। এই ধরুন, তিনি বলতেন যে তিনি আমার গলার হার, আর আমি বলতাম যে আমি—তার পাখের চটিজুতো।

বিশ্বেশ্বর। ওঃ—ব্যঙ্গ কচ্ছিস্—আমার মনে হয়—সত্য সত্যই প্রেম তোদের কখনই হয় নি—

সরষু। কেন?

বিশ্বেশ্বর। এই বুঝি প্রেম! একে প্রেম বলে না।

সরষু। তবে কাক্কে প্রেম বলে? বলুন না দাদামহাশয়, প্রেম কাকে বলে!

বিশ্বেশ্বর। তবে শুনুবি, এই ধর আমার সঙ্গে তোর প্রেম হয়েছে—ধরে’ নে।

সরষু। আচ্ছা ধরে নিলাম।—যদিও সেটা ধরে’ নেওয়া খুব শক্ত। তা তর্কের খাতিরে ধরে নিলাম। তার পর?

বিশ্বেশ্বর। অথচ আমায় দেখিস্ নি, আমার নাম শুনিস্ নি—তবু প্রেম!

সরযু। তা কেন্দ্র করে হবে ?

বিশ্বেশ্বর। কেমন কুরে' তা জানি না, তবে হবে। কবিতার ভাষায় একে বলে পূর্বরাগ।

সরযু। [ সবিস্ময়ে ] বটে !

বিশ্বেশ্বর। তার পর একদিন—কোন্ স্নলগ্নে, কোন্ শুভ মুহূর্তে কোন্ শেফালিস্থবাসিত মলয়-হিল্লোলে, কোন্ স্বপ্নময় সন্ধ্যায়, কোন্ নিভৃত স্তব্ধ কুঞ্জবনে—দুজনে দেখা। যে দেখা, সেই প্রেম।

সরযু। যেই দেখা সেই প্রেম বুঝি !

বিশ্বেশ্বর। যেই দেখা, সেই প্রেম হওন—এখন থেকে আমি বাঙ্গালা নাটকের ভাষায় কথা কৈব, মনে রাখিস্।

সরযু। আচ্ছা, তার পর ?

বিশ্বেশ্বর। তারপর প্রেমিকের স্বগতোক্তি ; প্রেমিকার ব্যাকুলভাব দেখাওন ; প্রেমিকের কবিতা আওড়াওন ও প্রেমিকার পতন ও মূর্ছা।

সরযু। তার পর ?

বিশ্বেশ্বর। সখীর প্রবেশ।—সব বিরহিণীর একজন করে' সখী থাকা চাই। নৈলে প্রেম হয় না।

সরযু। নৈলে প্রেম হয় না বুঝি ?

বিশ্বেশ্বর। [ ঘাড় নাড়িয়া ] হবার যো'ই নাই। সখী নৈলে গান গাইবে কার কাছে ? গান নৈলে প্রেম জমে না।

সরযু। বটে।—তার পর !

বিশ্বেশ্বর। সখীর প্রবেশ ও বীজন। প্রেমিকার জ্ঞানলাভ ও ধীরে ধীরে চলিয়া যাওন ! যাইতে যাইতে প্রেমিকার সাড়ী তরুণাখালগ্ন হওন ও প্রেমিকার পশ্চাতে ফিরিয়া চাওন ! প্রেমিকের দীর্ঘনিশ্বাস ফেলন

আর প্রেমিকের—হা হতোম্মি শব্দ করণ। প্রেমিকার গ্রহান ও প্রেমিকের—প্রেমিকের কি ?

সরযু। তা আমি কি জানি ! বর্ণনা করছেন আপনি।

বিশ্বেশ্বর। তা বটে ! কিন্তু ঐ জায়গাটা মেলাতে পারছি না। ঐ জায়গাটা মিলিয়ে দে না দিদি ! প্রেমিকের ?—বল্। শীঘ্র বল্। নৈলে জুড়িয়ে যাচ্ছে। প্রেমিকের ?

সরযু। প্রেমিকের গৃহে যাইয়া বেশী করিয়া ভাত খাওন ও পুনরায় উঠিয়া পড়িয়া লাগন।

বিশ্বেশ্বর। এঃ, সব মাটি !

সরযু। কেন ?

বিশ্বেশ্বর। ঐ এক ভাত খাওনে সব মাটি। আমার এতখানি পরিশ্রম বৃথাই গেল। শেষে ভাত খাওন ? আঃ ছ্যাঃ !

সরযু। তবে কি খাওন ?—লুচি ?

বিশ্বেশ্বর। খাওন একেবারে নয়। উপবাস করণ।

সরযু। উঃ ! খালি পেটে প্রেম হয় না—এ বেশ একটু পরিশ্রমের কাজ। ভাত না খেয়ে লুচি খেতে পারেন। কিন্তু খাওন চাই !—আচ্ছা তার পরে ?

বিশ্বেশ্বর। রোস্ আগে বিষয়টাকে টেনেটুনে দাঁড় করাই।—ঐ ভাত খাওনে আমাকে একেবারে দমিয়ে দিয়েছিল্। সাম্লে নেই, দাঁড়া।

সরযু। নেন। তাড়াতাড়ি নেই।

বিশ্বেশ্বর। [ সামলাইয়া লইয়া পুরে উঠিয়া ] কতখানি বলেছি !—হাঁ—তার পর প্রেমিকের গ্রহান। তার পর একদিন ঝড় হওন,

প্রেমিকের নৌকা নী পাওন, নদীতে ঝাঁপ দেওন, নদী পার হইয়া তৎক্ষণাৎ দৌড়িয়া গিয়া প্রেমিকার পাঁচিল টপকাইয়া পড়ুন।

সরষু। উঁহঃ। হ'ল না, খানিক বাদ গেল।

বিশ্বেশ্বর। কি?

সরষু। মড়া আর সাপ।

বিশ্বেশ্বর। তুমি বড় অকবি! নৈলে এর মধ্যে মড়া নিয়ে আসিস্।

সরষু। আমি নিয়ে আসবো কেন? ভক্তমাল গ্রন্থে রয়েছে।—  
আচ্ছা, তার পরে?

বিশ্বেশ্বর। তার পরে আবার কি প্রেমিক প্রেমিকার সাক্ষাৎ।  
প্রেমিকার লজ্জিতভাব করণ। পুনরায় সখীর প্রবেশ। তার পর  
হৃদয়ের গোপনে বিবাহ হওন। পরীস্থান দেখাওন। যবনিকা পতন।

সরষু। সে কি! ঐ খানেই প্রেমের শেষ?

বিশ্বেশ্বর। তা—শেষ বৈ কি! বিয়ে হ'য়ে গেল আবার কি চাস্?

সরষু। তার পর আর কিছু নেই?

বিশ্বেশ্বর। আবার কি?

সরষু। উঁহঃ! হ'ল না। তার পর কি, আমি বলবো?

বিশ্বেশ্বর। আচ্ছা, বল্ দেখি!

সরষু। তার পর প্রেমিকার স্বপ্নরবাড়ী যাওন। প্রেয়সীর রন্ধন  
করণ, ভাঁড়ার বের করে' দেওন, আর প্রাণনাথের ভাত খাওন ও  
আশীর্বাদ যাওন।

বিশ্বেশ্বর। ও কথা কোন নাটকে কি কাব্যে লেখে না।

সরষু। অতখানি সত্য কথা কাব্য বরদাস্ত কর্তে পারে না। যেখানে  
আসল সত্য কথা আরম্ভ হওন, সেইখানেই নাটকের শেষ হওন।



বিশ্বেশ্বর। হাঃ হাঃ হাঃ ! আচ্ছা, তার পর

সরযু। তার পর দম্পতির যথাকালে পুত্রকৃত্য হওন।

বিশ্বেশ্বর। আর কিন্তু নাটকের ভাষা নয়। তুমি নিজেই বলেছ যে এখানে নাটক শেষ হওন।

সরযু। বেশ ! এখন থেকে চলিত ভাষায় বলবো। তার পর পুত্ররক থেকে ভ্রাণ কর্কার জন্ত পুত্ররত্ন এসে দেখা দিলেন। আর দেখে কে ! তার জন্ত মায়ের আহার নেই, নিদ্রা নেই। মা একটু ঘুমিয়েছে, ছেলে কর্ন ‘ট্যা’, অমনি মা উঠে তাকে বুকের উপর করে’ নিয়ে ছলিয়ে—“ও—ও—ও—যাহু আমার মাগিক আমার ! ও—ও—ও—আয়রে পাখী।”

বিশ্বেশ্বর। ঠিক বলেছি।

সরযু। ছেলে একটু বড় হ’লেন ত কোল থেকে মাথায় উঠলেন। অর—ডাক্তার ডাক। পাঠশালা থেকে ছেলে ‘ক’ লিখে এলেন, ত বাড়ীতে তার মা চাকরাণী জলখাবার নিয়ে হাজির। রাত্রে ছেলে বল্লেন ‘মা, বড় গরম’ অমনি পাখা নিয়ে মা বাতাস কর্ছেন। মা এই ছেলের জন্ত কত দীর্ঘ দিবস অনাহারে, কত দীর্ঘ রাত্রি অনিদ্রায়, কাটিয়ে দেয়, আমরণ মায়ের মুখে আর কথা নেই, ধ্যানে আর চিন্তা নাই, নিদ্রায় আর স্বপ্ন নাই। ছেলে ছেলে ছেলে ! মরণের পর মুখে হুড়ো জেলে দেবে কি না ! তাও বা কৈ ! একদিন মায়ের কোল খালি করে’, বুক ভেঙ্গে দিয়ে, জীবন শূন্য করে’, সেই ছেলে, এত যত্ন এত আদর এত স্নেহ তুচ্ছ করে’ কোথায় চলে’ যায়। আর তাকে দেখতে পাই না।

বিশ্বেশ্বর। আবার ঐ কথা !

সরযু। না দাদামহাশয় ! এই চুপ কর্লাম !—আহা সেই মুখখানি !

কেমন পুট পুট করে' আমার পানে চাইত। সেই ছোট্ট হাত ছ'খানি—  
—সেই কচি কচি আঙ্গুলগুলি!—দেখতেন যদি দাদামহাশয়!—যেন  
মোমের পুতুল।

বিশ্বেশ্বর। সে পুণ্যাত্মা স্বর্গে গিয়েছে। কিন্তু তোর পুত্র—আমার  
পৌত্রীর পুত্র—শেষে কিনা দারিদ্রের কশাঘাতে—অনাহারে—

সরযু। ও কি কঁাদছেন দাদামহাশয়! আপনাকে ছরস্তু কর্তে  
পারলাম না!—ঐ চেয়ে দেখুন ঐ নারিকেলের গাছগুলির উপর সূর্য্যের  
কিরণ এসে পড়েছে। যেন সন্ধ্যার জয়পতাকা উড়ছে।

বিশ্বেশ্বর। এ কথা আমাকে একবার লিখে জানানলিনে কেন  
সরযু!—আর আমি তোকে এত ভালবাসি।

সরযু। আবার!—আচ্ছা দাদামহাশয়, কাব্যে লেখে যে প্রেমিক  
প্রেমে মুচ্ছা যায়। সে কি রকম দাদামহাশয়? সত্যি কি মুচ্ছা যায়?

বিশ্বেশ্বর। আর কত চাপা দিবি দিদি! আমিই বা আর কত  
চাপা দিব! একি চাপা যায়!—এ যে গৈরিক নিঃশ্বাসের মত পাষণ  
ভেদ করে' উঠছে। 'আয় দিদি তার চেয়ে আমরা ছ'জনে একবার  
কঁাদি, একবার একসঙ্গে চীৎকার করে' কঁাদি! সে কান্না আকাশে  
উঠে বেলাহত সমুদ্রতরঙ্গের মত দয়াময়ীর পায়ে গিয়ে আছড়ে পড়ুক।  
দেখি তার দয়া হয় কি না।

সরযু। কঁাদবো কেন দাদামহাশয়! মায়ের বিধান মাথায় পেতে  
নেবু।

বিশ্বেশ্বর। পার্কি?

সরযু। পার্কি! ভবানীদাদা আমাকে মায়ের নাম শিখিয়েছেন।  
তিনি বলেছেন যে মা যাকে বড় ভালবাসেন তাকেই দুঃখ দেন—

হুঃখ দিয়ে নিজের বক্ষে টেনে নেন, বেশী আপনায় করে' নেন।—ঐ ভবানীদাদা গাইছেন না ?

বিশ্বেশ্বর। হাঁ!—চুপ্ করে' শোন্।

নেপথ্যে ভবানীর গীত।

বারে বারে যত দুখ দিয়েছ দিতেছ তাব'—

সে সকল দয়া তব তারিণী গো দুখহারা।

বিশ্বেশ্বর। থেমে গেল কেন!—গাও ভবানীপ্রসাদ!—ঐ! গাইতে গাইতে ঐ দিকে চলে গেল।—ভবানীপ্রসাদ, ভবানীপ্রসাদ! তুই এইখানে অপেক্ষা কব্। আমি ডেকে আনি! [ প্রস্থান।

সরযু। মেঘ অশ্রু হ'য়ে নেমে গেল।—মা! .কৰ্মা ক'রো। আমি অবোধ শিশু। এই সংসারে এসে পুতুল খেলা করছি। আমি কেন! সকলেই। শিশুর পুতুল পুতুল, মায়ের পুতুল ছেলে, যুবার পুতুল অর্থ, বৃদ্ধের পুতুল দশ। এই সব খেলাই একদিন ভেঙ্গে যাবে।—ঐ চাঁদ উঠছে। ঐ পুষ্করিণীর জলে চাঁদের হাট বসে' গিয়েছে। কোকিল ডাকছে। কি সুন্দর এই পৃথিবী! এ ত কেউ'কেড়ে নিতে পার্কে না।

[ বেড়াইয়া বেড়াইয়া গাহিতে লাগিলেন ]

গীত

শুধু 'দিনেরই খেলা।

ঘুম না ভাঙ্গিতে, আঁখি না মেলিতে,

দেখিতে দেখিতে ফুরায় খেলা।

আশার ছলনে কত উঠি পড়ি,

কত কাঁদি হাসি, কত ভাঙ্গি গড়ি,

না বাঁধিতে ঘর হাটের-ভিতর

ভেঙ্গে যায় এই সাধের মেলা।

আমাদেরও এই দেহ, প্রাণ, মন,  
 স্তম্ভ হুঃখ এই জীবন মরণ,  
 —এও বিধাতার পুতুল খেলা,  
 —শুধু গড়া আর ভাঙ্গিয়ে ফেলা।

--সুন্দর বাতাস বৈছে।

ছদ্মবেশে মহিমের প্রবেশ।

মহিম। সরযু!

সরযু। [ চমকিয়া ] কে!—ও!—তুমি!—এখানে!—এ ভাবে!—  
 এ বেশে!

মহিম। পুলিশ আমায় তাড়া করেছে! আমি তাই পাঁচিল  
 টপ্কে এখানে এসেছি। আমায় আশ্রয় দেবে কি!

সরযু। এতদিন কোথায় ছিলে?

মহিম। গহ্বরে, শ্মশানে, জঙ্গলে, রাস্তায় নানাস্থানে বেড়িয়েছি!  
 কখন বৈরাগী, কখন ঝাঁকু মুটে, কখন নাম ভাঁড়িয়ে ভক্তলোক সেজে  
 বেড়িয়েছি। শেষে তোমার কাছে আশ্রয় ভিক্ষা কর্তে এসেছি।—  
 দেবে কি?

সরযু। ওঃ! [ ঘর্ম্ম মুছিলেন ] না—তুমি যাই হও, তুমি আমার  
 স্বামী। জীবন কর্তব্য করে' যাবো—এসো, আমি তোমায় আশ্রয়  
 দিব।

বিশ্বেশ্বরের পুনঃপ্রবেশ।

বিশ্বেশ্বর। সরযু! ভবানী ঐ—[ চমকাইয়া ] এ কে?

সরযু লজ্জায় ছুই হস্তে মুখ ঢাকিলেন।

বিশ্বেশ্বর । [ সান্ধ্য ] মহিম না ?

মহিম । হাঁ দাদামহাশয়—

বিশ্বেশ্বর । চোপ্ রও ! আমি ঘাতকের দাদামহাশয় নই ।

এখানে এসেছে কেন ?

মহিম । আশ্রয় ভিক্ষা কর্ত্তে ।

বিশ্বেশ্বর । বটে !—স্পর্ধা বটে !—বেরোও এখান থেকে ।

সরষু । দাদামহাশয় !

বিশ্বেশ্বর । চুপ্ সরষু !—[ মহিমের প্রতি অঙ্গুলি নির্দেশ করিয়া ]

যে ব্যক্তি নারীহত্যা করে, এখানে তার স্থান নাই ।—বেরোও ।

সরষু । [ করযোড়ে জামু পাতিয়া ] দাদামহাশয় !

বিশ্বেশ্বর । সরষু ! বুঝি । সব বুঝি । কিন্তু এখানে ‘লুকোচুরি হবে না । চিরদিন সোজা পথে চলে’ এসেছি । এখন স্নেহের খাতিরে বাঁকা পথে যাবো না । আমার বাড়ীটা হত্যাকারীর আড্ডা নয় ।—বেরোও—জীঘাতক !—তোমার মুখ দেখলে প্রায়শ্চিত্ত কর্ত্তে হয় ! বেরোও !

সরষু । [ উঠিয়া ] তবে আমাকেও বিদায় দিন দাদামহাশয় !

বিশ্বেশ্বর । সে কি !

সরষু । উনি যাই হোন—উনি আমার স্বামী ।

বিশ্বেশ্বর । ও !—বুঝেছি !—বেশ !—ভেবেছি নাতিনী, যে তোকে আমার প্রাণের চেয়েও ভালবাসি বলে, তোর জন্ত ‘কর্ত্তব্য’ পথ ছাড়বো ! মনেও করিস্ না । কর্ত্তব্যের জন্ত অনেক ছেড়েছি । তোকে ছাড়তে হয়, ছাড়বো । যদিও তোকে ছাড়তে আমার বুক ভেঙ্গে যাবে, সর্ব্বাঙ্গ অবশ হবে, হয়ত পাগল হ’য়ে যাবো । কিন্তু—  
১২৬]

যতদিন বেঁচে থাকি, নিজের কর্তব্য করে' যাবো। অপরাধীকে বিশেষতঃ হত্যাকারীকে, বিচারের হাত থেকে রক্ষা করব না। বিচারের চক্ষে ধুলি দিব না।—যা নাতিনী! আমি তোকেও বিদায় দিচ্ছি।

মহিম। তার প্রয়োজন নাই। আমি নিজেই যাচ্ছি। নিজে বিপদের তরঙ্গে ডুবছি জীকে সেই আবর্তের মধ্যে টেনে আনি কেন!—আমি পুলিশকে ধরা দিব।

সরযু। দাঁড়াও, আমিও তোমার সঙ্গে যাবো। যেখানে তোমার স্থান, সেইখানেই আমার স্থান,—সে গাছের তলায় হোক, কারাগারে হোক, বধ্যভূমিতে হোক। তুমি যদি আজ ঐশ্বর্যাগবিত হ'য়ে আমার গ্রহণ কর্তে আসতে আমি সে আহ্বানে কর্ণপাত কর্তাম না। কিন্তু তুমি আজ দীন ভিক্ষুক নিরাশ্রয়!—দাদামহাশয় তবে বিদায় দিন।

বিশ্বেশ্বর। বেশ! যা সরযু! যদি যেতে পারিস!—চক্ষু! উপড়ে ফেলবো, যদি অশ্রুপাত করিস। অন্ধ হ'য়ে ত যাবোই—না হয় আগেই হ'লাম। যাও, সরযু।—গলায় ঠেলে উঠেছিস কি? নেমে যা—যাও সরযু। আমায় ছেড়ে হত্যাকারীর সঙ্গে যাও।

সরযু। দাদামহাশয়!—

বিশ্বেশ্বর। চেয়ে দেখ্ সরযু! এই শুভ্র কেশ যা'র উপর দিয়ে ষষ্টি বৎসরের ঝড়বৃষ্টি বয়ে গিয়েছে। চেয়ে দেখ্ এই লোল বক্ষ যা'র মধ্যে একটা স্নেহের সমুদ্র ঢেউ খেলে যাচ্ছে। চেয়ে দেখ্ এই বৃদ্ধ মুমূর্ষ—না যাও সরযু—

সরযু। একদিকে স্নেহ, আর একদিকে কর্তব্য—

[ অদৃশ্যভাবে মহিমের প্রস্থান।

বিশ্বেশ্বর। যা সরযু! দাঁড়িয়ে রৈলে যে। আমাকে ছেড়ে যেতে

পারিস্—যা। দেখ আমি তাই খাড়া হ'য়ে দেখতে পারি কি না।—চক্।

আবাব!—না উপড়ে ফেলবো। [ চক্ উৎপাটন করিতে উদ্রত ]

সরযু। ওকি! দাদামহাশয়! [ হাত ধরিলেন ] করেন কি!

করেন কি! [ জাভু পাতিয়া ] দাদামহাশয়!

বিশ্বেশ্বর। যাও সরযু!

সরযু। [ ফিরিয়া ] কৈ আমার স্বামী?—চ'লে গিয়েছেন!

বিশ্বেশ্বর। গিয়েছে?

সরযু। [ কিয়ৎকাল নীরবে থাকিয়া ] দাদামহাশয়! আমার স্বামীকে আশ্রয় দিলেন না!

বিশ্বেশ্বর। প্রত্যেক ব্যক্তিরই হত্যাকারীকে বিচারের হাতে ধরিয়ে দেওয়া উচিত। আমি শুদ্ধ তাড়িয়ে দিয়েছি। যখন আমি অধর্মের হাতে তোকে সঁপে দিয়েছিলাম, তখনই কি তাকে আমি আমার সর্বস্ব দিই নি? আমার হৃৎপিণ্ড উপড়ে তা'র হাতে দিই নি?—কিন্তু আমার সরযুকে সে পদাবাত করেছে—সে নারীহত্যা করেছে—না এখানে হত্যাকারীর স্থান নাই।

সরযু। সে হত্যাকারী যদি আপনাব পুত্র হোত?

বিশ্বেশ্বর। তাকেও এইরূপ ত্যাগ কর্তাম।

## তৃতীয় দৃশ্য

স্থান—বিচারালয় । কাল—অপরাহ্ন ।

যথাস্থানে জজ, জুরী, উকীল, ব্যারিষ্টার । দূরে মহিম,  
দর্শকমণ্ডলী । উকীল বক্তৃতা করিতেছিলেন ।

উকীল । জুরর মহাশয়গণ ! এখন, আসামীর বিপক্ষে প্রমাণ এই যে, আসামীর সহিত বেণ্ডার বচসা হয় ; তার পরই একটা পিস্তলের আওয়াজ শোনা যায় ; পরে আসামীর ভৃত্য ও প্রতিবেশিগণ কক্ষে প্রবেশ করে' দেখে যে শাস্তার রক্তাক্ত মৃতদেহ ভূমিতলে পড়ে', আসামীর জী দূরে মুর্ছিত অবস্থায় পড়ে', আর আসামী পিস্তল হাতে করে' দাঁড়িয়ে। লোকজন দেখেই আসামী পিস্তল ফেলেই দৌড় দেয়। এ সমস্ত ব্যাপার আসামীর ভৃত্য ও প্রতিবেশিগণের সাক্ষ্য দ্বারা প্রমাণিত হয়েছে। পুলিশে খবর পাঠান হয়। তা'কা এসে দেখে যে লাশ নাই ! ইত্যবসরে নিশ্চয়ই কেহ সে লাশ সরায়। কে সরায়, তা প্রমাণ হয়নি বটে, কিন্তু প্রমাণ হয়েছে যে, একথানা ভাড়াগাড়ী ঐ সময়ে সেই বাড়ী থেকে শাস্তার বাড়ীর দিকে যায়। ১০ দিন পরে সেই মৃতদেহ শাস্তার বাড়ীর পুকুরিণীতে অর্দ্ধগলিত অবস্থায় পাওয়া যায়। সে মৃতদেহ যে শাস্তার তা সেই মৃতদেহের একটা অঙ্গুলিস্থ শাস্তার নামাক্তিত অঙ্গুরী দ্বারা প্রমাণ হয়।

আসামীর জী এ বিষয়ে আসামীর বিপক্ষে সাক্ষ্য দেয় নাই বটে, কিন্তু কোন্ হিন্দু সতী স্বামীর বিপক্ষে সাক্ষ্য দিবে ?



সেই অবধি আসামী ফেরার। এও তা'র বিপক্ষে প্রমাণ স্বরূপ কথিত হয়েছে।

পিস্তলটা আসামীর বলে' সনাক্ত করা হয়েছে।

এখন এর চেয়ে সম্ভাব্যকর প্রমাণ কি হ'তে পারে—যে এই শাস্তাব হত্যার জন্ত এই আসামী দায়ী? যে কক্ষে হত্যা হয় সে সময়ে সে কক্ষে আসামী, আসামীর জ্বী আর এই মৃতদেহ ভিন্ন আর কাহাকেও কেহ দেখে নাই। অতএব হত্যা—হয় আসামী করেছে, নব ত আসামীর জ্বী করেছে। কিন্তু আসামীর জ্বী হত্যা কর্বে—এ কি সম্ভব? শাস্তাব বচসা আসামীর সঙ্গে হয়েছিল, তার জ্বীর সঙ্গে হয় নাই। আব হত্যা করে' কেহ কি স্বামীর হস্তে পিস্তল দিয়ে নিজে মূর্ছিত হ'য়ে পড়ে! আর আসামীর জ্বী হত্যা কর্লে আসামী কি কখন ফেরার-হ'য়ে ঘূবে বেড়ায়!

অতএব জুরর মহোদয়গণ! হত্যা সম্বন্ধে প্রমাণ যতদূর সম্ভব তা হয়েছে। এখন আপনারা বিচার করুন। যদি আসামীর দোষ সম্বন্ধে কোন সঙ্গত সন্দেহ থাকে, তা হ'লে আসামীকে নির্দোষ সাব্যস্ত কর্তে হবে। আর যদি সন্দেহ না থাকে, ত আসামীকে হত্যার অপরাধে অপরাধী বিবেচনা কর্তেই হবে; উপায় নাই। হত্যার অপরাধের দণ্ড ফাঁসি পর্য্যন্ত হতে পারে। এই সকল বিষয় বিবেচনা করে' আপনারা বিচার করুন। [ বসিলেন ]

জজ। আসামী মহিমারঞ্জন চক্রবর্তী, তোমার কিছু বলবার আছে?

মহিম। ধর্ম্মাবতার! আমি নিরপরাধ।

জজ। সে'ত পূর্বেই বলেছ! আর কিছু?

মহিম। ধর্ম্মাবতার! যদি আমার অপরাধ হ'য়েই থাকে ত আমার

যত্নদণ্ড দিবেন না। আমি এখনও যুবা। পৃথিবী আমার কাছে এখনও নূতন। এখনও সংসারে আমার আশা আছে, দেহে শক্তি আছে, মনে বল আছে! আমি পাপী; পাপের প্রায়শ্চিত্ত কর্তার অবকাশ দিউন। 'ম'র্ত্তে আমার বড় ভয় করে।

জজ। ঐরূপ অনুযোগ বিচারালয়ে নিষ্ফল। বিচার কুঠারের মত শাসিত, কঠিন, নিশ্চয়। তুমি যদি নির্দোষ হও ত সে তোমাকে স্পর্শ করবে না, বরং সম্মান করবে। কিন্তু যদি অপরাধী হও ত সে নিয়তির মত কঠোর—দয়া করে না। প্রমাণ সম্বন্ধে তোমার কিছু বলবার আছে? মহিম। আমি হত্যা করি নাই।

জজ। তবে কে হত্যা করেছে?

মহিম। আমার জ্ঞী!—[ তিনি যেন শুনিলেন যে অন্তরীক্ষে কে বলিতেছে 'সাবধান' ]—ও কি! কার কণ্ঠস্বর!—মা মা!—রক্ষা কর, রক্ষা কর। [ পুনরায় 'সাবধান' ] না না নিরপরাধিনী সুতীকে এ ব্যাপারে জড়াব না।—না ধর্ম্মাবতার, আমার জ্ঞী হত্যা করেন নাই—কিন্তু—কিন্তু—ম'র্ত্তে আমার বড় ভয় করে,—ম'র্ত্তে আমার বড় ভয় করে।—আমি হত্যা করি নাই।

জজ। কে হত্যা করেছে? সত্য বল, কে হত্যা করেছে?

মহিম। আমার জ্ঞী—

দর্শকগণুলী ভেদ করিয়া সরযু অগ্রসর হইয়া কহিলেন—“সত্য কথা ধর্ম্মাবতার!—হত্যা আমার স্বামী করেন নাই। হত্যা আমি করেছি।”

জজ। আপনি কে?

সরযু। আমি আসামীর জ্ঞী—

সকলে। সে কি!

সরযু। শাস্তা আমার স্বামীর গণিকা ছিল। সেই আক্রোশবশে আমি তা'কে হত্যা করেছি। হত্যা করে'ই মুচ্ছিতা হ'য়ে পড়ে' গিয়েছিলাম। আমার স্বামী বোধ হয় তখন পিস্তল লুকাইবার অভিপ্রায়ে কুড়িয়ে নিয়েছিল।

উকীল ঘাড় নাড়িলেন।

সরযু। উকীল মহাশয়! আমাকে অবিশ্বাস কর্কার কারণ কি? আপনাই যুক্তি—যে হত্যা হয় আসামী, না হয় আসামীর জ্ঞী করেছে। আমার স্বামী অস্বীকার কর্ছেন। আমি স্বীকার করছি।

জজ। এতদিন তবে এ কথা প্রকাশ করেন নি কেন?

সরযু। প্রাণভয়ে। কিন্তু বখন নির্দোষের ফাঁসি হ'তে যাচ্ছে, তখন আর নীরব থাকতে পারি না।

জজ। [ উকীলকে ] What do you say?

উকীল। I do think that the matter requires further enquiry, specially as the prisoner denies his guilt and this lady corroborates him.

জজ। Very well. Officer of the court, you may arrest this wo—I mean lady.

কর্মচারী। As your worship pleases. [ সরযুকে ] আমি আপনাকে স্বীকার্য মতে আপনাকে গ্রেপ্তার করি।

সরযু। “করুন”—এই বলিয়া—বাঁধিবার জন্ত হাত বাড়াইয়া দিলেন। সেই সময়ে তাঁহার শির উন্নত হইল। তাঁহার অবগুষ্ঠন খসিয়া পড়িল। সকলে সহসা উঠিয়া, তাঁহার পানে সহসা সভক্তিবিগ্নয়ে দৃষ্টিপাত করিলেন।

## চতুর্থ দৃশ্য

স্থান—বিশ্বেশ্বরের বাটী। কাল—প্রভাত।

বিশ্বেশ্বর, পরেশ ও দয়াল।

বিশ্বেশ্বর। টাকা চাই, টাকা চাই, যেমন করে' হোক।

পরেশ। তা ত দেখছি, কিন্তু টাকা আসে কোথা থেকে!—তখন ত যা ছিল, হাতে বিলিয়ে দিলেন।

বিশ্বেশ্বর। তা দিয়েছি বটে। কিন্তু টাকা চাই।

পরেশ। বে ধার চেয়েছে, ধার দিয়েছেন; সে টাকা ফিরে দেয় নি। অমূকের পিতৃদায়, অমূকের কণ্ঠাদায়, অমূকের দেনার দায়—যত রকম দায় আছে, সব নিজের ঘাড় পেতে নিয়েছেন—এখন!

বিশ্বেশ্বর। এখন আমার বিপদে তা'রা সাহায্য কর্বে নু?—আমার দায় তা'রা ঘাড় পেতে নেবে না?

দয়াল। মানুষ চেনো নি বিশ্বেশ্বর! তাই উপকারের প্রত্ন্যপকার আশা কর!

বিশ্বেশ্বর। যখন উপকার করেছিলাম, তখন ভেবে করি নি যে প্রত্ন্যপকার পাবো। আজ—প্রথম সে কথা মনে হোল।—দেবে না? তা'রা এ বিপদে আমায় কেউ দশহাজার টাকা ধার দেবে না?

পরেশ। দেখুন না চেয়ে!

বিশ্বেশ্বর। বল কি পরেশ, জগতে প্রত্ন্যপকার নাই? উপকারের প্রতিদান—

দয়াল। গালাগালি—তাই যদি সে নিরন্ত থাকে তের।

বিশ্বেশ্বর । কেন ?

দয়াল । অধম মানুষ !—যত দাও, তত চায় ; যত তা'র উপকার কর, ততই যেন তার উপকার কর্তে তুমি বাধ্য । যদি না পার—  
গালাগালি !

বিশ্বেশ্বর । মানুষ এত নীচ !—না না । তা হ'তে পারে না । তা হ'তে পারে না ।

পরেশ । এই যে তাঁদের মধ্যে একজন—ঐ ছাতি মাথায় দিয়ে যাচ্ছেন । ডাকবো ?—একবার চেয়ে দেখুন না ।—ও চারুবারু !

চারু । [ নেপথ্যে ] কি ।

পরেশ । একবার এদিকে আসুন ত ।

[ নেপথ্যে ] বিশেষ দরকারে যাচ্ছি ।

পরেশ । হ'মিনিটের জন্ত ।

[ নেপথ্যে ] আঃ !

দয়াল । ঐ আসছে ! কিন্তু মুখের ভাবটা দেখছে !

চারু দত্তের প্রবেশ

চারু । কি বল !—আমার সময় নাই ।

পরেশ । সময় আছে মনে কর্লেই আছে ; আর নেই মনে কর্লেই নেই । একদিন যে এখানে হত্যা দিয়ে পড়ে' থাকতেন ।

বিশ্বেশ্বর । সত্যই সময় নেই ?

চারু । আজ্ঞে !

বিশ্বেশ্বর । সত্য ?

চারু । সত্য ।

বিশ্বেশ্বর । আচ্ছা—যাও ।

চারু যাইতে উত্তত।

পরেশ। দাঁড়ান। আপনার বেশী সময় অপব্যয় কর্ব না। দাদা-  
মহাশয়ের কাছে আপনি হাজার পাঁচেক টাকা ধারেন, মনে আছে ?

চারু। কৈ ?—না।

পরেশ। কিন্তু ধারেন।

চারু। কোন দলিল আছে ?

পরেশ। বোধ হয় নেই ! মূর্থ দাদামহাশয় দলিল নেন নি। তবে  
ধারেন।

চারু। কোন পুরুষে নয়।

পরেশ। এই পুরুষেই ধারেন !

চারু। না।—আমার আর সময় নাই [ যাইতে উত্তত ]

বিশ্বেশ্বর। তুমি আমার কিছু ধারো না ভায়া। আমি তোমার  
কাছে ধারি।

চারু। [ ফিরিয়া ] তা হবে। তা হবে।—কত ?—ঠিক স্বরণ হচ্ছে  
না।—নানা কাজে ব্যস্ত, মনেও থাকে না।—কত ?

বিশ্বেশ্বর। তা জানি না। তবে মানুষের ধুর মানুষের কাছে আছেই  
ভাই।—কেউ স্বীকার করে, কেউ করে না।—ভাই ! তুমি আমার কিছু  
ধারো না ! কিন্তু আমায় দান কর। আমি বড় বিপদে পড়েছি।

চারু। আমার আর সময় নেই। আমি যাই [ প্রস্থান।

দয়াল। কি বিশ্বেশ্বর ! কি ভাবছো !

বিশ্বেশ্বর। ভবানীপ্রসাদ—ওহে ভবানীপ্রসাদ—

দয়াল। ভবানীপ্রসাদ বি কর্কে।—

পরেশ। ঐ শ্রামাদাস : ছে।

বিশ্বেশ্বর । কোন্‌ শ্রামাদাস ?

পরেশ । যার কতাদায়ে আপনি পাঁচহাজার টাকা দিয়েছিলেন—  
শ্রামাদাস বাবু ! ও শ্রামাদাস বাবু !—চলে' গেলে ।—উত্তরও দিলে  
না ।—আপনার কাছে জানি ও কখনই আসবে না । '

বিশ্বেশ্বর । কেন ! আমি কি ক্ষেপা কুকুর ! লোকে আমার কাছে  
আসতে এত ভয় করে কেন ? —

দয়াল । হয় উপকাবীকে চিন্তে পারে না, নয় দেখতে পারে না ।

পরেশ । ঐ বিনোদ বাবু ! বিনোদ বাবু ! বিনোদ বাবু !

[ নেপথ্যে ] কি—

পবেশ । একবার এ দিকে আসুন ত ।

বিনোদ । [ নেপথ্যে ] যাচ্ছি ।

বিশ্বেশ্বর । এই ত ডাকবা মাত্রই এল । মানুষ এত খারাপ হ'তে  
পারে ! দুটো একটা কি রকম বিগড়ে যায় ।—ঐ ত আসছে ।

পরেশ । ' কিছু বুঝতে পারছি না । ওকে আপনি যে পনেরহাজার  
টাকা দিয়েছিলেন—ওর পরিবার আর ওকে ডিক্রোর দায় থেকে বাঁচাতে ।

বিশ্বেশ্বর । ও যে আমার ভাগিনেয় জামাই ।

দয়াল । ও তাই !—

বিনোদের প্রবেশ ।

বিশ্বেশ্বর । এসো বাবাজী !

বিনোদ । বিশ্বেশ্বর বাবু ! এ উত্তম ।—বুড়োবয়সে এ কেলেকারী !  
আমি নিজেই আসছিলাম ।—এই কেলেকারী !—এক বেতার পায়ে এই  
টাকাটা ঢেলে দিলেন । আর আমি কালী, আমার মেয়ের বিয়েতে পাঁচ

হাজার টাকা চাইলাম—বলে' পাঠালেন টাকা হাতে নাই। আর আমি আপনার ভাগিনেয় জামাই।

দয়াল। মাথা কিনে রেখেছ বাপু, মাথায় চড়।

বিশ্বেশ্বর। না স্বা।—শোন বাবাজি, আমার নিজের এখন টাকার দরকার। দেই কোথা থেকে।

বিনোদ। অথচ বেশার পায়ে টাকা ঢেলে দিতে পারেন। বেশ—বিশ্বেশ্বর। বেশার পায়ে!—

বিনোদ। আর কাজ নাই—শঠ, মাতাল, লম্পট।

পরেশ। চোপরও উল্লুক। [ গিয়া টু টি টিপিয়া ধরিলেন ]

বিশ্বেশ্বর। আহা! কর কি! কর কি!

পরেশ। বেরো এখান থেকে।

বিনোদ। বেশ!—এ বাড়ীতে আর কোন্ বেটা পদার্পণ করে।

[ প্রস্থান।

দয়াল। ও বাবা, এ যে ভীষ্মের প্রতিজ্ঞা।

বিশ্বেশ্বর। এ কি—তবে সত্যি কি মানুষ এত অকৃতজ্ঞ হয়! এ যে—এ যে আমি কখন কল্পনাও কর্তে পারি নি।—ভবানীপ্রসাদ! একটা—না, আমি বুঝতে পারছি না। কিছু বুঝতে পারছি না। আমার মাথা ঘুরছে। চক্ষে অন্ধকার দেখছি।—ঈশ্বর, টাকা না পাই, না খেয়ে মরি, সরষু ফাঁসি যাক—মানুষে যেন বিশ্বাস না হারাই, তোমাতে যেন বিশ্বাস না হারাই।

দয়াল। বিশ্বেশ্বর! আমি এ টাকার যোগাড় করছি। তুমি নিশ্চিন্ত থাকো।

বিশ্বেশ্বর। ও কি! আক! নক্ষত্রলো টলছে—মাতাল হয়েছে



না কি ! পৃথিবী পায়ের নীচে থেকে নেমে যাচ্ছে। চন্দ্র অগ্নিবৃষ্টি করছে। বাতাস এক জায়গায় দাঁড়িয়ে নিজের ঘাম মুছেছে। দয়াল ! আমায় ধর। পড়ে' যাচ্ছি।

দয়াল। অধীর হ'য়ো না। আমি এ টাকা'র যোগাড় করছি !—  
আমি এ টাকার যোগাড় করে' আনছি।

বিশ্বেশ্বর। আনছো ! আনছো !—হাঁ, নিয়ে এসো ! ভিক্ষা করে' হোক, চুরি করে' হোক—এনে দাও। সরষু বাঁচুক, তার পর প্রলম্ব হোক ! কিছু যায় আসে না।

দয়াল। বিশ্বেশ্বর উন্মাদ হ'য়ো না।

বিশ্বেশ্বর। না না—উন্মাদ হবে না। এখনও সরষু জেলে পচছে। সেই সোণার প্রতিমা, সেই মূর্তিমতী উষা, সেই ননীর দেহখানি জেলে পচছে ; সেই সত্যী, সেই যোগিনী, সেই হুঃখিনী, সেই আনন্দময়ী, সেই স্নানরী, সেই দেবী, দিদি আমার ম'র্তে যাচ্ছে। আমার দেহের শক্তি, আমার নয়নের জ্যোতিঃ, আমার জীবনের সুখ, আমার পরকালের স্বর্গ—আমার ইহকালের সর্বস্ব, আমার আমি—আমায় ছেড়ে চলে' যাচ্ছে ! আমি যেতে দিব না—টাকা চাই, টাকা চাই। বুঝলে দয়াল ?—টাকা চাই।

দয়াল। আচ্ছা, আমি এই মুহূর্তে যাচ্ছি, যেখান থেকে হোক—  
টাকা নিয়ে আসছি। তুমি নিশ্চিন্ত হও। [ প্রস্থান।

বিশ্বেশ্বর। নিশ্চিন্ত হবে ! হাঁ, ভয় কি ! ১০,০০০ টাকা কেউ পার দেবে না !—সংসারে সব কৃতঘ্ন !—ওরে, তোদের যে আমি সব দিয়ে আজ নিজে ফতুর হ'য়ে, রাস্তার ভিখারী হ'য়ে, দ্বারে দ্বারে কেঁদে কেঁদে বেড়াচ্ছি !—দয়া নাই ? কৃতজ্ঞতাও নাই ?—না, তা কি হ'তে পারে।—

ঐ যে—নক্ষত্রগুলো আবার স্থির, শান্ত, জ্যোতির্ময়। এই যে আবার স্নিগ্ধ বাতাস বৈছে! ঐ যে শুভ্র জ্যোৎস্না শ্রামা ধরিজীকে স্নেহে জড়িয়ে রয়েছে! —না না! তা কি হ'তে পারে! সৃষ্টি এত সুন্দর; সৃষ্টির সেরা সৃষ্টি মানুষ এত কুৎসিত! হ'তে পারে! —না, এ কথা বিশ্বাস কর্তে পারি না, করব না।

পার্কতীর প্রবেশ।

বিশ্বেশ্বর। এই যে পার্কতী! পার্কতী—আমায় দশহাজার টাকা ধার দাও।

পার্কতী। আমি ধার দেবো? আপনাকে? বলেন কি!

বিশ্বেশ্বর। কেন! কেন! তুমি আমার জমিদারি নিলাম করে' নিয়েছো। তুমি আমার পথের ভিখারী করেছো—না না, তুমি কর নি। আমি হয়েছি—মানুষকে সর্বস্ব দিয়ে—না, আমি কাউকে কিছু দিই নি। কেবল পরের নিষ্ঠি—লুট করেছি! কারো দোষ নয়। দোষ আমার। এত বিশ্বাস, স্নেহ, এত—না, কোথায়! আমি কাউকে ভালবাসিনি।—কেবল শাঠ্য জোচ্চোরি হত্যা করে' বেড়িইছি। আমার দশ হাজার টাকা দাও।

পার্কতী। আমি টাকা দেবো আপনাকে! • আপনি মস্ত জমীদার, আপনি দাতা, আপনি মহৎ লোক! আমরা সব ছোটলোক।

বিশ্বেশ্বর। না, কে বলেছে। ছোট লোক আমি, নীচ আমি, স্বগা আমি, পাপী আমি। তোমরা সব ধার্মিক, তোমরা সব পুণ্যাত্মা, তোমরা সব দেবতা—টাকা ধার দাও! আমি এক মাসের মধ্যে শোধ দেবো।

পার্কতী। তার জামিন কে!

বিশ্বেশ্বর। আমি আমার জমিদারী বাঁধা রাখছি।

পার্কতী। সমস্ত সম্পত্তি!

বিশ্বেশ্বর । আমার যা কিছু আছে—আমার জমিদারী, আমার বাড়ী, আমার ইহকাল, আমার পরকাল—সব নাও, আমায় ১০,০০০ টাকা দাও । আমার নাতিনীকে বাঁচাতে চাই । আমার সব যাক্—সে বাঁচুক ।

পার্কতী । শ্রীশ—তমস্ককথানা দাও ত । • দাদামহাশয় দস্তখৎ করুন !—দাদামহাশয়, আমি আপনার বিপদের কথা শুনেই এসেছি । আমাকেই এ ধার দিতে হবে তাও জানি । তাই একেবারে দলিল তৈরি ক’রেই এনেছি । আপনি একদিন আমার বিপদে আমার বাড়ী বয়ে’ টাকা এনেছিলেন । সে উপকার আমি ভুলি নি দেখছেন ।

বিশ্বেশ্বর । তোমার জয় হোক্ ।

পার্কতী । শ্রীশ—

শ্রীশ দলিল দিলেন ।

পার্কতী । তবে দস্তখৎ করুন !

বিশ্বেশ্বর । কোথায় দস্তখৎ কর্ক ?

পার্কতী । এইখানে ।

বিশ্বেশ্বর । দাও ! [ দস্তখৎ করিলেন ]

পার্কতী । বেশ ! [ দলিল পকেটে রাখিলেন ]

বিশ্বেশ্বর । টাকা ?

পার্কতী । গিয়ে পাঠিয়ে দেবো ।—

বিশ্বেশ্বর । মা কালী তোমার মঙ্গল করুন ! আমি বল্ছিলাম দয়ালকে যে, এ কি হ’তে পারে যে মানুষ অকৃতজ্ঞ !—মানুষে বিশ্বাস ফিরে পেলাম । হাঁফ ছেড়ে বাঁচলাম । তোমার জয় হোক্ পার্কতী ।—আর সরয় ! আমি তোমায় বাঁচাবো ; আমি প্রমাণ কর্ক, সংসারকে দেখাবো যে, তুমি কত বড় সতী, তুমি কত বড় খ্যাবাদিনী ! তুমি সংসারের চক্ষে

চতুর্থ অঙ্ক ]

পরপারে

[ চতুর্থ দৃশ্য

ধূলি দিতে পার, আমার চক্ষে পার্কে না। তুমি আমায় ছেড়ে যাবে !  
আমি যেতে দেবো না। [ প্রস্থান।

পার্বতী। বুঝেছো শ্রীশ !

শ্রীশ। আজ্ঞে বুঝেছি।

চারু ও বিনোদের প্রবেশ।

পার্বতী। এই যে এসেছো !—একটা দস্তখৎ কর্তে হবে। এই  
নাও।

চারু। দস্তখৎ ! কিসের !

পার্বতী। দেখ না।—সাক্ষী হ'তে হবে।

চারু। [ পড়িয়া ] 'ও !—টাকা দিয়েছো ?

পার্বতী। না দিলে স্বচ্ছন্দমনে লিখে দেন !—দেখুছ না !

চারু। ও ! বুঝেছি।—চমৎকার !—দেও কলম। [ দস্তখৎ  
করিলেন !

পার্বতী। বিনোদ দস্তখৎ কর।

বিনোদ। কি বল চারু !

চারু। কুছ পয়োয়া নাই ! দস্তখৎ কর।

[ বিনোদ দস্তখৎ করিলেন ]

বিনোদ। কিন্তু রেজেষ্টারির সময় ?

পার্বতী। তোমরা সাক্ষী আছ।

চারু। বেঁচে থাক। তুমি পাক্কা বদমায়েস্। কিন্তু এই লোকটা  
—একেবারে অজমুখ।

[ তিনজন উচ্চ হাস্য করিলেন। শ্রীশ যোগ দিল। ]

## পঞ্চম দৃশ্য

স্থান—বধ্যভূমি। কাল—প্রত্যুষ!

বদ্ধহস্ত সরযু ও জেলার বাবু।

সরযু। আর কত দেরি জেলার বাবু।

জেলার। আধ ঘণ্টা খানিক। সিভিল সার্জেন আসেন নি—  
উপরে কি চাইছ মা?

সরযু। একবার শেষবার পৃথিবীটা দেখে নিচ্ছি।—কি সুন্দর স্বচ্ছ  
আকাশ!—কি নীল! কি শুদ্ধ!—পাখীরা কৈ গাইছে না ত! তার  
এখনও উঠে নি!—ঐ সূর্য্য উঠছে না?

জেলার। হাঁ মা।

সরযু। কি সুন্দর এই পৃথিবী! এত সুন্দর ত তাকে কখন দেখি  
নাই। আজ ছেড়ে যাচ্ছি, তাই বুঝি তাকে এত সুন্দর দেখছি।—এই  
সৌন্দর্য্য আমি নিত্য উপভোগ কর্তে পার্তাম। ভুবনেশ্বরী! আমি মোক্ষ  
চাই না। আমি আবার এই সুন্দর জগতে জন্মাতে চাই। আমি  
আবার এসে সূর্য্যোদয় দেখতে চাই, আবার বিহঙ্গের সঙ্গীত শুনতে চাই,  
আবার সুবাসিত বসন্তপবনহিল্লোলে স্নান কর্তে চাই, আবার ভালবাস্তে  
চাই। সেবার এসে জন্ম উপভোগ করে' নেবো—এবার বিফলে গেলু—  
ভোগ করা হোল না!—জেলার বাবু! মরবার আগে একবার দাদা-  
মহাশয়ের সঙ্গে সাক্ষাৎ কর্তে ইচ্ছা করি। তিনি আসেন নি?

জেলার। না মা।

সরযু। তবে আর তাঁকে বলা হোল না—যে আমি তাঁকে কত ভালোবাস্তাম। আমরা পরস্পরকে বড় ভালোবাস্তাম জেলার বাবু! তেমন ভালো বুঝি জগতে আর কেউ কাউকে বাসে নি! মুখোমুখি বসে' তিনি কখন আমার দিকে একদৃষ্টে চেয়ে রৈতেন, আমি তাঁর দিকে চেয়ে রৈতাম, তিনি আমাকে বুকে চেপে ধর্ভেন, আর আমার চক্ষে জগৎ লুপ্ত হ'য়ে যেত। ওঃ!—তাঁকে ছেড়ে যেতে হবে!—জেলার বাবু।

জেলার। কি কর্বে মা, উপায় নাই!

সরযু। না, উপায় নাই বটে, আমি যে হত্যা করেছি।

জেলার। তুমি হত্যা কর নি। আমি শপথ করে' বলতে পারি মা।

সরযু। ঐ যে আমার স্বামী আসছেন। আমার একবার হাত খুলে দেন নঃ জেলার বাবু!—আবার বেঁধে দেবেন এখনই। [ জেলার কথাবৎ কার্য্য করিয়া দূরে বাইয়া অবস্থান করিলেন ]

মহিমের প্রবেশ।

সরযু। এসো, আমি একবার শেষ সাক্ষাতের জন্ত 'তোমাকে ডেকেছিলাম।—পায়ের ধূল দাও। [ পদধূলি গ্রহণ ] জন্মের মত বাচ্ছি। জন্মের মত বিদায় দাও।

মহিম। সরযু! তুমি এ কাজ কর্লে কেন?

সরযু। [ হাসিয়া ] কি কাজ?

মহিম। মিথ্যা করে' এ দোষ নিজের ঘাড়ে করে' নিলে! কেন নিলে!

সরযু। জনো না কেন?

মহিম। এই নরাধমকে বাঁচতে? আমার এই জঘন্ত কলুষিত জীবন জগতের কোন্ উপকারে ল'বে সরযু?

সরযু। জগতের উপকারের জন্ত এ কাজ করি নি, নিজের উপকারের জন্ত করেছি।

মহিম। কি উপকার ?

সরযু। সুখ। গলায় দড়ি দিতামই। তবে এ গলায় দড়ি দেওয়ার মত তাতে সুখ হতো না। এ একটা কর্তব্য করে ম'লাম।

মহিম। প্রাণ দিয়ে মনের সুখ !

সরযু। বড় সুখ ! মরে সবাই। কেউ ডুবে মরে, কেউ পুড়ে মরে, কেউ সাপে কামড়ে মরে, আর বেশীর ভাগ রোগে ভুগে মরে। মরতেই ত হবে। দুদিন আগে আর দুদিন পরে। পালিয়ে পালিয়ে মরার চেয়ে মৃত্যুকে হেসে এগিয়ে নেওয়া বেশী সুখের নয় কি !

মহিম। কিন্তু সংসার সম্ভোগ ছেড়ে চির জন্মের মত যাওয়া—আমার বড় ভয় করে—বড় ভয় করে।

সরযু। অত ভয় করে বলেই ত মৃত্যুর জয়। আর যদি ভয় না করি!—তা হ'লেই ত আমি মৃত্যুঞ্জয়ী। সে কি কম লাভের কথা ?

মহিম। মর্তে তোমার সত্যই ভয় করছে না ?

সরযু। না ! [ বুক ফুলাইয়া ] আমি দাদামহাশয়ের কাছে শুনেছি যে, যখন যুদ্ধের বাণ্ড বেজে উঠে, সৈন্ত আর স্থির থাকতে পারে না ; নাচতে নাচতে কামানের মুখে অগ্রসর হয় ! আমি আজ কর্তব্যের গভীর আত্মদান-ভেরী শুনেছি। সেই ডঙ্কা শুনে আমি উচ্ছর্ষিত নিঃশঙ্কে বিজয়গর্বে ম'র্তে চলেছি।

মহিম। কি, কোথায় চলেছ ?

সরযু। জানি না। যদি সব এ জন্মেই শেষ—যদি পরকাল না

থাকে তা হ'লে ত ছুঃখ নাই। পরজন্মে আমিই যদি না থাকি, ছুঃখ অনুভব কর্কে কে !—

মহিম। আর যদি পরকাল থাকে।

সরযু। তা ইহকালের চেয়ে খারাপ হ'তে পারে না। এরই মত সে স্নেহে ছুঃখে গড়া। বিশেষতঃ জ্ঞান মতে যদি নিজের কর্তব্য করে' যাই, এটি ধ্রুব যে, পরিণাম বিশেষ মন্দ হ'তে পারে না। আমি বিশ্বাস করি যে পরকাল আছে, সে এই পৃথিবীতেই হোক, কিংবা অন্য পৃথিবীতেই হোক। এ বুদ্ধি, এ বিবেক, এ অনুভূতি—এত বড় আয়োজনের কি এই থানেই—এই ঘাট বৎসরেই শেষ ? এই আকাজ্জ্বল নিশ্চয়ই রক্তমাংসে অস্থিমজ্জায় আবৃত হ'য়ে আবার মূর্ত্তিমতী হ'য়ে আসবে। ঐ স্বর্ণাভ নীল আকাশের দিকে চেয়ে দেখ, এই হাশুময়ী ধরণীর দিকে চেয়ে দেখ, ঐ বিহঙ্গের ঝঙ্কার শুন, ঐ গাভীর গভীর আহ্বান শুন, ঐ মানুষের স্বর্গীয় কর্ণধ্বনি শুন,—এই অনুপমা সৃষ্টির অপূর্ণ শৃঙ্খলা মনে ভেবে দেখ দেখি ! এ কি কারো ছেলেখেলা ! এ কি উন্মাদের প্রলাপ ! এ কি মদোন্মত্ত ব্রহ্মাণ্ডপতির অট্টহাস্য ? এর একটা মহত্তর পরিণাম আছেই আছে !—না প্রভু, মরতে আমার কোন ভয় নাই।—তবে আমায় বিদায় দাও।

মহিম। সরযু ! যাবার আগে আমায় ক্ষমা করে' যাও।

সরযু। কিসের জন্ত ?

মহিম। তোমায় গালি দিয়েছি, মেরেছি, আর শেষে তোমায় ফাঁসি কাঠে উঠিয়েছি।

সরযু। [সহাস্ত্রে] আচ্ছা, কিন্তু ভালো হ'তে চেষ্টা করো। তোমার মঙ্গলের জন্ত বলছি। নহিঁ, তোমার ভবিষ্যৎ ভীষণ জেনো !—তবে বিদায় দাও !



মহিম। ঈশ্বর আর একবার স্মরণ দাও, সরযুকে বাঁচাও, আমার বাঁচাও। আবার সংসার পত্তন করি। আমার মাকে ফিরিয়ে দাও, পূজা করি; জীকে ফিরিয়ে দাও, ভালবাসি।

সরযু। পুনর্জন্মে এসে দেখবো, তুমি কত ভালোবাসো।—তবে যাও। আমি প্রস্তুত হই।

মহিম প্রস্থানোত্তত।

সরযু। দাঁড়াও, আর একবার পায়ের ধূলা নেই। [ চরণস্পর্শ ]  
যাও। [ মহিমের প্রস্থান। ]

জেলার। আমি জানি মা! তুমি হত্যা কর নাই!

সরযু। তা কি হয় জেলার বাবু! তা না হ'লে আমার ফাঁসি হবে কেন!

জেলার। তোমার আগেও অনেক নির্দোষীর ফাঁসি হ'য়ে গিয়েছে। মানুষের বিচার, আর কি হবে মা!—ঐ বুঝি তোমার দাদামহাশয় আসছেন।

পরেশ, দয়াল ও বিশ্বেশ্বরের প্রবেশ।

বিশ্বেশ্বর। এই যে আমার স্নেহের পুতলী!

সরযু। দাদামহাশয়! [ বক্ষে পড়িয়া ক্রন্দন ]

বিশ্বেশ্বর। রক্ষা কর্তে পার্লাম না দিদি। স্বপ্নেও কখন জাবিনি যে আমার বড়ো বয়সে শেষে এই দেখে ম'র্ত্তে হবে। এরই জন্ত কি এতদিন বেঁচে রৈলাম! ভগবান্! যে আমার প্রাণের প্রাণ, আত্মার আত্মা—সেই নিরপরাধিনীর ফাঁসি দেখবার জন্ত বেঁচে রৈলাম।

সরযু। সে কি দাদামহাশয়! আমি যে হত্যা করেছি!

বিশ্বেশ্বর। না দিদি, তুমি হত্যা করেনি। তুমি এ কাজ কর্তে

পারো না। আমি জানি, আমার অন্তরাগ্না জানে, ঈশ্বর জানেন, তুমি হত্যা কর নি। তুমি হত্যা কর্তে পারো না। সতীর গর্ভে তোমার জন্ম, সতীসাবিত্রীর দেশে তোমার বাস, আমার নাতিনী তুমি—তুমি হত্যা কর্কে ! আল্লা যদি সে দিন থাকতো, বিচারের দিন না হ'য়ে যদি আজ অগ্নিপরীক্ষার দিন হোত, ত—আমি চেষ্টায়ে বলতে পারি বে, তুমি সীতা দেবীর মত তোমার পুণ্যের জ্যোতিঃতে অগ্নির আলাকে স্নান করে', সেই অগ্নিপরীক্ষায় হাসতে হাসতে বেরিয়ে আসতে। কিন্তু কি কর্বে দিদি—আজ এ আইনের দিন, এজলাসের দিন, সাক্ষীর দিন, জেরার দিন।

সরযু। আমি স্বীকার করেছি—তারা কি কর্কে !

বিশ্বেশ্বর। কি কর্কে ? শুধু ঐ চাঁদমুখখানির পানে চেয়ে দেখবে, আর কিছু কর্তে হবে না। সাক্ষ্য দিলেই হোল যে চক্ৰ দাহ করে, অগ্নি স্নিগ্ধ করে, বাতাস স্থির, পর্বত চঞ্চল, শিশু পিশাচ, মাতা রাক্ষসী ! ঐ শাস্ত্র সজল দৃষ্টির সঙ্গে কি বিষ মিশানো থাকতে পারে ? ঐ মুহূর্ত হাতের নীচে ছোঁরা লুকানো থাকতে পারে ? মূর্খ তা'রা, অন্ধ তা'রা।

সরযু। বা হ'বার তা হয়েছে দাদামহাশয় ! , এখন বিদায় দিন।

বিশ্বেশ্বর। স্বামীকে মৃত্যু হ'তে রক্ষা করবার জন্ত তুমি আজ এই দড়ির হার গলায় পড়ছ। পৃথিবী আজ তার শ্রেষ্ঠ রত্ন স্বর্গকে দিয়ে ধত্ব হবে, শূন্য হবে ! আর আমি—আমি—উঃ ! জ'লে' যাচ্ছি, পুড়ে যাচ্ছি। জেলার ! ঐ ডাক্তার সাহেব আসছেন।

সরযু। তবে আমার যাঁবার সময় হয়েছে। বিদায় দিন দাদামহাশয় ! হুঃখ কর্কেন না। এ বিচ্ছেদ একদিন হ'তই। 'আমায় বে স্নেহ দিয়েছিলেন, তা আজ ফিরিয়ে য়ে—বিশ্বময় ছাড়িয়ে দেন—বহুকরা ধনী

হবে। আপনার অপার কর্তব্যজ্ঞান ও স্নেহের সঙ্গে অতুল সহিষ্ণুতা  
মিশিয়ে দেন। জগৎকে বিস্মিত করুন। বিদায় দিন দাদামহাশয় !  
বিদায় দিন্‌ মামা ! [ পরেশ ও দয়ালকে প্রণাম । ]

বিশ্বেশ্বর। বিদায় দেবো ! বিদায় দেবো ! নম্ ! আমি পার্কি না।  
সরযু ! দিদি আমার ! [ জড়াইয়া ধরিলেন ]

দয়াল। এসো বিশ্বেশ্বর [ হস্ত ধরিলেন ]

বিশ্বেশ্বর। যাও, আমি যাবো না !

সরযু। যান দাদামহাশয়—লক্ষ্মীটি আমার [ কাঁদিয়া ফেলিলেন ]  
নিয়ে যান মামা !

বিশ্বেশ্বর। আমি যাবো না। আমিও তোর সঙ্গে ফাঁসি যাবো।  
আমি যাবো না।

সরযু। টেনে নিয়ে যান মামা। [ দয়াল ও পরেশ তাঁহাকে টানিয়া  
লইয়া গেলেন। বিশ্বেশ্বর “ছাড়, আমি যাবো না” বলিয়া ছাড়াইবাব  
চেষ্টা করিতে করিতে নিজস্বাস্ত । ]

সরযু শির নত করিয়া কাঁদিতে লাগিলেন। পরে আত্মসংবরণ করিয়া  
কহিলেন, “ওঃ !—যাক্, আমি প্রস্তুত জেলার বাবু !”

রক্ষিগণ সরযুর মুখ ঢাকিয়া দিল ; হস্তদ্বয় পশ্চাতে বাঁধিয়া দিল।  
জেলার সে দিকে পশ্চাৎ ফিরিয়া নতমুখে দাঁড়াইয়া রহিলেন। রক্ষিগণ  
সরযুকে ফাঁসি কাঠে উঠাইল।

ডাক্তার সাহেব ও ম্যাজিষ্ট্রেটের প্রবেশ।

ম্যাজিষ্ট্রেট মৃত্যুর আজ্ঞা পাঠ করিলেন।

“বন্দিনি ! শাস্তা বেঞ্জার হত্যার জন্য তোমার ফাঁসির আজ্ঞা

চতুর্থ অঙ্ক ]

পরপারে

[ পঞ্চম দৃশ্য

হয়েছে। আমি সেই আজ্ঞা পালন করছি। ঈশ্বর তোমায় মার্জনা করুন।—জন্মাদ ! তোমার কার্য্য কর।”

জন্মাদ সরষুর গলে ফাঁসির দড়ি লাগাইয়া দিল।

ম্যাজিষ্ট্রেট। তবে—[ মুখ ফিরাইয়া ] one, two—

বেগে শাস্তার প্রবেশ।

শাস্তা। খবদার ! নিরপরাধিনীর ফাঁসি দিবেন না। নিরপরাধিনীর ফাঁসি দিবেন না। শাস্তাকে কেহ হত্যা করে নি। শাস্তা জীবিত আছে।

ম্যাজিষ্ট্রেট। কে তুমি ?

শাস্তা। আমিই সেই শাস্তা।

—

## পঞ্চম অঙ্ক

### প্রথম দৃশ্য

স্থান—কাশীর নদীতীরস্থ একটা কুটার।

কাল—মেঘাচ্ছন্ন রাত্রি। বিশ্বেশ্বর ও দয়াল।

বিশ্বেশ্বর। মেঘ! রক্তবৃষ্টি কর। বাতাস! ভীমবেগে গর্জে' ওঠো। সমুদ্র! জলে' ওঠো। পৃথিবী! চৌচীর হ'য়ে ফুলিঙ্গ বৃষ্টি করে' চারিদিকে ছড়িয়ে পড়। আর আমি মহাশূন্যে একা দাঁড়িয়ে তাই দেখি।—মানুষ এত অকৃতজ্ঞ হয়!

দয়াল। বাড়ী ফিরে চল।

বিশ্বেশ্বর। যাবো। দাঁড়াও। আগে দেখি প্রলয় পূর্ণ হোক। আগে দেখি চন্দ্র সূর্য্য নিভে যাক, পৃথিবীর শ্রাম শোভা পুড়ে ছাই হ'য়ে যাক, একটা ধূমকেতুর সংঘাতে মহাজালাময় ধ্বংস হোক।

দয়াল। মাথা খারাপ হয়েছে।

বিশ্বেশ্বর। পৃথিবী যদি থাকে, তবে তার উপর থেকে মনুষ্যজাতি লুপ্ত হোক, আর তার পরিবর্তে শুধু যত কালসর্প এই পৃথিবীর উপর নড়ে' বেড়া'ক।—মানুষ এত অকৃতজ্ঞ!

দয়াল। চল বিশ্বেশ্বর—

বিশ্বেশ্বর। মানুষ যদি থাকে, ত ২ ৭ চোর, লম্পট, ধান্নাবাজ,

তা'রাই শুধু বেঁচে থাকুক, আর সব মরে' পচে' গলে' খসে' পড়ে' যাক ! তা হ'লে এই ব্রহ্মাও খাসা চলবে, বৌ বৌ করে' ঘুরে' !—ওঃ !

দয়াল। রাত্রি কত জীানো ?

বিশ্বেশ্বর। প্রেম, দয়া, স্নেহ, পাতিব্রতা, বাৎসল্য সব মুছে নিয়ে যাও দয়াময়ী ! 'প্রীমে শুধু কাম থাকুক ; বন্ধুত্বের উপর ঈর্ষা রাজত্ব করুক ; উপকারের শিওরে কৃতঘ্নতা পাহারা দিউক ! আহারে বিষ থাকুক, শরীরে ব্যাধি থাকুক, ঔষধো অহঙ্কার থাকুক, দারিদ্র্যে ঘৃণা থাকুক !—খাসা চলবে ।

দয়াল। না ! তোমা'য় জোর করে' না শোয়া'লে শোবে না । এসো ।—[ হাত ধরিলেন ]

বিশ্বেশ্বর। ছেড়ে দাও [ হাত ছাড়াইয়া ] ও ! তুমি !—তুমি আর আছো কেন দয়াল ! স্নেহময় বন্ধু,—ব্রহ্মাও'র অনিয়ম, ভূত গরিমার ধ্বংসাবশেষ, তুমি একা কেন পিছে পড়ে' আছ ? সব গিয়েছে । তুমিও যাও । যে পৃথিবীতে আজ দাক্ষিণ্য ভিক্ষুক, উপকার প্রপীড়িত, স্নেহ পদাহত, সেখানে, তুমি কেন ! সব চোর ধাপ্লাবাজ !—কি সৃষ্টিই করেছিলি মা ! নে তোর সৃষ্টি ফিরিয়ে নে ।—দয়াল !

দয়াল। বিশ্বেশ্বর !

বিশ্বেশ্বর। আর মা বলে' ডেকো না । সে বেটি সন্তানকে বিষ খাওয়ায়, সন্তান মৃত্যুযন্ত্রণায় ছটফট করে, আর পাষণী তাই দেখে করতালি দিয়ে অট্টহাস্য করে । এই ত মা ! তাকে আর ডেকো না ।

দয়াল। তবে কা'কে ডাকবো ?

বিশ্বেশ্বর। কেন—কেন—তাও ত বটে । কা'কে ডাকবো ? মায়ের কাছে থেকে ছুটে, কা'কে ডাকবো ? আর আছে কে ?

মায়ের অত্যাচারের নালিশ যে ঐ মায়েরই কাছে। আর আছে কে ? আছে কে ?

দয়াল। মায়ের বিচার মা বোঝেন। তুমি কে !

বিশ্বেশ্বর। ঠিক বলেছ দয়াল। মা বলে' ডাক্, মা বলে' ডাক্ !—কিন্তু সব শব্দ, সব প্রার্থনা, সব সঙ্গীত ছাপিয়ে ঐ মানুষের রক্তস্রব জয়ভেরী বেজে উঠেছে। সব দুঃখ যন্ত্রণা অন্তর্দাহ এই মহাদুঃখে ডুবে যায়—যে মানুষ অকৃতজ্ঞ। আমার হৃদয়ের অধীশ্বরী, স্নেহের পুতলী সরযুর আত্মহত্যাও এই দুঃখের মহারণ্যে হারিয়ে যায়।

দয়াল। সরযুর আত্মহত্যা বোলো না বিশ্বেশ্বর।

বিশ্বেশ্বর। তবে কি বলবো !

দয়াল। আত্মোৎসর্গ। বাঙ্গালীর ঘরে ঘরে সাবিত্রীর পূজা হয়। কিন্তু বাঙ্গালীর ঘরে ঘরেই সাবিত্রী ! নিজের সামগ্রী কেউ ঠিক্ আদর কর্তে জানে না।

বিশ্বেশ্বর। ঠিক্ বলেছ দয়াল। সরযু স্বামীর প্রাণরক্ষার জন্ত প্রাণ দিয়েছ। সে গিয়েছে—আর জগতের জন্ত রেখে গিয়েছে—এক অখণ্ড জ্যোতিঃ। তাতে দুঃখ নাই।—কিন্তু গলায় দড়ি দিল !—গলায় দড়ি দিল ! আমার উপর অভিমান করে' গলায় দড়ি দিল।—আর আমি তাই দাঁড়িয়ে দেখলাম।

দয়াল। আপনি ত দেখেন নি।

বিশ্বেশ্বর। দেখেছি। সেই সাদা সরু গলার চারিদিকে তা'রা দড়ি জড়িয়ে দিল—টেনে ফাঁস দিল !—আচ্ছা দয়াল ! কি করে' দিল ?

দয়াল। কি আশ্চর্য্য ভ্রম !—স্মৃতি ও কল্পনা তফাৎ কর্তে পারে না।

বিশ্বেশ্বর । সেই দড়ি গলায় দিয়ে আমার নাতিনী বুলে পড়লো, পৃথিবী কেঁপে উঠলো, সংসার অন্ধকারে ঢেকে গেল ।

দয়াল । আবার আরম্ভ হোল ।

বিশ্বেশ্বর । সেই লম্বমান দেহখানি প্রভাতের বাতাসে একবার রূপের সাপট মাল । তার পর একেবারে সব স্থির ! স্নেহসজল-নীল চক্ষুহুটি শূন্যে চেয়ে রৈল । সাদা মুক্তার মত দাঁতের উপর, রাস্মা চোঁট দুখানির উপর, ফেনা জেগে উঠল । আর সেই ননীর মত নরম দেহখানি শুকনো জ্বালানি কাঠের মত শক্ত অসাড় হয়ে গেল । আমি তাই দাঁড়িয়ে দেখলাম ।—ও হো হো হো !

দয়াল । অধীর হইয়ো না ।—ছিঃ !

বিশ্বেশ্বর । তার পর তা'র দেহমুক্ত জ্যোতির্ময় আত্মা স্বর্গে উড়ে গেল !—কি সুন্দর !

দয়াল । এখন তা আর ভেবে কি হবে ।

বিশ্বেশ্বর । না—না ! মানুষের কৃতঘ্নতা এসে এ হত্যার দৃশ্য ছেয়ে ফেলুক ; বজ্র কড়কড় শব্দে এসে এ ক্রন্দন থামিয়ে দিক ; রক্তপ্রপাত নেমে এসে এ সুন্দর ধ্বংস ডুবিয়ে দিক ।

দয়াল । একবার এ চিন্তা, আর একবার ও চিন্তা—এ রকম কলে'মারা যাবে যে !

বিশ্বেশ্বর । ও ! হ্যাঁ ! বেঁচে থাকতে হবে । পঙ্খু হই, শূল বেদনা ধরুক, শিরঃপীড়ায় মাথা'র আগুন ছুটুক—বেঁচে থাকতে হবে । হাঁ—হাঁ, বেঁচে থাকতে হবে । বাও দয়াল, ঘুমোওগে । আমিও ঘুমোইগে যাই—কালসাপিনী বড় দংশন করেছিল—

[ প্রস্থান ।

দয়াল । হারে হতভাগা, এ ভালবাসা নিয়ে সংসারে এসেছিলে কেন !



## দ্বিতীয় দৃশ্য

স্থান—বিশ্বেশ্বরের বাটীর বারান্দা। কাল—প্রভাত।

পরেশ, কালীচরণ ও শাস্তা দাঁড়াইয়া কথোপকথন করিতেছিলেন।

শাস্তা। মহিম বাবু আমায় গুলি করেছিলেন বটে। কিন্তু তাতে আমি সামান্য আহত হ'য়ে পড়ে' গিয়েছিলাম মাত্র। মূর্ছা ভাঙলে উঠে দেখলাম স্থান পরিত্যক্ত, আমার পিস্তল আমার পায়ের তলায় পড়ে'। পিস্তল হাতে করে' বাহিরে এলাম! দেখলাম প্রতিবেশীরা এসে জমা হয়েছে; গল্প করছে! আমি পিস্তল অঞ্চলে লুপ্ত হয়ে নিয়ে আমার গাড়ীতে উঠলাম। কেউ লক্ষ্য করল না। বাসায় গিয়ে শুনি যে বাগানে এক হত্যা হ'য়ে গিয়েছে। সমস্ত রাত্রি নিদ্রা হয় নি। শেষ রাত্রে বাড়ী ছেড়ে পালাই।

কালী। তার পর?

শাস্তা। পরে একুশান খবরের কাগজে পড়লাম যে শাস্তা বেস্তার হত্যার অপরাধে সরযুনামী ব্রাহ্মণকন্ঠার ফাঁসির আজ্ঞা হয়েছে।

কালী। The hungry judges soon the sentence sign  
And wretches hang that jurymen may dine.

পরেশ। তবে মহিম গুলি করেছিল?

শাস্তা। হাঁ।

পরেশ। সে কথা তবে তখন আ'লতে প্রকাশ কর নি কেন?

শাস্তা। কারণ—তিনি যাই হোন, তিনি দিদির স্বামী!

পরেশ। তাই তুমি মিছা কথা কৈলে যে তুমি আত্মহত্যা কর্তে গিয়েছিলে ? আর এই মিথ্যা কথা কয়ে জরিমানা দিলে।—আশ্চর্য্য।

কালী। Woman's at best a contradiction still.

[ প্রস্থান।

উদ্ভ্রান্ত ভাবে আলুলায়িতকেশা সরযুর প্রবেশ, পশ্চাতে

ভবানীর প্রবেশ।

সরযু। মামা, আপনি দাদামহাশয়কে ছেড়ে দিলেন।

পরেশ। আমি জান্তে পালে' কি আর তাঁকে ছেড়ে দেই মা !—

পরদিন সকালে উঠে শুনি, তিনি আর দয়ালবাবু নিরুদ্দেশ।

সরযু। আর ভবানী দাদা—তুমিও—

ভবানী। মায়ের ইচ্ছা। [ চক্ষে বজ্র দিয়া দ্রুত প্রস্থান ]

সরযু। তিনি আত্মহত্যা করেছেন নিশ্চয়, মামা !

পরেশ। না মা কোন ভয় নাই। দয়ালবাবু সঙ্গে আছেন। কোন ভয় নাই। এখন বাড়ীর ভিতরে তোমার মামীর কাছে যাও। কোন চিন্তা নাই।

সরযু। আমার দাদামহাশয়কে এনে দেন। আমার দাদামহাশয়কে এনে দেন।

পরেশ। এনে দেবো—তিনি যেখানে থাকেন টেনে আন্বো। এসো, বাড়ীর ভিতর এসো মা।

শাস্তা। আমার জন্মই এত বিড়ম্বনা।

সরযু। সে কি বোন ! তুমিই আমার রক্ষাকর্ত্তী। যদি দাদামহাশয়কে আবার দেখতে পাই, তে আমারই জন্ম পাব।—আর যদি না পাই—আত্মহত্যা কর্ব।

শাস্তা। সাবধান দিদি ! তার চেয়ে তোমার ফাঁসি ছিল ভালো।  
আত্মহত্যা কর্তার অধিকার কারো নাই।—আমারও না।

ব্যস্তভাবে ভবানীর পুনঃ প্রবেশ।

ভবানী। দিদি ! দাদামহাশয়ের সংবাদ পেয়েছি।

সরষু। [ সাগ্রহে ] কোথায় তিনি ?—কোথায় তিনি ?

ভবানী। কাশীতে।—এই নাও দয়ালের পত্র। এই পেলাম !  
[ পরেশকে পত্র প্রদান ]

সরষু। ভবানীদাদা ! আজই কাশীযাত্রার আয়োজন কর।—  
এক্ষণেই—এই মুহূর্তে।

পরেশ। এ কি মা ! তুমি স্থির হ'য়ে দাঁড়াতে পারছ না। এসো,  
বাড়ীর ভিতরে এসো।—ওকি সরষু ! [ তাঁহাকে ধরিলেন ]

সরষু। তবে—দাদামহাশয় তবে বেঁচে আছেন ! মামা ! মামা !  
[ বক্ষে পড়িয়া ক্রন্দন ]

পরেশ। ওকি মা !—এসো, ভিতরে এসো।

সরষু। এই আসছি, আমি আসছি দাদামহাশয়—

[ পরেশ ও সরষুর প্রস্থান।

ভবানী। দয়াময়ী ! আমার দিদিকে ফিরিয়ে দিয়েছিল, দাদা-  
মহাশয়কে ফিরিয়ে দিলি। তবে এ বাড়ীখানা ফিরিয়ে দে মা ! আর  
কিছু চাই না ! ফিরে এসে দাদা আর দিদিকে নিয়ে এই বাড়ীখানায়  
যেন উঠতে পারি মা ! যাক্ জমীদারী। পৈতৃক ভিটে কেড়ে নিসনে।

শাস্তা। কেন ! এ বাড়ী এখন কার ?

ভবানী। পার্বতী বাবুর—এখন দলিল রেজেষ্টারি করে' দখল  
নিলেই হয়।

শাস্তা । কি দলিল ?

ভবানী । কোটকবালা—জোচ্চোর তার টাকাও দেয় নি।—হাঁ মা, তোমার রাজ্যে এ রকম দিনে ছ'পুরে ডাকাতি হয় !

শাস্তা । দলিল রেজেষ্টারি হয় নি ?

ভবানী । না ।

শাস্তা । তা হ'লে দলিলখানা যদি ফিরে পাওয়া যায়, তা হ'লে ত আর কোন ভয় নাই ।

ভবানী । তা বোধ হয় নাই ।

শাস্তা । তবে এই সপ্তাহের মধ্যে দলিল ফিরে পাবেন।—নিশ্চিত থাকুন ।

ভবানী । সে কি !—কেমন করে ?

শাস্তা । [ সন্ধানহাস্তে ] বেণ্ডার অসাধ্য কিছু নাই ।

ভবানী । শাস্তা, তুমি পূর্বজন্মের কি পাপে বেণ্ডার ঘরে জন্মগ্রহণ করেছ জানি না ।

শাস্তা । বেণ্ডাদের ঘৃণা কর্কেঁন না । তারা বড় অভাগিনী । তাদের অনুকম্পা করুন । তাদের গৃহ নাই, পরিবার নাই, বন্ধু নাই । তারা যেন অন্ধকার রাত্রিকালে পরিত্যক্ত রাস্তা দিয়ে হেঁটে চলেছে, ছধারে দেখতে পাচ্ছে—দরিদ্রেরও কুটীরে আলো জ্বলছে ; দম্পতীর প্রেমের বিমল হাস্তের ফোয়ারা উঠেছে ! শিশুরা স্নেহের নীড়ে নিদ্রা যাচ্ছে । তারা তাই দেখছে, আর শীতের বাতাসের তীক্ষ্ণতর দংশন অনুভব করছে, অন্তরে গুম্‌মে মরে' যাচ্ছে । কোটি জ্যোতিষ্কের মধ্য দিয়ে তারাই লক্ষ্যহীন ধূমকেতুর মত ছুটে চলেছে ;—চলেছে, কারণ চলা ভিন্ন উপায় নাই । তাদের হৃদয় শিশুর চিতাবহি—যত উজ্জ্বল,

তত জালাময়। শেষে সে হাশ্ব যখন জলে' জলে' নেভে, তখন তার দীর্ঘ নিশ্বাস শ্বশানের উষ্ণ বাতাসে উঠে মিশে যায়। তারাই নিজেদের যথেষ্ট ঘৃণা করে। তার উপর আপনাদেরই ঘৃণা আর তাদের উপর চাপাবেন না। [ মন্তক অবনত করিল ]

ভবানী। ঘৃণা!—তুমি যদি আমার কথা হ'তে—

শাস্তা। [ সাগ্রহে ] তা হ'লে!

ভবানী। তা হ'লে, আমি নিঃসঙ্কোচে তোমায় ঘরে নিতাম!

শাস্তা। [ সাগ্রহে ] নিতেন?

ভবানী। নিতাম। যা!—তোমায় দেখে অবধি আমার মনে একটা অসীম অনুকম্পার উদয় হয়েছে—জানি না কেন! মনে হয় যে তুমি বেগুা নও, যেন একদিন তুমি সত্যই আমার কথা হ'লে, যেন একদিন—

শাস্তা। [ কল্পিতস্বরে ] আর আমি যদি সত্যই আপনার কথা হই।

ভবানী। সত্যই আমার কথা হও! সে কি! বেগুার ঘরে তোমার জন্ম!

শাস্তা। বেগুার ঘরে আমার জন্ম নয়।

ভবানী। তবে!

শাস্তা। আকাশ! মুখ ঢাকো। পৃথিবী কাণে আঙ্গুল দাও! আজ সে কথা প্রকাশ কর্ব্ব।—“বাবা!”—বলিয়া অগ্রসর হইল। ভবানী চমকিয়া পিছাইলেন।

শাস্তা। বাবা!—এ কথা জীবনে প্রকাশ কর্তাম না। কিন্তু আপনিই আমায় সাহস দিয়েছেন। বাবা! আমি সত্যই আপনার কথা—

ভবানী। সে কি !—আমার কত্যা তুমি ! আমার কত্যা ত মরে' গিয়েছে ।

শাস্তা। [ উঠিয়া ] অভাগিনী মরে নি ! [ অগ্রসর হইয়া ] বাবা !— [ পিছাইয়া ] না । আপনি অধোমুখ ! লজ্জায়, ঘৃণায়, ক্রোধে আপনার কর্ণমূল পর্ষ্যাস্ত রক্তবর্ণ হ'য়ে গিয়েছে ।—না—না—না । আমায় ঘৃণা করুন, ত্যাগ করুন, পদতলে দলিত করে' চলে' যান ।

ভবানী। কত্যা আমার !—তোমার মরণই ছিল ভালো ।— [ করবোড়ে উর্দ্ধমুখে ] এ কি পরীক্ষায় ফেলি মা ! হৃদয়ে শক্তি দে মা !

শাস্তা। না বাবা, যা বলেছি ভুলে যান ! আমি আপনার কত্যা নই । আমি আপনার কেহ নই । আমি কৃষ্ণ সমুদ্রের উপর একটা ঢেউয়ের মত উঠেছিলাম—আবার তারই মত কৃষ্ণসাগরে নেমে যাই ।

ভবানী শাস্তার দিকে অগ্রসর হইয়া কহিলেন “শাস্তা—”

শাস্তা। আমি অস্পৃশ্য ! আমায় স্পর্শ কর্বেন না ।—স্পর্শ কর্বেন না ।

[ দ্রুত প্রস্থান ।

ভবানী দীর্ঘ ভাবিলেন ; পরে গান ধরিলেন—

পেয়ে মাণিক হারালাম মা আমি নতি লক্ষ্মীছাড়া ।  
অঁধারে পথ দেখতে পাই নে, কোথা আছি দে মা সাড়া ।  
আপন যারা ছিল পাড়ায়—একে একে মরে' দাঁড়ায়,  
কুইও শেষে যাস নে ভেসে—ওমা এসে কাছে দাঁড়া ।

পরেশের পুনঃ প্রবেশ ।

পরেশ। শাস্তা চলে' গিয়েছে ।

ভবানী। কে !—না—হাঁ, গিয়েছে । [ গান চলিল ]

পরেশ । ভবানী ! কাঁদছ যে !

ভবানী । কৈ ! না । [ গাহিতে গাহিতে প্রস্থান ।

পরেশ । এ কি—এরা কা'রা ?—পার্কতী ! কি মনে করে—  
দেখা যাক্ ।

পার্কতী, কালীচরণ ও পশ্চাতে ক্রুদ্ধভাবে  
চারু ও বিনোদের প্রবেশ ।

পার্কতী । বিশ্বেশ্বর বাবুর কোন খবর পেয়েছেন ?

পরেশ । আপনার সে খোঁজে দরকার কি !

পার্কতী । দলিল রেজিষ্টারি কর্ত্তে হবে । তিনি নিরুদ্দেশ হন ত  
আমায় নিজেই গিয়ে দলিল রেজিষ্টারি করে' আন্ডে-হবে ।—এ'রা  
সাক্ষী ।

চারু । কোন পুরুষে নই ।

পার্কতী । সে কি !

বিনোদ । পথে বলেছি রফা কর ।

পরেশ । রফা কিসের ?

চারু । রফা কর ।

পার্কতী । [ দলিল বাহির করিয়া ] এই তোমাদের দস্তখৎ ।

চারু । জাল ।

পার্কতী । তোমরা সাক্ষী নও ?

চারু । এর সাক্ষী নই ; সাক্ষী অস্ত্র কিছুর বটে ।—কি বল বিনোদ !

পার্কতী । এ তোমার কাজ, কালীচরণ !

কালী । সম্ভব ! পার্কতী ! আমি এতদিন শুদ্ধ দর্শক হিসাবে

নিরপেক্ষভাবে দুই পক্ষ দেখে আসছি। তুমি নারীহন্তা জেনেও উদাসীন ছিলাম। That only shows a philosophic mind ; কিন্তু তুমি যখন জোচ্ছুরী করে' এক সতীকে ফাঁসিকাঠে উঠিয়েছ, আর ঋষির মত দাদামহাশয়কে দেশান্তরে পাঠিয়েছ, তখন আমার philosophic mind এও এক বিষম শ্লাকা লেগে গেল। আর না! সত্য কথা প্রকাশ করে' দাও চারু। তার পর যা হবার হবে। Do well and right and let the world sink.

পার্বতী। [ শুকমুখে ] সে কি!—আচ্ছা।—এ্যা!—তবে আমি আসি পরেশবাবু।—এস চারু! এস বিনোদ! কথা আছে।

ঠিক এই সময়ে ভবানীপ্রসাদ পুনঃ প্রবেশ করিয়া, বিনা বাক্যব্যয়ে পার্বতীর টুঁটি টিপিয়া ধরিলেন।

কালী ও পরেশ। কর কি! কর কি!

ভবানী। সরে' দাঁড়াও—পায়ণ্ড! এখনও এ বাড়ী দাদামহাশয়ের। দূর হ! [ পার্বতীকে পদাঘাতে সোপান-নিম্নে ফেলিয়া দিলেন; পরে হাত ঝাড়িয়া পরেশের মুখের দিকে চাহিয়া জিজ্ঞাসা করিলেন ]—“ঠিক করেছি?”

পরেশ। বেশ করেছে।

[ প্রস্থান।

ভবানী। [ চারু ও বিনোদের পানে চাহিয়া ] বেশ করেছি?

উভয়ে। বেশ করেছে।

চারু। আর না। আজ প্রকাশ করব।—ও পাজীর সঙ্গে আর না।

[ চারু ও বিনোদের প্রস্থান।

ভবানী। [ কালীকে ] কেমন মুহাশয়! ঠিক করেছি?

কালী। চমৎকার!



Perhaps it was right to dissemble your love.

But why did you kick him downstairs.

ভবানী প্রশান্তভাবে গান গাহিতে গাহিতে প্রস্থান করিলেন ।

পেয়ে মাণিক হারালাম মা আমি অতি লক্ষ্মীছাড়া !

আঁধারে পথ দেখতে পাই না, ওমা এসে কাঁছে দাঁড়া ।

## তৃতীয় দৃশ্য

স্থান—শাস্তার গৃহকক্ষ । কাল—সন্ধ্যা ।

শাস্তা একাকিনী ।

শাস্তার গীত ।

এ ভগতে আমি বড়ই একা, আমি বড়ই দীন ।

বিদেশিনী আমি হেথা, তোমা বৈ কাউরে চিনি না ।

দীর্ঘ দিবা অবসানে, ক্লান্ত দেহে শান্ত প্রাণে,

তোমার কাঁছে খেয়ে আসি, কে আছে আর তোমা বিনা ।

লয়ে শত প্রাণের ক্ষত তোমার কাছে ছুটে আসি,

তোমার বুকে রাখতে মাথা, তোমার মুখে দেখতে হাসি ;

গুণ ধরা, শূন্য ধরা, অসীম ভাচ্ছল্য ভরা,

তুমিও মুখ ফিরাও না, তুমিও কোরো না ঘৃণা ।

গীত শেষ করিয়া শাস্তা জানালার কাছে বসিয়া বাহিরের দিকে চাহিয়া কহিল “উঃ ! কি কালো মঘ করেছে।—ঝড় উঠবে।” এই বলিয়া শাস্তা মেঘের দিকে চাহিয়া রহিল ।

পরিচারিকার প্রবেশ ।

পরিচারিকা । দিদিঠাক্করণ !

শাস্তা অত্যন্ত অধিক চমকিয়া পতনোন্মুখী হইয়া সামলাইয়া লইল ও পরে কঠোর স্বরে কহিল “কি চাও ?”

পরিচারিকা । পার্শ্বতীবাবু এসেছেন ।

শাস্তা । পার্শ্বতীবাবু ! সে কে ?

পরিচারিকা । তুমি না আস্তে বলেছিলে ?

শাস্তা । ও ! পার্শ্বতীবাবু ! বুঝেছি ।—আজ কি বার !—ও ! হাঁ, বলেছিলাম বটে ।—উপরে ডেকে নিয়ে আয় ।

[ পরিচারিকার প্রস্থান ।

শাস্তা । কি বলে’ ডেকেছি, আর কি কর্ত্তে হবে !—মা ! এতে যদি কোন পাপ থাকে, ক্ষমা কোরো ।—এই আমার জীবনের শেষ পাপ । প্রস্তুত হ’য়ে নিই । [ আলমারি হইতে পিস্তল বাহির করিয়া, সমস্ত দেখিয়া ঠিক কুরিয়া লইল ; পরে পিস্তল বস্ত্র মধ্যে লুকাইয়া রাখিল ; পরে তাড়াতাড়ি বস্ত্র ঠিক করিয়া লইয়া কহিল ]—“এখন আমি প্রস্তুত ।—এই যে !”

দাসীর সহিত পার্শ্বতীর প্রবেশ ।

শাস্তা । ১. আশ্বন—ঝি বাইরে থেকে দরোজা বন্ধ করে’ দে ।

দাসী বাহিরে গেল ।

শাস্তা । বন্ধ করে’ দে । ঠিক দে ।

পার্শ্বতী । বাইরে থেকে দরোজা বন্ধ ।—কেন !

শাস্তা। ও ! তাই ত।—ভুল হ'য়ে গিয়েছে।—তা বাক।  
[ সহাস্ত্রে ] দরকার হ'লেই খুলে দেবে এখনি।

পার্বতী। কি স্নন্দর সেজেছো আজ। কি স্নন্দর তোমায় দেখাচ্ছে।

শাস্তা। দেখাচ্ছে না কি !—আচ্ছা, এইবার দেখুন দেখি !  
[ বৈদ্যাতিক ঝাড় আলিয়া দিল ]

পার্বতী। উঃ ! এত স্নন্দরী তুমি ! কি অদ্ভুত ! কি স্নন্দর !—  
স্নন্দরী !—[ অগ্রসর হইলেন ]

শাস্তা। দাঁড়ান।—এইবার দেখুন দেখি।—ঘর অন্ধকার করিল]  
দেখতে পাচ্ছেন ?

পার্বতী। কৈ ? না ! কোথায় তুমি প্রাণেশ্বরী।

শাস্তা। এই যে ! [ একটি সবুজ আলো খুলিয়া দিল ]

পার্বতী দেখিলেন আপাদলম্বিত কেশা জ্যোতির্ময়ী শাস্তা—গ্রীবাভঙ্গী  
সহকারে দাঁড়াইয়া আছে। তাহার এক হস্তে একখানি কাগজ, অপর  
হস্তে পিস্তল।

পার্বতী। এ আবার কি !

শাস্তা। [ কাগজ দেখাইয়া ] দস্তখৎ করুন।

পার্বতী। এ আবার কি !

শাস্তা। আপনার পুত্রের নামে পত্র—বাহক হস্তে দলিল পার্সিয়ে  
দেবার জন্ত। পড়ুন। পড়ে' দস্তখৎ করুন।

পার্বতী। [ কাগজ কলম লইয়া, পড়িয়া ] ও ! তা দস্তখৎ কর  
কেন ?

শাস্তা। দস্তখৎ করুন।

পার্কর্তী। না। কখন না।

শাস্তা। দস্তখৎ করুন—[ পিস্তল দেখাইল ]

পার্কর্তী। কখন না।—কি কর্বে !

শাস্তা। দস্তখৎ করুন। [ পিস্তলের নল পার্কর্তীর দিকে লক্ষ্য করিয়া ] এই মুহূর্তে—ন্যইলে—

পার্কর্তী। আচ্ছা [ পত্র স্বাক্ষরিত করিলেন ]

শাস্তা। বড় বাধ্য ! [ পত্র খামে পুরিতে পুরিতে ]—ঝি ! ঝি !

দাসীর প্রবেশ।

শাস্তা। এই নাও ! তার পর যা বা বলে' দিয়েছি।—বাও, দরোজা খের বন্ধ কর।

[ দাসী প্রস্থান করিয়া দ্বার বন্ধ করিল ]

শাস্তা আবার সমস্ত আলো জালিয়া দিল।

শাস্তা। [ সহাস্তে ] দেখুছেন পার্কর্তীবাবু, যে শয়তানীতে আপনার সমকক্ষ একজন আছে !

পার্কর্তী। বটে ! তুমি এত বড় শয়তান শাস্তা ?

শাস্তা। বেঞ্জার চেয়ে বড় শয়তান আর কেউ আছে ?—যার স্বরে ছলনা, হাস্তে ছলনা, চুষনে ছলনা, আলিঙ্গনে ছলনা ; যে তার শরীর বিক্রয় করে, আত্মা বিক্রয় করে, জীবনের সাররত্ন ভালোবাসা—তাও বিক্রয় করে ; যে রাজার ভিটেয় ঘুঘু চরাতে পারে, ঋষির ঋষিষ ঘোচাতে পারে, একটা রাজ্য রসাতলে দিতে পারে ; যার জীবনই একটা প্রকাণ্ড জীবন্ত মিথ্যাবাদ।—এত বড় শয়তান আর কে !—কিন্তু আমি বেঞ্জার সমকক্ষ নই। আমি বিবাহিত প্রেমের প্রহর। [ স্বর কাঁপিতে লাগিল ]

তা যদি জাস্তাম, তা হ'লে কোন কৃষকের বধু হ'য়ে পবিত্র আনন্দময় দারিদ্র্যের নিশ্চল সুখ ভোগ কর্তে পার্ভাম।—কিন্তু আপনি আমার সর্বনাশ করেছেন।

পার্কভী। [ সবিস্ময়ে ] আমি !

শাস্তা। হাঁ, আপনি !—আমার পিতা কে, জানেন !—ও, জানেন না ! জানবেন কেমন করে ! তখন তিনি প্রবাসে ছিলেন। কিন্তু এখন তাঁকে আপনি বেশ চেনেন। তবে শুধু আমার পিতার নাম শ্রীভবানীপ্রসাদ চট্টোপাধ্যায়—যাঁর ঘর আপনি শ্মশানে পরিণত করেছেন। আমার মাতার নাম হিরণ্ময়ী—যাঁকে ভ্রষ্টা করে', যাঁর বৃদ্ধ পুরাতন বিশ্বাসী ভৃত্যকে হত্যা করে', পরিশেষে—কি, একদৃষ্টে চেয়ে রয়েছেন যে—পরিশেষে তাঁকে হত্যা করেছেন।

পার্কভী। কে বল্ল ?

শাস্তা। প্রমাণ আছে।

পার্কভী। সে কি !—আমায় ছেড়ে দাও শাস্তা।

শাস্তা। এই দিচ্ছি।

পার্কভী। আমি হত্যা কর্ব মনস্থ করে' হত্যা করি নাই !

শাস্তা। কৈফিয়ৎ বিচারালয়ে দিবেন।—এই যে—

দ্বার খুলিয়া পুলিশ সহ ভবানী, চাক্র ও বিনোদের প্রবেশ।

শাস্তা। এই যে ! দারোগা সাহেব ! আমি এই পার্কভীচরিত্র ঘোষকে আমার মাতা হিরণ্ময়ীর হত্যার অপরাধে অভিযুক্ত করি। সাক্ষী—এঁরা—

দারোগা। বাঁধো—

কনষ্টেবলগণ তাঁহাকে বন্ধন করিল।

শাস্তা। আর বাবা ! আপনার কথা আপনার সম্মুখেই তার পাপের প্রায়শ্চিত্ত কর্ছে। তবে—[ নিজের চিবুকতলে পিস্তল লাগাইয়া ]—  
বাবা, তবে বিদায় দেন।

ঠিক সেই সময়ে এক মহাবজ্রনাদ হইল। শাস্তা কাঁপিয়া উঠিল !  
হস্ত হইতে পিস্তল পড়িয়া গেল। শাস্তা মূচ্ছিত হইয়া পড়িল।

ভবানী। মা কালী! আমার কন্যাকে রক্ষা করেছেন। [ শাস্তার মস্তক ক্রোড়ে লইয়া ] অভাগিনী! কথা আমার। আমি মায়ের কাছে প্রার্থনা করেছি। তিনি তোমায় চরণে স্থান দিয়েছেন।—ওঠো  
অভাগিনী।

শাস্তা। [ ক্ষীণস্বরে ] বাবা !

ভবানী। মা !

## চতুর্থ দৃশ্য

স্থান—বিশ্বেশ্বরের শয়ন-কক্ষ । কাল—রাত্রি ।

বিশ্বেশ্বর একখানি ছোরা হাতে করিয়া প্রবেশ করিলেন ।

বিশ্বেশ্বর । না, আমি এইখানেই শেষ করব। আর পারি না । কিন্তু—  
আত্মহত্যা !—মা দুর্গা ! আমার সর্বদা স্মৃতি বিঁধিয়ে বিঁধিয়ে মার্কো,  
আর যদি তা আমার অসহ হয়—ত অমনি পাপ । তা যদি হয়, তা’হ’লে  
মানুষকে দানবের শক্তি দাও নি কেন ? এই ক্ষুদ্র শরীরটার মধ্যে একটা  
স্নেহের সমুদ্র দিয়েছিল কেন রাক্ষসী ।—কিন্তু জীবনের শেষ অঙ্কে একটা  
মহা পাপ করে’ মরব । [ ছোরা টেবিলের উপর রাখিলেন ; নিজে  
তাহার পাশে বসিলেন ] না, কাজ নাই । [ উঠিয়া কক্ষে পাদচারণ করিতে  
লাগিলেন ] ওঃ ! আর পারি না । তিলে তিলে—এও ত মর্ছি !—  
তার চেয়ে—কিসে পাপ !—আমাকে এ জীবন দিয়েছো—এ আমার  
সম্পত্তি । আমি রাখি, ছুড়ে ফেলে দেই, তাতে তোমার কি ! করব !  
[ টেবিলের কাছে যাইয়া ছোরা লইলেন, করতলে গড়াইতে লাগিলেন ]  
না, কাজ নাই । [ পুনরায় তাহা রাখিয়া টেবিলে মাথা রাখিয়া ভাবিতে  
লাগিলেন ; পরে সহসা চমকিয়া উঠিয়া কহিলেন ] ও কি !—কে আমায়  
সেই পুরাতন পরিচিত স্বরে ডাকে ! মৃত্যুর পরপার থেকে তুমি আমায়  
১৬৮ ]

ডাক্ছে। দিদি!—ঐ যে আবার! দূরে—না, নিকটে! আরও উচ্চে আরও প্রাণমাতানো সুরে ডাক্ছে।—এই যাই দিদি। [ছোরা গ্রহণ]—  
কৈ! আবার সব স্তব্ধ! [জানালায় কাণ দিয়া] কৈ!—স্তব্ধ রাত্রি।  
কেউ জেগে নাই। একা আমি জেগে। কেউ দেখ্ছে না। দেখ্ছে কেবল  
ঐ পূর্ণিমার চাঁদ;—স্থির হ'য়ে দেখ্ছে। ঐ চাঁদের পাশে কে!—সরযু  
না?—ঐ যে আমার হাত বাড়িয়ে ডাক্ছে।—না। কৈ! কেউ নাই  
ত;—কল্পনা!—[বসিলেন; সহসা উঠিয়া] ঐ যে আবার ডাক্ছে!—  
আবার! আরও কাছে। না। এ কল্পনা—নয়। সরযু আমার  
ডাক্ছে!—ঐ আবার! এ কি! তার স্বর কি রাত্রির বাতাসে ভেসে  
বেড়াচ্ছে!—ঐ যে আবার! এই যাই দিদি!—ক্ষমা কোরো দয়াময়ী!  
[নিজের বক্ষে ছোরা মারিলেন]

ঠিক সেই সময়ে “দাদামহাশয় দাদামহাশয়” বলিয়া ডাকিতে ডাকিতে  
দ্বার খুলিয়া ভবানীপ্রসাদের সহিত সরযু প্রবেশ করিয়া বিশ্বেশ্বরের  
গলদেশ জড়াইয়া ধরিলেন। বিশ্বেশ্বরের হস্ত হুইতে ছোরা গড়িয়া গেল।  
প্রদীপ নিভিয়া গেল।

বিশ্বেশ্বর। কে তুই মায়াবিনী!

সরযু। আমি আপনার দিদি সরযু।

বিশ্বেশ্বর। তুই ত মরে' গেছিস্—ওঃ! আমার এগিয়ে নিতে  
এসেছিস্?

সরযু। মা, আমি মরিনি। আপনাকে ছেড়ে কি আমি যেতে  
পারি দাদামহাশয়!

বিশ্বেশ্বর। মরিস্ নি! গল্গায় দড়ি দিয়েছিলিস্—

সরযু। না দাদামহাশয়!



বিশ্বেশ্বর। সে কি, তবে সব ভ্রম ! তবে এতদিন ছিলি কোথা  
রাক্ষসী !

সরযু। কিঙ্ক এ যে রক্ত !—দাদামহাশয় ! এ কি !

বিশ্বেশ্বর। আমি চলেছি দিদি—

সরযু। কোথায় দাদামহাশয় ?

বিশ্বেশ্বর। পরপারে। তবে যাই—সরযু—দিদি ! [ সরযুর গলদেশ  
জড়াইয়া প্রাণত্যাগ করিলেন ]

---

## পঞ্চম দৃশ্য

স্থান—পরিত্যক্ত প্রাস্তর । কাল—অপরাহ্ন ।

মহিম ও শাস্তা ।

মহিম । সরে' দাঁড়াও । তোমার নিঃশ্বাসে অধিকুণ্ডের হৃগন্ধ ; তোমার অধরে কেউটে সাপের বিষ ; তোমার স্পর্শে তুধানলের জ্বালা ।—কাছে এসো না । সরে' দাঁড়াও ।

শাস্তা । কেন, আমি তোমার কি করেছি ?

মহিম । 'না, কিছু কর নি । আলেয়ার রূপ ধরে' এসে আমায় ভাগাড়ে টেনে এনে ফেলেছ । ঝড়ে মাঝ গঙ্গায় ফেলে হাল ছেড়ে দিয়ে ভুবিরে মেরেছ ; আমাকে বিশ্বের বর্জিত, সংসারের ঘণিত হন্তে কুকুর করে' ছেড়ে দিয়েছ, আমায় কাপুরুষ, মিথ্যাবাদী, ধাপ্লাবাজ, জোচ্চোর, পাষণ্ড, পশুর অধম করেছে । আর কি কর্বে !

শাস্তা । সব দোষ আমাদেরই ।—আমরা পান্থ, মড়ক, সর্বনাশ,—স্বীকার করি । আমরা ত আছিই, তবু যতদিন মানুষ আছে, পৃথিবী আছে, সৃষ্টি আছে, ততদিন আমরা আছি, থাকবো । ব্যাধির কীটাণুর মত, শ্রোতের আবর্তের মত, চীরের চোরাবালির মত, আমরা আছি, থাকবো । কিন্তু তোমরা এ দূষিত বায়ুর মধ্যে সৈধোও কেন ? এ আবর্তের মধ্যে এসে পড় কেন ? এ চোরাবালিতে পা বাড়িয়ে দাও কেন ?—দোষ আমাদেরই ।

মহিম । এই কথা শোনার জগুই কি তুমি এখানে এসেছো ?

শান্তা । না, আমি তোমায় তোমার সহধর্মিণীর কাছে নিয়ে যেতে এসেছি ।

মহিম । তার ত ফাঁসি হয়েছে । আমার জন্ত—

শান্তা । ফাঁসি হয়েছে বটে, কিন্তু তাঁর নহ

মহিম । তবে কার ?

শান্তা । পার্শ্বতীর [দস্তে দস্তে ঘর্ষণ করিয়া] সেই—না, মাকে ফিরে পেয়েছি, আর কেন !—সে সতীর ফাঁসি হয় নাই, মৃত্যু হয়েছে বটে !

মহিম । সে কি ?

শান্তা । দাদামহাশয়ের মৃত্যুর পরদিনই সেই সতীর মৃত্যু হয় ।

মহিম । কিসে ?

শান্তা । জানি না কিসে । কোন চিকিৎসক সে রোগ ধর্তে পারে নাই । আমি তার মৃত্যুশয্যার পাশে ছিলাম । তাঁকে তৈলাভাবে প্রদীপটির মত ধীরে ধীরে নিভে যেতে দেখেছি । সে দৃশ্য আমি কখনও ভুলবো না । আমি জিজ্ঞাসা করলাম “কোথায় যাচ্ছ জানো, বোন ?” সতী উর্ধ্বে অঙ্গুলি নির্দেশ করে’ বলেন “পরপারে—দাদামহাশয়ের কাছে ।” আমি জিজ্ঞাসা করলাম “তোমার এই বিষয় কি হবে ?” দেবী সহাস্তে তাঁর মাতুলের মুখে’ চোখে’ চোখে বলেন “গরীবদের বিলিয়ে দিও মামা, দাদামহাশয় যা কর্তেন ।” তার পর আমার পানে চোখে বলেন “বোন—তাঁর সঙ্গে যদি দেখা হয় ত’ হ’লো যে আমি শেষ নিশ্বাসে তাঁর কল্যাণকামনা করে’ মরেছি ।” এই বলে’, তাঁর স্থির ঠাণ্ডা স্বর্গের পানে চোখে রৈল ।

মহিম । তবে যে বলে যে তুমি আমায় আমার জীবন কাছে নিয়ে যেতে এসেছ ।—আমার জীবন ত স্বর্গে !

শাস্তা। আমি তোমায় সেই স্বর্গের পথে নিয়ে যেতে চাই।

মহিম। তুমি! তুমি আমায় স্বর্গের পথে নিয়ে যাবে! তুমি বেণ্ডা—

শাস্তা। তুমি যে তার অধম। সতীর গর্ভে তোমার জন্ম, সংস্কে তোমার বাস, তুমি কি করেছে বল দেখি? তোমার নরকেও স্থান নাই। বেণ্ডার ঘরে লালিত, বেণ্ডার কুলধর্মে দীক্ষিত হ'য়েও, সেই অন্ধকার গহ্বর থেকে, আমি নিজ শক্তিবলে এক পর্বতভার ঠেলে উঠেছি। আর তুমি—যাক। আমি তোমায় স্বর্গের পথ থেকে দূরে নিয়ে গিয়েছিলাম, আজ আমি তোমাকে সেই স্বর্গের পথে নিয়ে যাবো। আজ সে সাধ্য আমার আছে—যদিও আমি বেণ্ডা! [ সগর্বে শির উঁচু করিয়া দাঁড়াইল ]

মহিম। '[ চাহিয়া স্তম্ভিতভাবে ] এ কি!—না, না—তুমি ত বেণ্ডা নও! বেণ্ডা ত ও রকম গ্রীবা বক্র করে' মাথা উঁচু করে' দাঁড়ায় না। বেণ্ডা ত ও রকম উজ্জ্বল স্নেহকরণ মুহু হাস্য হাসে না। বেণ্ডা ত ও রকম সজল আনত নেত্রে অসীম অনুকম্পাত্মক চায় না। তুমি ত বেণ্ডা নও।—কে তুমি!—কে তুমি!

শাস্তা। আমি নারী!—মায়ের প্রসাদে আমার কলঙ্ক ধোত হ'য়ে গিয়েছে। আমি আজ মাকে পেয়েছি।

মহিম। [ সাগ্রহে ] কোথায় পেলে!—কোথায় পেলে! আমি যে পৃথিবীময় মাকেই খুঁজে পেয়েছি! একদিন উদ্ভাসবৎ এক সম্মানসীল পদভালে পড়ে' বল্লাম “আমার মা কোথায়?” তিনি বলেন 'খোঁজ, দেখতে পাবে।’ তুমি পেয়েছ? কোথায় মা! কোথায় মা!

শাস্তা। দেখবে এসো। [ হঠাৎ ধরিয়া মহিমকে লইয়া গেলেন ]

## ষষ্ঠ দৃশ্য

স্থান—শ্মশান । কাল—সন্ধ্যা ।

মহিম ও শাস্তা ।

মহিম । কৈ ! মা কৈ !

শাস্তা । এইখানেই মা ।

মহিম ! [ স্নানবিশ্রামে ] এখানে !—এ ত শ্মশান ।

শাস্তা । এর মত জায়গা আর আছে ! চেয়ে দেখ, 'ঐ পতিতপাবনী মা সুরধুনী তার উদ্দাম উচ্ছ্বাসে ছুই কূল প্লাবিত করে' খরশ্রোতে চলেছে । 'ঐ দেখ, নদীর পরপারে রক্তিম সূর্য্য অস্ত যাচ্ছে । 'ঐ দেখ, লোলজিহ্ব চিতা জলছে' 'ঐ দেখ, কত লোক শব কাঁধে করে' আসছে, নামাচ্ছে, পোড়াচ্ছে ; মাটির দেহ ধু ধু করে পুড়ে যাচ্ছে, আর তারা নির্গমেষ নয়নে তাই চেয়ে দেখছে ; তার পরে চিরজন্মের মত পার্থিব সম্বন্ধ বিচ্ছিন্ন করে' শূণ্যধরে ঝুঁকি যাচ্ছে !—কি সুন্দর !

মহিম । [ সবিশ্রামে ] সুন্দর

শাস্তা । অতি সুন্দর ! জীবনের দীপ নিভে গিয়েছে ; বেদনার স্পন্দন থেমে গিয়েছে ; স্নেহের মোহ পুড়ে গিয়েছে ; ক্লেশের উপর বিদ্রোহ চম্কাচ্ছে ; জন্মের উপর মৃত্যু গর্জ্জি' উঠছে !—তাই মা আমার শ্মশানচারিণী ।

মহিম । কৈ মা !

শান্তা । একবার পরপারে চাও দেখি !—চাও !—কি দেখছো ?

মহিম । রক্তিম সূর্য্য অস্ত যাচ্ছে ।

শান্তা । ওখানে নয় । জীবনের পরপারে, চাও—কিছু দেখতে পাচ্ছ ?

মহিম । না—

শান্তা । মাকে ?

মহিম । কৈ মা !—

শান্তা । একবার প্রাণ ভরে' মা বলে' ডাক দেখি ! দেখ, দেখতে পাও কি না ! ডাক !

মহিম । মা ! মা !

শান্তা । 'দেখতে পাচ্ছ না?—আমি ত পাচ্ছি । [ জাহ্নু পাতিয়া করঘোড়ে ] বিশ্বব্যাপিনী বিবসনা উন্মাদিনী কালী করালী মা আমার ! ও কি মূর্ত্তি ! উদ্ধবাহ ছুটি গগন ভেদ করে' উঠছে ; মাথাবু চারিদিকে ঘিরে কোটি কোটি চন্দ্র সূর্য্য গ্রহ তারা নৃত্য করছে ; কটিদেশ জড়িয়ে ধরে' ধরণী স্তম্ভ পান করেছে ; শব্দতলে রসাতল মুচ্ছিত হ'য়ে পড়ে' আছে !—ঐ দেখ, মা তাঁর মুষ্টি দিয়ে সংহার ও সৃষ্টি ছড়িয়ে দিচ্ছেন ; তাঁর রসনায় হুস্কর ও অভয়বাণীর সঙ্গীত ধ্বনিত হচ্ছে ; তাঁর বক্ষে জন্ম ও মৃত্যু স্পন্দিত হচ্ছে ; তাঁর সম্মুখে স্বর্গ, পশ্চাতে নরক—দুই মহাসমুদ্রের মত পড়ে' রয়েছে । তাঁর বাক্সে, উপর জগতের যত পুণ্যাত্মা ঘুমিয়ে আছে । ঐ দেখ, তোমার দাদামহাশয়, ঐ দেখ, তোমার জী, ঐ দেখ, তোমার মা—জগন্মাতার বক্ষের উপর—ঐ পরপারে ।

স্ববনিকা পতন ।